

ببساطتہ كده

تألف

أحمد خالد شابى

طبعة ٢٠١٩

خالد، أحمد

ببساطة كده / أحمد خالد؛ الجيزة: أطلس للنشر والإنتاج الإعلامي،
٢٠١٨.

٢٧٢ ص، ٢٠ سم

تدمك: ٤ ٦٨٦ ٣٩٩ ٩٧٧ ٩٧٨

١- القصص العربية القصيرة

أ- العنوان

٨١٣,٠١

ببساطت كده

تألف

أحمد خالد شابى



الكتاب : ببساطة كده

المؤلف : أحمد خالد شليبي

الغلاف : عبدالله نصر

الناشر : أطلس للنشر والإنتاج الإعلامي ش.م.م

٢٥ ش وادى النيل - المهندسين - الجيزة

sales@atlasdic.com

www.atlas-publishing.com

تليفون : ٣٣٤٦٥٨٥ - ٣٣٠٤٢٤٧١ - ٣٣٠٢٧٩٦٥

فاكس : ٣٣٠٢٨٣٢٨

رئيس مجلس الإدارة
سرطانة
٢٠١٩

عادل المصرى

عضو مجلس الإدارة
ع
٢٠١٩

الإنتاج
٢٠١٩

نوران المصرى

رقم الإيداع

٢٠١٨/١٤٦٥٨

الترقيم الدولى

٩٧٨-٩٧٧-٢٩٩-٦٨٦-٤

الطبعة الاولى

طبعة ٢٠١٩

إهداء

إلى أسرتي وعلى رأسهم والدي العزيز وأمي الغالية..

لولاكم لما كنت الآن أكتب هذا الإهداء، فأنتم سبب وجودي في
الحياه من الأساس. وكل ما هو هناك في الصفحات التالية نابع
من نشأة مليئة بالدفئ والحب والإتزان!

كنت ومازلت وسأظل طفلكم الصغير الذي يشعر بالغبية في
أي مكان لستم فيه..

شكراً يا أبي..

شكراً يا أمي..

وإلى رفيقة كفاحي، زوجتي..

وكل من ساهم في وصولي إلى هنا.

أشكركم!

مقدمة

في بداية أي لوحة فنية، الموضوع يبقى مجرد خطوط عشوائية مش مفهومة..

وواحدة واحدة الملامح والتفاصيل تبدأ تظهر، لحد ما نوصل في النهاية لأروع الأعمال الفنية.

يبقى لو حَكَمْنَا على اللوحة من أول كام خط فيها أكيد هنشوفها بصورة مش عاجبانا، لأننا مش فاهمينها ولأنها لسة مش كاملة، ورؤيتنا ليها هيبقى أساسها القصور.

إنما لو إستيننا لحد ما اللوحة تخلص وشوفنا الصورة كاملة، أكيد الموضوع هيبقى مختلف تماماً وساعتها نقدر نُحْكَم إذا كانت عاجبانا ولا مش على هوانا!!

أنا لا بقول على نفسي فنان، ولا الكتاب ده لوحة فنية، ولا بقولكم تحكموا إزاي..

بساطة ده كان مجرد مثل للتوضيح، وبس.

طيب، دلوقتي إحنا هنتكلم عن إيه بالضبط؟

هنتكلم عن علاقة الأزواج ببعضهم والمشاكل اللي بتواجههم
وإزاي نقدر ببساطة نحلها من وجهة نظري المتواضعة، من بداية
نشأة الحب في قلوبهم ونهايةً بالحياة الزوجية الجليلة..

وفي كلامنا هنلاقي «الحد» اللي دايماً بيعارض ويقاوح
وبيسأل أسئلة سلبية بتأخر بس، مابتقدمش..

كلنا جوانا «الحد» ده، الفكرة إننا محتاجين نلاقي أسباب
منطقية نرد عليه بيها!

وحاجة كمان..

عُمّر ما كان مطلوب منك تبقى ملاك.. إحنا بشر، وربنا
فضلنا على جميع خلقه بنعمة الاختيار، وميزنا بالغلط والغفران.

الموضوع وما فيه إننا بنحاول نرّجع أيام البساطة اللي
أجدادنا عاشوها وامتتعوا بيها قبل مانيجي إحنا بحياتنا
وسرعتها وكل التكنولوجيا اللي فيها. وبنحاول نتعامل مع كل
المواضيع التي تمس العلاقات الإنسانية الزوجية ببساطة وبدون
تعقيد، زي زمان..

اسأل كده أي حد عن الحياه زمان، هتلاقي دايماً الرد: ياااه،
زمان كانت الدنيا سهلة و «بسيطة»..

البساطة هي الحاجة الي إحنا فعلاً مفتقدينها!!

والي لو إستخدمناها في حياتنا وعملناها حساب في طريقة تفكيرنا وتصرفاتنا وفهمنا للأمور، الحياه هتبقى أسهل بكثير..

مش بس حياتنا الزوجية، لأ دي حياتنا كلها..

حد هيقوللي: طيب إنت هتتكلم عن الإرتباط والجواز والكلام ده كله، إفرض ياعم أنا مش متجوز ولسة قدامي وقت كبير عاجلجواز، ده إذا إتجوزت أساساً.. أروح أرجع الكتاب طيب ولا أعمل إيه؟؟

هرد وأقوله: ترجعه أو ماترجعوش دي حاجة أنا ماقدرش أتكلم فيها لأن دي حريرتك الشخصية، بس الي هقدر أتكلم فيه هو الكتاب!

لو إنت مرتبط يبقى هتشوف الحياه الي جاية قدامك كما ينبغي أن تكون.. مش الكلام الي بتسمعه وبتقوله لأي واحد من صحابك الي هيتجوزوا.. هتشوف المشاكل الي بتتكرر بين معظم الأزواج والأساطير والمفاهيم الي مش دايماً بتبقى صح، وهتشوف برضه إن الموضوع عمره ماكان يا أنا يا إنتي.

الموضوع لما يبقى أنا وإنتي، هيبقى أبسط بكثير!

ولو أنت مش مرتبط ومش ناوي ترتبط ولا تتجوز يبقى
علاقل بعد ماتخلص الكتاب، يمكن لما تلاقي واحد من
صحابك هيتجوز تنصحه وتقوله ماتخافش.

ماتخافش لأن الجواز زيه زي أي حاجة في الدنيا أنت اللي في
إيدك تخليه حلو أو لا قدر الله وحش!

زي بالضبط الطالب في الجامعة أو الموظف في شغله لو يبحب
الحاجة اللي بيدرسها أو بيشتغل فيها يبقى أكيد هيبقى مبسوط
ومميز أبس لو ما عندهم ش الحتة دي وسمعوا كلام الناس: الكلية
دي صعبة، أو الشغلانة دي مش جايدة همها. الموضوع ساعتها
هيبقى فعلا مأساة!



ببساطة.. كده؟!!

الجواز ليه حالات كتير قوي...

يعني مثلاً جارتني من زمان ومتريين سوا ومتعودين على بعض وهي معتقدة إنها عارفاني بعيوبي ومميزاتي وأنا كذلك وخلص جه موسم التزاوج فبنقرر نتجوز.. زي جواز القرايب برضه، من ساعة ما إتولدت والعيلتين مقررين إنني أتجوز بنت خال عمي وهكذا.

أو مثلاً إتعرفت على واحدة بطريقة ما، في الكلية بقى أو الشغل أو النادي أو أياً كان وحيننا بعض لحد موسم التزاوج برضه فقررنا نتجوز ونكمل حياتنا مع بعض.

ولا مثلاً إتخرجت وسافرت أو ماسافرتش بس كنت بكون نفسي أو أي مبرر تاني المهم قطار الجواز فاتني وهرب فبقرر أتبدي أدور على عروسة. فبسأل خالتي، وعمة صاحبي، وجارتنا (الجارة دي غير الأولانية اللي أنا إتجوزتها على فكرة)، والست اللي ماشية هناك دي، وعم حفصل البقال وكل معارفي اللي أعرفهم واللي ماعرفهمش لحد ما ألاقى بنت الحلال وتوتة توتة خلصت الحدوتة..

وحاجات تانية كتير وأمثلة وظروف أكثر. المهم إن مهما كانت ظروف الجواز بيبقى في فترة تعارف وبعد كدة خطوبة وبعدين الجواز. ومن هنا هتبتدي الحكاية، كلامنا هيبقى عن أكثر نوعين في الجواز شيوعا اليومين دول وهما الجواز عن حب وجواز الصالونات.

..الجواز عه حب..

التعارف..

ده بيبقى بين إثنين إتقابلوا بشكلٍ ما وإنجذبوا لبعض وتبدأ مرحلة التعارف الي معظم الناس بتسميها فترة «الزواق» بمعنى إن كل واحد بيطلع الحلو الي عنده قدام التاني. بس أنا عندي رأي في الحتة دي.

الموضوع أبسط من كده بكثير.

أيوة كل واحد بيطلع الحلو الي عنده بس مش عن عمد، يعني مش بيتعمد يجني العيوب لأ.. هي فِطرة مش أكثر. أي حد فينالو جاب تيشيرت جديدة هيعاملها أحسن من أخته وأخوه في الأول..

لما نرجع من خروجة هنطرده كل الي في البيت عشان التيشيرت ماتتوسخس، وهنجيب صندوق إزاز ونعلق التيشيرت جواها عشان نمتع عنينا بيها حتى وإحنا مش لابسيناها، وهنكهرب باب الشقة عشان التيشيرت ماتتسرقش.

تعالو نشوف بعد مرور فترة قصيرة من الزمن...

هنلاقي التيشيرت بتتعامل معاملة كفار قريش بعد انتشار الإسلام.

ببساطة كده.. هو ماكانش بيمثل عليكى وعامل ملاك ولا حاجة، ولا هيه كانت معيشاك فى الوهم وراسمة الدور. أي حاجة جديدة ببقى ليها بريقها ولمعانها ومعاملتها الخاصة فى الأول، وواحدة واحدة الحاجة دي بتبقى «عادي». الموضوع فطرة وطبيعة فينا كلنا..

المهم!! اللي ربنا بيكتبلوا النجاة من المرحلة دي وبيقدر يفهم إن كلنا بشر وعندنا عيوب، بيكمل المشوار وتبدأ مرحلة جديدة وهي مرحلة الارتباط.. وهنابقى بتحصل شوية صدمات.

الارتباط..

بتلاقي الراجل بعد ما كان كيوت ومتفتح وبيراعي ظروفك ودايماً واقف جهمك، بيتحول بقدرة قادر لشخص متحكّم وعايزك تلبسي ده وماتلبسيش ده، وتوطي صوتك عشان عيب إحنا فى الشارع، وبلاش جنان عشان مايصحش كده، ولأمش هينفع نتقابل النهاردة عشان ما فيش فلوس أو خالتي تعبانة أو

رايح مشوار مع واحد صاحبي إلى آخره من الحجج.. اللي هو
بيعمله ده مالوش عندك غير معنى واحد بس:

هو ما بقاش يجني زي الاول!!

وبتلاقي البنت بعد ما كانت مهتمة بكل تفاصيلك وبتحبها
زي ما هية بدأت تحس إن بقى ليها الحق تغير في التفاصيل دي
وتعترض عليها، زي مثلاً: حبيبي إحلق ذقنك عشان أنا بحب
شكلك وأنت حالقها - مع العلم أن المعلومة دي أنت أول مرة
تعرفها - أو العكس، حبيبي الذقن الطويلة شكلها يجنن عليك
ماتربيه!!

أو المثل الشهير في معظم العلاقات، حبيبي انت لازم تبطل
سجاير عشان صحتك وعشان أنا بتخفق من ريحتها مع العلم
إنه هو هو نفس الشخص اللي إنتي حبته وهو بيشر ب سجاير
وريحتها وريحته كانت مابتملكيش اي مشكلة.

وغيره وغيرها من التغيرات النقيضية اللي في معظم الأحيان
بتودي في داهية وبتنهى علاقات كثير عشان للأسف الطرفين
مش فاهمين إن هما دلوقتي في مرحلة تانية مختلفة تمام الاختلاف
عن مرحلة التعارف، وإن كل مرحلة ليها متطلباتها ومميزاتها..
الموضوع بسيط جداً جداً..

الراجل بدأ يتحكم ويفرض سيطرته، صح؟!

صح من وجهة نظرٍك، بس الموضوع مش كده خالص ياست البنات. انتي دلوقتي بقيتي جوهرته ولازم يحافظ عليك، فبالتالي لما يقولك ده ضيق ماتلبسيهوش أو ملفت أو أي حاجة زي كده لأنه هو كمان شاب وكان بيقف مع شباب وعارف إن الدنيا مش أمان، وطبعاً هو يبحبك جداً ومش ممكن يستحمل الكلام ده عليكى.. أنا معاكى ان أسلوبه بيبقى غير مبرر بالنسبالك بس صدقيني هو خايف عليكى. ومعظم تصرفاته بيبقى أساسها حبه وخوفه عليكى، أي نعم في تصرفات بيبقى أساسها الاستعباط والتفليص، بس معلش كلنا لينا هفوات ، والكمال لله وحده، طيب ليه ماكانش بيعمل كده قبل ماترتبطوا؟!

أقولك أنا ليه!!

عشان ساعتها كان في حاجات تانية بالنسباله أهم من كده.

زي إيه؟

إنه ساعتها كان أهم حاجة في حياته إزاي يوصلك إحساس الحب ده ويعبرلك عن اللي جواه، ويتأكد إنك إنتي كمان بتبادليه نفس الشعور! وده طبعاً بيبقى لاغي عنده حاجات كتير بتبدأ تظهر بعد كده..

يعني قبل الإرتباط كان شغله الشاغل يعرف إيه نوع الشيكولاتة اللي بتحببها عشان يجيبهولك ويشوف رد فعلك ويدهشك، أو يعمل حاجة حلوة تبسطك، أو يقول كلمة تضحكك وهكذا من الحاجات اللي يشدك بيها وفي نفس الوقت يوصل لك إحساسه بحبك.

ده مش معناه أبداً إنه مش هيعمل كده بعد الإرتباط، الموضوع ومافيه إن زي ماقلنا قبل كده (كل مرحلة وليها متطلباتها ومميزاتها)

نيجي بقى للبنوتة بعد الارتباط!!

بدأت تقولك على حاجات تغيرها في تفاصيلك وشخصيتك، لان زي ما انت خايف عليها ومعظم تصرفاتك على هذا الأساس، هيه برضه ليها حسبة جميلة وبسيطة جداً..

انت ماتعرفش هية بتعمل إيه عشان تنزل تقابلك، وبتتعب نفسها قد إيه عشان تبقى حلوة في عينك وتشرفك في أي مكان إنتو رايحينه، وكمية التفاصيل اللي بتبقى عاملة حسابها عليها. الموضوع مش هدوم ولبس وبس، لأ أنا بتكلم على كل التفاصيل زي مثلاً: هتقولهم إيه في البيت عشان تقدر تنزل تقابلك (إنت طبعاً مابتشلس هم النقطة دي بحكم إنك ولد وسهل تتحرك في

أي وقت) وهتكلموا في إيه وهكذا. تخيل بقى بعد المجهود ده، تلاقيك بتأجل المعاد أو تعتذر.

ولو إتقابلتو، تنزل تلاقيك شبه عنتره.. ذقنك لحد ركبك وشعرك شبه مشط رجلك وجاي متأخر وحاجة تكسف. طب خليك مهندم على الأقل!!!..

وغيرها من التفاصيل اللي مابتشغلش بالك، بس بالنسبائها بيبقى تقصير وإهمال.

فبالتالي لازم تعلق وتحاول تلفت نظرك بأي طريقة إنك محتاج تغير من نفسك شوية وتتعَب أكثر عشان خاطرها، لأن هي فعلا بتتعَب عشان خاطرك.

أنا عارف إن أنت كمان بتتعَب بطريقة تانية خالص، وفي تفاصيل تانية كتير بتشغل بالك زي قلقك إن حد من أهلها يشوفها معاك ويعملها مشكلة فتبقى قاعد معاها زي الرادار عينك في وسط راسك وتعمل مجهود كبير في حاجات من نوع تاني عشان مثلا تجيب فلوس تخرجو أو تجييلها هدية والكلام ده.

فإنتم مش لازم ترقصلها رقصه الهنود الحمر عشان هي بتفكر في تفاصيل كتير، بس على الأقل خلي الموضوع في دماغك واعرف إنها بتتعَب عشان خاطرك وقدرها. وإنتمي مش لازم

تقدمي قرابين لنهر النيل عشان هو بيتعب عشان ييسطك، بس
على الاقل خلي الموضوع في دماغك وقدره.. بلاش يا جماعة
جملة «عادي ما هو لازم يعمل كده»... لأن فعلاً ده مش لازم!
الي هي بتعمله ده مش تفاهة، ولا الي هو بيعمله ده
استهتار..

الموضوع ببساطة إن ربنا - سبحانه وتعالى - خالق الراجل
والست بعقليات مختلفة..
بس كده..

أما بالنسبة لموضوع السجائر، الحكاية بسيطة جداً..
في البداية قبل الارتباط البنت بيقى عندها تفاصيل تانية
كثير تشغل دماغها زي مثلاً: هو عمل كذا؟ يا ترى كان قصده
ايه لما عمل كده؟!

هل ده معناه إنه منجذب ليا ويحبني؟
وبعدين أنا لازم أعمل كذا لما أشوفه بعد يومين عشان كذا
وكذا..

وبعد الإرتباط بقى، بتبدأ العلاقة تتحول لمكان تاني أفضل
بكتير وبالتالي بيكون موضوع السجائر ده أهمهم عشان صحتك.
وعلى فكرة حتى لو إنت حسبتها إن هي بتتحكم (مع العلم إن
دي مش الحقيقة) فالسجائر أصلا مضره، فحاول تبطلها عشان
خاطر نفسك وصحتك أولاً..

وإنتي برضه مايقاش الموضوع يا أنا يا السجائر عشان هو
لو قادر يبطلها كان بطلها من غير ماتقولي، وبلاش تقوليله:
ريحتها بتضايقني وبتخنق، مش حرام صحتك والفلوس اللي
بتروح عالسجائر إنت أولى بيها والكلام ده لأنه حافظه وعارفه.

هي عادة سيئة جداً، فحاولي تساعديه بالهداوة وواحدة
واحدة وماتضعطيش عليه وأنا مش هقولك تعملي إيه، عشان
إنتي عارفاه أكثر مني..

بعد كدة بفترة زمنية غير محددة، عشان كل حالة وليها
ظروفها.. المهم بعد ما الولد ببدا يستقر في شغله بيحس إنه
يقدر يفتح بيت، فيتنفقوا إنهم لازم يعملوا خطوة إيجابية ويبدأوا
يفتحوا أهلهم في موضوع الإرتباط والخطوبة والجواز.

أحب بس أوضح حاجة الأول..

عُمُرُ الجواز ماكان إستقرار في شغلانة أو إنك تقدر تصرف
وتفتح بيت مادياً بس، أو إنك تستقل بحياتك ..

الجواز يعني إنك تعرف تبقى الأمان، إنك تعرف تحتوي
وتبقى أب وقت اللزوم وأخ ساعة الحاجة وكل حاجة، إنك
تقدر تفهم إن إنت مابقتش عايش لوحدهك وقبل ماتطلب
حقوقك إعمل الواجبات الي عليك الأول ..

وبالنسبة لك إنتي كمان، إوعي تفتكري إن الجواز عبارة عن
إنك تحضري حفلة سينما ميدنايت، أو إنك تعملي الي إنتي
عاوزاه من غير حساب، أو إنك تخرجي مع أصحابك براحتك.

لازم تعرفي وتفهمي إنك لازم تبقى سَكْنُهُ، يعني البيت
بالنسبale يبقى إنتي أياً كان المكان، ولازم تعرفي برضه إنك مش
لوحدهك دلوقتي وزي ما إنتي مسؤولة منه هو كمان مسؤوليتك ..

بلاش تمشوا ورا الكلام الفاضي ده:

- لازم تسيطر يااض ..
- لازم تدبحلها القطة من أول يوم جواز ..
- جوزك على ما تعوديه ..

وكل الكلام الي بيمس المنطقة دي من بعيد أو من قريب!

عشان أنا عايزك تسيطر آه، بس مش بالزعيق والحناق لأ.
بأخلاقك وحبك واحتوائك.

وإنتي عايزك تعودى جوزك آه، بس مش على تصرفاتك
وطباعك لأ. على طاعة ربنا واحترامه لأهله وليكي.

ومعاني تانية كتير جداً لسة هنتطرق ليها قدام شوية
وهنفصلها أكثر، المهم المبادئ دي لو مش عندكم يبقى إنتو
محتاجين إعادة النظر والحسابات.

رجوعاً لموضوعنا، دماغ الولد غالباً بتفكر كالاتي:

مستني لحظة معينة وحالة من الروقان والرضا عند أهله
عشان يفاتحهم في الموضوع..

ولما بتيجي اللحظة دي بيقولهم إنه عايز يتجوز ويبدأ يحكيلهم
عن تفاصيل عيلة البنت..

إنت قصدك بيحكيلهم عن البنت، مش عيليتها..

لأ أنا قصدي زي ماقلت: عيلة البنت! لأن البنت نفسها هما
بييقوا عارفين عنها شوية حاجات بحكم «التغيرات» اللي في حياة
إبنهم ومكالمات التليفون الطويلة أو هو يبقى حاكيلهم شوية قشور
عن الموضوع.. عشان كده الكلام يبقى عن أهل العروسة أكثر،
وحالتهم الإجتماعية والمادية والثقافية وكل التفاصيل من هذا النوع..

بيبدأ الأهل في المقاومة في الأول بحكم إنهم شايفينك إتغيرت
ورافضين التغير ده وبدأوا يحسوا إنك لسة صغير وبالتالي
بيشككوا في إختيارك وكل الكلام والمبررات اللي ممكن تتقال
لكن بعد الضغط عليهم وفي نهاية الكلام بيوافقوا يقررروا إنهم
يشوفوا بنفسهم.

بالنسبة للبنت، بعد إتفاق الولد مع أهله بيبليغها لأنه جاهز
عشان يكلم أهلها ويحدد معاهم ميعاد عشان يجي يقابلهم
لوحداه الأول ويرتب معاهم لقاء آخر لتعارف العيلتين.

فبتروح البنت - لوالدها أو خالها أو أخوها أو أياً كان ولي أمرها
- وتمهدله إن في عريس عاوز يتقدم وتحكيه شوية معلومات عنه
زي شهادته وشغله وعنده شقة وللالا، وعرفته إزاي وهكذا..
وبرضه أهل البنت بيبقوا ملاحظين من «التغيرات» في حياة
بتتهم..

وأخيراً وليس آخرأ بيروح الولد ويقابل أهل عروسته ويحدد
معاهم ميعاد عشان يجيب أهله ويقروا الفاتحة..

وهانحن أيها السادة في صدد مرحلة جديدة ألا وهي مرحلة
الخطوبة!!

الخطوبة..

المرحلة دي بيبقى فيها أطراف تانية غير العريس والعروسة،
وده طبعاً ليه عيوبه ومميزاته:

عيوب وجود أطراف تانية، إن لو العريس والعروسة مش
متفاهمين كفاية وواضحين مع بعض بيحصل شوية صدمات
مش لطيفة ممكن تخلينا نضطر ننزل الجنين لا قدر الله.

ومميزات الموضوع ده هي الروح الطيبة والجدعنة للشعب
المصري نفسه، بمعنى إنكم هتلاقوا الناس كلها بتقدم نصايح
وتوجيهات.. القريب والبعيد. حاولوا بقى ساعتها تعرفوا النصيحة
الصح والمفيدة، وتعملوا بيها عشان تبقى ميزة. مش عيب!!

مرحلة الخطوبة فيها شوية حكايات بتتكرر ودايماً بيتخللها
مواقف لو ماخذناهاش ببساطة بتحصل مشاكل، هنعاول نذكر
معظمها وعلى قد ما نقدر هنعلم شوية حلول من وجهة نظري..

في حاجة لا بد نفهمها قبل ما نبتدي في مرحلة الخطوبة
ومشاكلها، أجبْ أوجِه الضوء عليها في الأول.

حُكْم الأهل على أولادهم..

في معظم وليس كل الأحيان وبعد مفاتحة الولد والبنت لأهاليهم في مشوار الجواز، الأهل يبقوا واخذين موقف دفاعي حتى من قبل ما يقابلوا الطرف الثاني وده بيبقى عشان هما رسموا صورة جواهرهم وحكموا حُكم مبدأي على الموضوع بالنجاح أو الفشل أو حكمهم ده مبني على أساس قوي وهو التغيرات الي هما ملاحظينها على ولادهم..

الي أنا عاوز أقوله بقى إن التغيرات دي مش شرط بيقى أساسها الطرف الثاني وإن الموضوع معقد شوية بس لو فهمناه وبسطناه هيبقى في غاية السهولة..

أي اتنين مرتبطين ببعض عن حب يبقوا إنعكاس لبعض، بمعنى إنك فعلاً تهشوف ده بعينك لما تلاقي بتك أو إبنك بيتغيروا، سواء من الأحسن للأسوء أو العكس.. بس طبعاً ماينفعش نهمل برضه إن التغيرات دي ممكن تكون مالهش أي علاقة بالحد الي بنجبه..

هنوضح أكثر شوية..

التغير للأسوء:

لما تلاقي البنت كانت هادية ووديدة وتتحول لحد متوتر وعصبي وحادة المزاج. ودايماً مخنوقة وبدأت تَعَلِي صوتها في

البيت مثلاً، وطباعها إتغيرت والموضوع ده بقى مزمن مش ظرف وخلص.. يبقى أكيد ورا القصة دي حاجة من الإثنين:

إما إن في طَرْف تاني إحنا مانعرفوش، ليه دور حقيقي وفعال في التغيير ده. وساعتها يجب تدخل قوات حفظ السلام عشان أي تدخل غير مدروس وغير عقلاي هيخلي الموضوع يكبر ويوصل لعُند أكثر منه حب. وطبعاً في الحالة دي كل الأطراف بتبقى خسرانة.

أو إن دي فترة المراهقة المشهورة والتَمَرُدْ، وهنا لازم لازم نفهم الكلام ده، ونحاول نتجاوز شوية ونسامح شويتين ونسَمَعْ أكثر ونوَجِّهْ ونعاقب وقت اللزوم وفي أضيق الحدود..

بالنسبة للولد، لو التغيير ده كان للأسوء دايماً اللوم بيبقى على الطرف الخفي، أكيد يعرف واحدة من إياهم هية الي مبوظة أخلاقه أو ملموم على شلة فاسدة إلى آخره..

وبنعاقب عقاب شديد إعتقاداً مننا إنه لازم يبعد عن الطرف الآخر ده عشان حياته تتحول للأحسن مع العلم إن مش دايماً اللوم بيبقى على الطرف الخفي وإن برضه ممكن تكون دي فترة مراهقته أو هو نفسه محتاج إعادة توجيه..

التغير للأفضل:

أما بقى لو لقيتوا البنت بتتغير للأحسن إعرفوا إن الحب أساس التغير. بلاش تنكروا الموضوع ده وتأكدوا إنكم أستتوا بتتكم وربتوها صح، وبالتالي أحسنت إختيار الشخص المناسب اللي كان من ضمن أسباب التغير الجميل ده..

والولد، إذا التغير ده كان للأحسن يبقى عشان إحنا ريناه صح وتعبنا في تربيته وصر فنا عليه دم قلبنا وفي الحالة دي الطرف الثاني بيتلغي تماماً.

طب ما تبجوا نحسبها ببساطة..

مش معنى إن الطرف الثاني بيقى سبب في أي تغير ودوره مؤثر إن ده بيلغي وجودكم!! هما بيحبوكم جداً عشان إنتو أهلهم وسبب وجودهم في الحياة، والشقى والتعب والسهر والألم والتضحية صدقوني عاجلاً أم آجلاً هيفهموا الكلام ده وهيعوضوكم عن كل المواقف دي. فلما يتغيروا، إحتضنوهم وماتخلصو عنهم في الفترة دي بالذات، عشان هما في أمس الحاجة إليكم بس هما مش فاهمين لسة.

بلاش لما ولادكم يتغيروا للأحسن تنسبوا الفضل لنفسكم بس، وتلغوا تأثير الطرف الثاني، ولما يتغيرو للأسوأ نرمي اللوم وكل اللوم على الطرف الثاني ونلغي تأثيرنا ودورنا في التغيرات دي..

الموضوع ده حساس جداً وممكن يسهل حاجات كتير ويخليها تعدي بمرونة وببساطة من غير خلاف ويساعدنا في تقويم نفسنا وولادنا، بس لمجرد إن إحنا نعرف أساس المشكلة فين.

لأن إنت لو ضرسك بيوجعك وأصريت تعالج ظهرك وجالك دكتور عظام، عمره مايعرف يعالجك حتى لو كان أستاذ دكتور إستشاري وحاصل على الزمالة البريطانية..

إحنا ليه إتكلمنا في الحثة دي الأول؟.

عشان دايماً لما الولد وال بنت بيفاتحوا أهلهم في موضوع الخطوبة ومشوار الجواز، الأهل بيقوا ملاحظين التغيرات دي من الأول وبينكروها في حالة إنها للأسوأ، أو ينسبوا لنفسهم في حالة إنها للأحسن. وفي الحالتين بيستخدموها كدليل للحكم على الجوازة بمجرد طلب المقابلة وقبل حتى ماتحصل.. يعني من الآخر لما الأهل بيتقابلوا عشان يتفقوا بيقوا بالفعل مكونين فكرتهم الخاصة عن الموضوع.

استنوا لما تقابلوا الطرف الآخر وأهله وتشوفوا وتحكموا بنفسكم
من غير ماتخلوا الحكم ده مبني على أساس أي تغيرات حصلت
لأولادكم، وقبل ما تكونوا فكرتكم إكتشفوا الأول بنتكم أو
إبنكم متغير بسبب الطرف الثاني فعلاً، وللا للأسف العيب مش
في الطرف الآخر خالص والموضوع محتاج إعادة حسابات وإعادة
توجيه!!

أما بقى بالنسة للولد والبنت..

إنتو كمان لازم تعرفوا إن أي إعتراض من أهلكم على
تصرفاتكم، ده مش معناه إن أهلكم بيكرهوكم وعازين
يتحكموا وخلص والكلام الفاضي ده لأن مافيش أم ولا أب في
الكون بيكرهوا عيالهم..

الكلام ده بيبقى في الأفلام بس!! وحتى لو فرضنا إنه موجود
في الحقيقة، فلو لاقيت أب وأم في المليون مايبجوش ولادهم (وأنا
طبعاً مش موافق على الفرضية دي بس خليني معاكو للآخر)
فدي في حد ذاتها كمية مهملة وماينفعش نعتد بيها أبداً..

إسمعوا توجيهات أهلكم، حاولوا تفهموا إنتوا إيه اللي إتغير
فيكم قوي كده وهما ملاحظينه، ماتكابروش وتعاندوا وتكلموا
من منطق الحب فقط.. ولما تعملوا كل ده ساعتها إنتوا مدينين
لأهلكم بالشرح المفصل للإنتوا فيه..

رجوعاً لموضوعنا..

دلوقتي خلاص كل حاجة جاهزة والولد إتفق على ميعاد مع أهل عروسته عشان يجيب أهله ويقرأوا الفاتحة ويتمموا كل حاجة على خير إن شاء الله.

ميعادنا يوم الجمعة الجاية، هنبقى في إنتظاركم الساعة ٨ ودي شوية لمحات من كواليس يوم الجمعة قبل التوقيت المتفق عليه بفترة..

في بيت أهل العريس:

ياللا يا جماعة عشان مانتأخرش على الناس الساعة بقت ٢:٣٠ وإحنا لسة ماجهزناش!!

يا ابني يا حبيبي لسة بدري هنجهاز قبل الميعاد بخمس ساعات ليه؟!

عشان مانتأخرش يا بابا..

مش هنتأخر إن شاء الله، إتهدي إنت بس شوية وإهدى وماتكهربش الموضوع أكثر ما هو متكهرب أصلا..

وفي الناحية الثانية في بيت أهل العروسة:

ماما إنتي شايفة إن ٤٢ كيلو بسبوسة و ٢٥ دسطة جاتوه و ١١٢
أزازة شربات هيكفوا الناس اللي جاية؟!!

يابنتي ده العريس وباباه ومامته وإخواته الاتنين بس اللي
جايين، ده إحنا لو عازمين منطقة كاملة بكل اللي فيها الحاجات
دي هتكفي وهيفيض منها!!

ياماما أنا بس خايفة نكون ناسيين حاجة؟؟

لا يا حبيبي ماتقلقيش كل حاجة معمول حسابها..

ودلوقتي الساعة بقت ٨ وأهل العريس وصلوا بالسلامة وبعد
السلامات والذي منه، الناس قعدت ومن هنا نبدأ الجزء ده..

قاعدة التعارف..

تعالوا كده نتخيل المشهد ده..

العريس وأهله في بيت العروس يجلسون مُتَراصين بِشَكْلِ
دَائِرِيٍّ وَعُيُونَهُمْ تَتَفَحَّصُ الْمَكَانَ بِعِنَايَةٍ وَكَأَنَّكَ تَضَعُ عَيْنَهُ تَحْتَ
مَيْكْرُو سَكُوبٍ فِي أَحَدِ مَعَامِلِ أَشْهُرٍ وَأَمْهَرِ الْعُلَمَاءِ. وَهَذَا يَدْخُلُ
أَحَدَ أَفْرَادِ أَهْلِ الْعُرُوسِ

قائلاً: تشرّبوا إليه يا جماعة؟ وبعد المحايّلات الكثيرة والردود الشهيرة مثل: لا والله لسة شاربين قبل مانيجي ومتغدين كباب وكفتة وجمبري وسمك وسبيط وروحنا صيفنا في مارينا عشان شاليه الغردقة بيتعمله صيانة.. والعديد من الكلماتِ حَوْلَ ذلك النطاق والتي ليس في معظم الأحيان تعني الحقيقة كاملة، وأخيراً يطلب كل فرد مايشتهيّه.

غالباً في تلك الأونة يبدأ أهل العروس بإطلاق بعض المجاملات اللطيفة والتي تحوي في ثناياها معانٍ أخرى قائلين: أهلاً وسهلاً، منورينا والله يا جماعة. وتبدأ العائلتين بتبادل تلك الجمل حتى يقطع المشهد قُدم المشروبات الساخنة.

وفي تلك اللحظة وتحديداً بعد إرتشاف أول رشفة من النسكافية أو الشاي، يبدأ أحد أهل العريس والمكلف من قبل العريس شخصياً بالتحدث في تفاصيل الزواج بآداءً كلامه: إحنا كنا عاوزين نُطلب إيد فلانة لفلان إبننا، فشوفوا طلباتكم إليه وإحنا تحت أمركم وربنا يتمم بخير إن شاء الله.

فيأتي الرد مُسرِعاً مِنَ المتحدث الرسمي بإسم العروس، وذلك لأنه تم إنتظار هذه المحادثة مُنذُ بداية الجلسة.

قائلاً: بصوا يا جماعة إحنا بنشتري راجل، وأهم حاجة عندنا إنه يحافظ عليها ويحطها في عينه.

وعموماً بالنسبة للشبكة دي بتبقى هدية العريس للعروسة وإحنا مانقدرش نتكلم في الحقة دي.

في معظم الأحيان يتم الاتفاق على كل شيء في هذه الجلسة وذلك نظراً لأن العروسان قبل بضع أيام من إجتماع العائلتين يكونا قد رسما بالفعل هذا المشهد بمعظم تفاصيله لتجنب حدوث أي إختلاف في وجهات النظر.. ولكن بطبيعة الحال تحدث بعض الصدمات البسيطة والتي لم تكن في الحسبان، إنما في النهاية يتم الإتفاق.

والآن حان موعد قراءة الفاتحة، فنجد أحد أفراد أهل العريس ظهر فجأة من العدم قائلاً: طب نقرا الفاتحة بقى! فيأمم الجميع ويبدأون في القراءة سراً وغالباً ما يرتفع الصوت عند التصديق وهنا تعلو أصوات «الزغاريت» وتعم البهجة أجواء البيت وتأتي العروس «بالشربات» وهو المشروب الرسمي والراعي لمثل هذه اللقاءات..

وتلك النظرات المسروقة بين العريس والعروس، مع الإبتسامة العذباء والتي تنم عن الرضا والسعادة.

فقد فعلاها!.. ولسان حالها يقول: تمت بحمد الله.

وبعد إحتساء «الشربات» يأتي وقت الرحيل وبالطبع بعدما قيلت العديد من جمل الترحيب والامتنان، يهيم أهل العريس ويذهبون في سلام.

ولا ننسى بالذكر أهم لحظات هذا المشهد، بعد الرحيل..

نجد المشهد إنقسم لشقين!!

الشق الأول في بيت العروس، حيث تبدأ الضحكات والإبتسامات تتلاشى شيئاً فشيئاً ويتم إجتماع العائلة ويبدأون في طرح آرائهم وإعتراضهم على العريس وأهله مؤيدين كلامهم «بالتغيرات» التي تحدثنا عنها سابقاً.

والشق الاخر يبدأ من لحظة خروج العريس وأهله من المبنى الكائن فيه بيت العروس، حيث يبدأون في إنتقاص بعض المواقف ويضعون الأمور في نصاب معين ليس بالضرورة أن يكون صحيحاً بالمرّة. لأنهم يعتمدون أيضاً على تلك «التغيرات» في إتخاذ قرارهم.

معذرةً أيها السادة الأفاضل..

يجب في الأساس أن تبحثون عن سبب تلك التغيرات..

فإذا كانت مرتبطة كل الإرتباط بالطرف الآخر فحينها لكم مطلق حرية التصرف.

أما إذا كانت التغيرات بسبب ابنكم أو إبتكم فلا تستكبروا وتنكروا وتظلموا ولكن إستبدلوا هذه الكلمات بخير منها، ففي هذه الحالة أنتم القوامون.

لكنني لن أخوض في تفصيل هذين الشقين أكثر من ذلك لأن أبطال هذا الحدث وهما حَجَرُ الأساس ومحور الكلام، العريس والعروس، وأكاد أُجزم أنهما في قمة السعادة وعلى أتم إستعداد لأستقبال كم هائل من الشحنات السالبة بدون أي تأثير.

إذاً لماذا ذكرت هذين الشقين من الأساس؟! ليس عبثاً وإنما لشيءٍ يجول خاطري، ألا وهو:

بغض النظر عن تفاصيل الإنتقادات نفسها وماهيتها، فلا يجب عليكم الإنتقاد الآن.. دعوا الأمر يأخذ الوقت وكل الوقت اللازم.

لأن كل هذه الإنتقادات في رأيي لا أساس لها من الصحة..

وذلك لعدة أسباب:

أولاً: للحُكم على شخصٍ وإنتقاده، يجب أن تقضي معه عمراً فوق عُمرِك. فهل فعلاً تظنون أنكم إستطعتم تحليل الأمور في بضع سُويعات؟! هيهات.

ثانياً: يجب أن نُعطي أنفسنا الوقت للتفكير، فلأسف نحن لسنا مؤهلين كفاية لِتَقْبَلِ «الإختلاف» فأى شيءٍ مختلف بالنسبة لنا هذا في حد ذاته يُعتبر بِمِثَابَةِ تهديد. فيجب علينا في البداية تَعَلُّمُ كيفية تقبُّل الطرف الآخر ومن ثم نطلق أسهم النقد.

ثالثاً: حُسْن النية في مواقف كهذه له الأولوية الأولى، فأنتم
مُجْتَمِعِينَ لِعَرَضٍ فِي قِمةِ السِّمُو .

فَانْتَقُوا بِعناية وَأَحْسِنُوا الإِختِيار، نَعَم بالطبع. ولكن لا
تَقْسُوا ولا تُسَيِّئُوا الظَّن.

وهذا بالضبط ما أردت الوصول إليه بذكر الشقين من
الأساس ..

تعقيبي الوحيد على المشهد كاملاً هو لحظة تبادل العروسين
النظرات والتي معناها: تمت بحمد الله ..

كل شيء في الكون يجب علينا حمد الله - عز وجل - عليه، فنعَم
الله علينا لا تُعد ولا تُحصى .. ولكن تعقيبي سيكون حول كلمة
«تمت»، فبتلك الكلمة تُقال عند إتمام الشيء والإنتهاء منه كاملاً.
ولكن هنا - وبالذات هنا - إنها ليست النهاية على الإطلاق،
بل تلك كانت مجرد البداية ..

عودة للتبسيط ..

المشهد اللي إحنا وصفناه ده مليون تفاصيل وأحداث كثير
مش هخوض فيها لأنني في كل جزء بشرحه أو بوصفه ببقى عايز
أوصل حاجة بتبقى عنوان الجزء ده وخلاصته، وبالنسبة للحته
بتاعة قاعدة التعارف أعتقد إن رسالتي وصلت ...

هل بس هي دي الصدمات اللي ممكن تقابلنا في المرحلة دي؟
الحقيقة المؤسفة إن المشهد ده كان جزء من مرحلة الخطوبة، أو
بمعنى أصح بداية المرحلة.

طيب إيه مثلاً الحاجات التانية اللي ممكن تعمل مشاكل في
المرحلة دي؟

الشَّبَلَة... .

بعد ما الناس كلها قامت مبسوطة وإتفقوا على إن الشبكة
هدية من العريس للعروسة والحياة كانت في منتهى البساطة
والجمال، فجأة النور قطع والدنيا بقت ضلمة، وطائر الرُخ ظهر
في سماء القاهرة يُرْفِرِف بِجَنَاحَيْهِ العملاقين هادماً آمال الشعوب
ومحطماً قلوب العذارا.

ليه الكلام ده حصل؟

عشان مش معنى إن أهل العروسة كانوا ناس زوق ومحترمين
وقالولك إن الشَّبَلَة دي هديتك للعروسة، تروح إنت تجيب
حاجة كده على ما قُسِّمَ نَفَطَرُ بيها لحد ما الغدا يجهز. عشان
الشبكة بالرغم إنها ماديات وبعيدة كل البُعد عن المشاعر
ومقدار حُبك ليها، بس برضه الحب اللي بينك وبينها دا هما
مايعرفهوش.

وطبعاً بعد الحكاوي الي بنسمعها عن قصص الرجالة والي بيعملوه في بنات الناس يبقى لازم تحاول على قد ماتقدر تفهم إنهم مش ماديين ولا هييعوا بنتهم بكام ولا هما مقدرين بنتهم بالتمن ده ولا الكلام الفاضي ده. لأن إنت عُمرِك ما هتتخيل حُبهم لبنتهم يساوي إيه!!.. جملة «ولا كنوز الدنيا تساوي ظفرها» دي مش أسطورة على الإطلاق، دي تعبير مجازي لمعنى الحب الحقيقي في قلوب الأهل لعيالهم..

أنا عارف إنك شاب وفي بداية حياتك والظروف مش دايماً بتبقى في صفك.. بس كل الي بقوله إنك حتى لو مش قادر وهي دي إمكانياتك، يبقى على الأقل لازم يحسوا إنك بتعمل كل الي تقدر عليه وزيادة كمان.. ساعتها يا حلوه تشوف أكثر من الي أنت كنت مستنيه..

وبالنسبة لأهل العروسة الكرام، بنت خالتها أو أختها اللي إتشبكت بالآفات مؤلفة وشبكتها كانت الماس وياقوت ومرجان وبنتنا مش أقل من حد وكل المبالغات الي ممكن تتقال. ده مالوش أي علاقة بالعريس الجديد. كتتم قلتو الكلام ده من الأول بدل «الشبكة هديتك للعروسة»، وكتتم إتفتتو على قيمة معينة عشان الدنيا تبقى واضحة من الأول... طبعاً بتتكم لا تُقدر بهال وماحدث في الكون أحسن منها في عيونكم، بس الموضوع مايتقاسش كده خالص. كل جوازه وليها ظروفها،

بمعنى إن بنت خالتها أيوة جوزها جابلها شبكة ألماس، بس مطّلعُ عنيتها وفي خلافات دايماً. وغيرها إتشبكت بتلاتة مليون جنيه، بس العريس مش مخليكم تشوفوا بتتكم ومانعها عنكم.. وغيره من الظروف اللانهائية.

فلازم نبقى عارفين إن كل بني آدم ليه رزق كامل، في حد رزُقه ذرية كثير بس عُمره قصير، وحد تاني رزُقه فلوس كثير وذُرية كثير بس إجتماعياً ماحدث بيحبه، وحد تالت ربنا رزقه بالقبول وحب الناس ليه بس يتيم وإلى آخره.. القصة ببساطة إنكم طبعاً لازم تشوفوا غلاوة بتتكم عنده، بس بلاش المقارنة والمبالغة وبالتأكيد نصيها هيجيلها لحد عندها..

الي إحنا ذكرناه ده في حالة إن قاعدة التعارف ما تمش فيها الإتفاق على قيمة الشبكة.

طب لو إتفق الأهل على قيمة معينة للشبكة، هل ساعتها الدنيا بتبقى تمام؟

للأسف مش دايماً!

طب ليه بقى؟ إحنا مش قولنا إن الإتفاق ده هو حل اللغز؟

عشان كدة أنا قولت مش دايماً لأن في حالات بعيدة كل البعد عن البساطة والسلاسة.

فبعد الإتفاق على قيمة معينة للشبكة بينزل العروسين وجزء بسيط من الأهل عشان يشترروا الشبكة، وهنا يحصل شوية ملايسات..

يعني لو العروسة حبت تزود شوية عن المبلغ المتفق عليه لأن الحاجة الي عجبتهأ زيادة كام جرام، ماتحسبوهاش إن عنيهأ فارغة أو قاصدة تخرجكم أو مثلاً مش ملتزمة بالكلام إلى آخره من الحسابات الي ممكن تخلي الموضوع يقلب بنهاية مأساوية.. مين فيكم يا أمهات مصر الأفاضل بينزل السوبر ماركت عامل حسابه يصرف مبلغ معين ومايزودش حاجات عشان النفس إشتهتها.

الحكاية بمنتهى البساطة إنها شافت طقم عجبها قوي.. بس.

شوفتو بقى الموضوع بسيط إزاي؟

وإنتي كمان يا عروسة، هو مش بيخل عليكى ولا مستخسر فيكى أي حاجة ولا والدته قصدها تخرجك ولا كل الكلام ده خالص.

الفكرة كلها إن طبعاً دي أعظم هدية حبيبك هيجهالك عشان دي الحاجة الي هتربطكم ببعض وهتفضلتي تتباهي بيها طول العمر. ماشي ما حدش قال حاجة، بس خلي بالك إن بعد كده الشبكة دي هتبقى في بيتكم إنتم الاتنين ولو لا قدر

الله حصل ظرف هتلاقي نفسك بتبعيها عشان تقفي جمبه،
فاماتقليش أبداً عشان حتى لو كان الموضوع بسيط، هيعوضك
أضعافه صدقيني..

وهو كمان نفسه يجييك الدنيا وما فيها بس عليه ضغوط
إنتي ماتعرفيهاش عشان هو مش عاوز يخليكي تشيلي هم
وعاوزك تفرحي في اليوم ده، وغالباً يبقى هو محوش قرشين
وأهله بيساعدوه بالباقي. أو هو اللي مجمع المبلغ كله فالموضوع
بيبقى محدود شوية، وفي أطراف تانية لسة مش عارفينك ولسة
ماحبوكيش الحب اللي هو بيحبهولك ولسة كمان إحنا في البداية
وكل الكلام والحسابات دي..

أنا عارف إن الحب اللي بينكم أسمى بكتير من الماديات
دي بس زي ما قولت قبل كده وهعيد، الكلام ده بينكم إنتم
عارفينه بس همما لسة مايعرفوش. لكن الشبكة والشكليات دي
هي اللي بتظهر لبقية الناس..

شرفها قدام أهلها عشان لو عملت كده هتخليها ممكن
تتنازل عن الشبكة من الأساس لمجرد إنها ترضيك.

وإنتي شرفيه قدام أهله عشان لو عملتي كده ممكن بيع
أعضائه عشان بس يشوف إبتسامتك.

وبرضه زي ما كنت بقول قبل كده إن لو العريس والعروسة
مش متفاهمين هتحصل حاجات مش لطيفة، ولو متفاهمين يبقى
كل الكلام ده هيعدي بمنتهى البساطة..

بعد ماجبنا الشبكة الحمد لله وكل حاجة تمام زي ما إتفقنا
نعمل بقى حفلة الخطوبة ونفرّح الناس كلها معانا. ولا إيه؟

حز القاعة وحفلة الخطوبة..

حفلة الخطوبة بتبقى نوع من إثنين:

يا إما حفلة في البيت عالضيق ويبقى فيها الأهل والأصدقاء
المقربين، أو حفلة في قاعة وساعتها بتبقى هيصه والكل بيقى
معزوم طيب إيه بقى الملابس اللي ممكن تحصل هنا؟؟!!

طبعاً أنا مش هقول حاجة لأن كل الأفلام والمسلسلات والبرامج
الكوميدي هرسن الحقة دي ميت مرة بداية من تنقية القاعة وعدد
المعازيم وكام واحد هيتعزم من أهل العريس وأهل العروسة
وإشمعنى أهل العروسة أكثر أو العكس.. وإنتهاءً بالمعازيم نفسهم
ومين جه ومين ماجاش والبوفيه وإن طبعاً مهما كانت القاعة شيك
والناس كانت فرحانة لازم تلاقي تعليقات سلبية سخيفة وخلافه..

فأنا بصراحة أعتقد إن الجزء ده بالذات الناس كلها عندها
خلفية عنه وخبرة كفاية عشان اليوم ده يعدي بسلام.

بس الجدير بالذكر هنا فرحة العروسين ساعتها لدرجة إن
الوقت يقف في اليوم ده بالنسبالمهم وبيبقى في شوية أحاسيس
ومشاعر لازم نتكلم عنها شوية..

فاكرين لما كنت بكلمكم عن مثال التيشيرت الجديدة؟

وقلتكم إن أي حاجة جديدة بيبقى ليها بريقها ولمعانها؟

بمعنى إن أي حدث أو حاجة جديدة في الأول بيبقى الموضوع
مختلف تماماً، صح كده؟!

طيب أنا ساعتها مافسرتش الحكاية دي وإكتفيت بالمثل بس
عشان أوصل لحاجة معينة فكان الكلام مقتصر على الموقف ده..
دلوقتي بقى هنفسر شوية أكثر، وهنعمم الموضوع ونتكلم
عن أي حاجة أو حدث أو إحساس جديد بيحصل لأول مرة..
أول مرة..

الكلمة دي جميلة جداً لأن دائماً وأبداً ما يكون الحدث أو
الإحساس اللي بيحصل لأول مرة ده ليه طعم تاني خالص
مختلف عن أي إحساس حسيته قبل كده..

تعالو كدة نحاول نوضح بشوية أمثلة:

فاكر أول مرة شوفت فيها عروستك؟ حتى قبل ماتكلمها،

فاكر الإحساس اللي إنت حسيت بيه ساعتها؟

طب إوصفلي كده إحساسك وفرحتك لما كلمتها أول مرة!!

وإنتي فاكرة أول مرة شوفتيه وهو يقرب عليك من بعيد؟!

ولما قرب وبدأ يتكلم معاك، كان بيكلمك وهو متوتر

وملخوم؟!

فاكرة؟

طب إوصفلي إحساسك كده لما أول مرة سمعتي منه كلمة

وحشتيني؟

أو لما أول مرة تشوفي قلقه وخوفه عليك باين في عينه

ومكالماته لما كتتي تعبانة!!

أول مرة تطبخي في بيتك..

أول مرة تسافروا فيها مصيف لو حدكم..

أول مرة..

تعالو نرجع بالزمن ورا شوية..

فاكر أول مرتب تقبضه من شغلك؟

وشعورك بنظرة الفخر في عيون أسرتك لما تجيلهم أي حاجة

مهما كانت بسيطة من المرتب ده؟

طيب فاكر أول مرة باباك يطلب منك طلب ويقولك الجملة

دي «أنا متأكد إنك هتعرف تعمل الحاجة دي»

وفعلاً تعملها على أكمل وجه وتكون قد ثقته؟

وإنتي فاكرة أول مرة إشتريتي فيها حاجة من حر مالك كان

نفسك فيها جداً؟

ولا إحساسك مثلاً لما تساعدي مامتك في أي حاجة وتلاقيها

بتشيد بيكي بكل فخر قدام الناس!!

وطبعاً كل ما نرجع بالزمن أكثر هنلاقي كلمة «أول مرة» دي

بتتكرر معنا طول سنين حياتنا لحد مانوصل لمرحلة الطفولة..

طيب إحنا دلوقتني قدرنا نفهم إن إحساس الحاجة أول مرة

دايماً يبقى ليه بريق خاص..

دلوقتني بقى نرجع للعروسين في حفلة الخطوبة سواء كانت

في البيت أو في قاعة..

لحظة ظهور قصة حبهم للعلن قدام كل الناس..

أول مرة يبقوا واقفين جنب بعض كده من غير أي خوف
ولا توتر، وقاعدين على الكوشة وإيديهم في إيدين بعض عشان
يعلنوا للدنيا كلها بداية مشوار الحياة.

المهم في الأمر إن أول مرة دي ممكن تفضل تتقال العمر كله..

والأهم إنكم تعرفوا إزاي تقسموا «أول مرة» على عمركم،
عشان دايماً تشوفوا بريق الكلمة دي. وكان عشان الإحساس ده
فعالاً مايتشبعش منه!!

إيه تاني من الصدمات اللي ممكن تبقى أبسط وتعدي؟؟

العزومات..

هتفرق في إيه مين إتعزم عند مين الأول؟

هتفرق في إيه كام عزومة إتعملت؟

هتفرق في إيه لو ماحصلش عزومات أصلاً عشان الوقت

كان ضيق أو لأي ظروف تانية؟

حد عنده رد مقنع للتساؤلات دي؟

طيب أنا هحاول أبسطها لكم..

طبعاً لما بتحصل لقاءات ده بيخلي الأهالي يتعرفو على بعض أكثر ويتعاملو مع بعض في مواقف أكثر والقلوب تتآلف والمسافات البعيدة تقرب وحاجز الرسميات يبدأ يتكسر واحدة واحدة..

ده بيحصل لما الطرفين يبقوا فاهمين كويس قوي إن مافيش حد فينا شبه الثاني وطريقة حياتي تفرق كتير عن طريقة حياتك.

بس للأسف مش كل الناس بتحسبها كده وبيبقى في شوية شوائب ممكن تعكر كباية العصير دي..

زي مثلاً: جابو إيه معاهم وهما داخلين علينا البيت!! وإتأخروا عن ميعادهم خمّس دقيقة ودي مش أصول إحنا مش تحت أمرهم!! وقاعدتهم طولت قوي ومش محترمين البيت!! وغيرها من التصرفات اللي بيبقى أساسها إختلاف طباع مش أكثر.

إختلاف الطباع ده مش معناه إن حد كويس وحد وحش، الموضوع ومافيه إننا محتاجين نيسّط الأمور شوية ومانديش حاجة أكبر من حجمها الحقيقي.

المقصود هنا إن مثلاً لو حد إتأخر عندنا في البيت، هل دي تبقى حاجة حلوة ولا وحشة؟

بالنسبة لناس بتحب السهر، يبقى أكيد دي حاجة حلوة.

وبالنسبة لناس بتنام بدري، دي قمة قلة الذوق.

وبالنسبة لناس عَشْرِيَّة وبتحب اللمة، يبقى دي حاجة حلوة جداً.

وبالنسبة لناس طول عمرها عايشة في هدوء وبتحب النظام، يبقى أكيد دي حاجة مزعجة جداً.

وناس تانية وآراء تالته وإفراضات لانهائية..

هقتبس من أينشتاين الفكرة العامة لنظريته «النسبية» وهقول إن مافيش حاجة مُطلَّقة إلا وجه الله عز وجل، إنها غير كده كل حاجة بتبقى نسبية وعلى حسب إنت بتقارن إيه بالنسبة لإيه. بمعنى إن مافيش حد ذكي ذكاء مطلق، على حسب إنت بتقارنه بمين..

بواحد أذكى منه؟

ساعتها يبقى لأ مش ذكي قوي.

ولا بتقارنه بواحد أقل من نسبة ذكائه؟

في الحالة دي يبقى أيوة ذكي.

وهكذا..

ذكرنا قبل كده فيما سبق إن إحنا ماعندناش خبرة تقبل

الإختلاف.

تعالوا نبتدي من دلوقتي نثق إن زي ما كل شخص على
كوكب الأرض ليه بصمة معينة بتميزه لوحده وعمرك ما
هتلاقي بصمتين متطابقين، زي ما بالضبط ما فيش شخصيتين
زي بعض في الكون..

ولو قدرنا نفهم ده كويس هنلاقي في مواقف كتير بقى ليها
حسابات تانية خالص أبسط مما كنا نتخيل..
أحب أوضح حاجة..

الفطرة دي حاجة عندنا كلنا، يعني فطرة الجوع والمشى
والنوم وكل الحاجات دي فطرة مش طبع..
وكلامي في إختلاف الطباع والشخصيات وخلافه مش في
الفطرة خالص. لأ ده عن الطباع زي الغيرة والترتيب وطريقة
التفكير وهكذا.. الطباع اللي ممكن تتغير!!

الدراجات..

الجزء ده مافيهوش كلام كتير لأن معظم المشاكل هنا بتبقى
بين العروسين نفسهم عشان بعد ما الحكاية كانت عبارة عن
«ماتيجي نخرج النهاردة؟» والموضوع انتهى. لأ ده بيتحول لمنطقة
تانية خالص لأن دلوقتي وخاصةً بعد الخطوبة بيبقى في إعتبرات
تانية لازم تكون في الحسابان..

يبقى غالباً المقابلة يوم الجمعة فقط أو الأجازة الرسمية أياً كانت، ولازم تتطلع تسلم على أهل خطيتك الأول قبل ماتخرجوا، ولازم ترجعها البيت بدري في ميعاد معين مع العلم إنكم قبل الخطوبة كان في سماحية أكثر في الوقت وهكذا من القيود اللي لو قدرنا بس نفهم شوية إعتبرات هنلاقي كل حاجة بتعدي ببساطة..

من كتر ما الأهل بيسمعوا قصص كثير قوي عن الشباب الغير محترمة اللي بيتسلى بنات الناس، أصبح الخوف على بنتهم مابقاش بس من حوادث السرقة والخطف وخلافه واللي ممكن تحصل لأي حد ومن أي حد غريب.

لأده الموضوع تتطور لدرجة إن هما بيبقوا خايفين عليها منك إنت شخصياً، لازم يبقى في مواعيد عشان تبقى عارف كويس إن الدنيا مش سايبه وإن إنت لو فكرت تضايقها هتلاقي حد ياخذ حقها منك وكل التصرفات غالباً تبقى تحت البند ده.. بند الخوف والقلق.

وعشان كمان لو إنت طلعت لا قدر الله من الشباب اللي محترف خطوبة بس يبقى بنتهم ماخسرتش كثير لأنها مالحقتش تتعلق بيك قوي، فتكسر قلبها..

هما ما يعرفوش مدى الحب اللي بينكم زي ما قولت قبل
كدة، فحاول على قد ماتقدر تبينلهم ده بأفعالك وتصرفاتك
وحتى كلامك وتخليهم يثقوا ويصدقوه من كل قلبهم.. إعمل
ده الأول قبل ماتفكر تعترض وخلاص ولازم توصل الكلام
ده لخطبتك برضة عشان هي كمان بيبقى جواها كلام كتير
مابتقدرش تقولهولك، فطمن قلبها وخليك سهل وبسيط معاها
هتلاقي واحدة واحدة الموضوع بقى في مكان تاني خالص..
وصدقني يا عريس الموضوع لو كان أمان كانت الحكاية
هتبقى مختلفة تماماً، وكنت هتشوف ده بنفسك.

بس ماينفعش بعد كل الحكايات المرعبة اللي بنشوفها وبنسمعها
في برامج التليفزيون وبنقراها في الجرايد يومياً، يكون رد الفعل
عالكلام ده إن الثقة لسة موجودة عادي وما فيش مشكلة نجوز بنتنا
لأي شاب وخلاص. ما الناس كلها حلوة وما فيش نفوس مريضة
ولا أي حاجة من الكلام ده.. ولا إنت إيه رأيك؟

إلتزم مع أهل خطبتك يا عريس، وإنتي يا عروسة إسمعي كلام
أهلك وتأكدي إن هما خايفين عليك ووصللي الكلام ده لخطبتك..

دلوقتي بقى إحنا عدينا الكارثة ودفعنا ومسكنا الطريق
الحمد لله.

الطريق ده، في شوية مطبات...

بس مش مطبات عادية، دي مطبات الأهالي اللي بتقطع
وسط العربية اللي بتلاقيها غالباً في المناطق السكنية وقدم
الورش. تلاقي المطب إرتفاعه ٤ متر وعشان تعديه لازم تركيب
طيارة لجنوب شرق آسيا، وتعمل ترانزيت عندنا في الصالة
وتاكلك لُقمة تُرْمُ عضمك، ولا عايز الناس تاكل وشنا!! وبعد
كده تكمل طريقك عادي.

المهم في المرحلة دي بتحصل شوية مناورات ومناوشات نقدر
نقول إنها بهارات المرحلة..

مرحلة إيه؟!

التجهيز للجواز..

طيب، هتكلم دلوقتي عن أكثر المواقف الصعبة إنتشاراً في
المرحلة دي.

مدرحة تنقية العفشة

والدة العريس بتحب الصالونات المدهّبة، ووالدة العروسة بتحب الأتريهات المفضضة، والعروسين بيحبوا حاجة تالته خالص..

فلو رأي والدة العريس إتنفذ يتقال إن الولد ده قراره مش من دماغه والعروسة تقوله إشمعنى كلام مامتك اللي يمشي، ووالد العروسة يقول: لأ طبعاً مش هينفع الكلام ده، وعم عبده البواب يقول: مين اللي هيحاسب عالمشاريب؟

ولو رأي والدة العروسة هو اللي إتنفذ يتقال إن العريس مراته اللي ممشياه، ده هيتعب في حياته جداً بعد كده وخللي بالك يا بنى عشان البنت دي شكلها وذنّية وبتسمع كلام مامتها في كل حاجة..

ولو العروسين جابو اللي هما عايزينه يتقال: إنتوا ما بتكبروش حد، وإحنا نفسنا نجيلكم أحسن حاجة والخشب يقى زان والستاير حرير والسجاد مش عارف إيه والنجف كريستال وألماس..

وفي اللحظة دي أصبح جحا هو الفيصل!!

فاكرين حكاية جحا وإبنه مع الحمار؟!

لازم نعمل جلسة تحضير أرواح عشان نشوف جحا رأييه إيه
في موقف زي ده، وينصحنا نتصرف إزاي.

يالانا نعمل دايرة ونمسك إيد بعض ونغمض عيننا ونقول:
زولينار فاي سول (أي كلام فارغ)، إثنين وتسعين مرة..

يعقب ذلك لحظات من الصمت، والقلق تفوح رائحته من
جميع الموجودين، والعيون تجول المكان في إنتظار حدوث ما
سيكون.

وهنا ينتشر الدخان ويبدأ المكان في الإهتزاز بشدة وصرخات
الخوف تملأ أرجاء الغرفة والإضاءة تتحول من اللون الأبيض
للون الأحمر شيئاً فشيئاً. ويعلو صوت ضحكات قادمة من
بعيد وفجأة تتوقف الضحكات

ويقول الصوت: سامو عليكو!!

إيه ده؟! لأ إحنا كده حضرنا «اللمبي» مش جحا خالص..

لامؤاخذة يالمبي إحنا كلنا بنحبك بس كان حد تاني هو
المقصود.

طب معلش ثواني كده أراجع التعويذة..

إحم إحم معلش إحنا هنعيد التعويذة تاني..

يلا هنعمل نفس الدائرة وهنمسك نفس الإيديين ونغمض
عينا ونقول بصوت عالي: زولينار فاي سول مرتين بس..

نفس الدخان والإضاءة الحمراء.

بس المرة دي صوت الضحكات مختلف..

ثم تتوقف الضحكات ويقول الصوت: من الهاتف الداعي؟.

فأرد أنا: مين معايا؟

فيرد الصوت: إنت اللي متصل، فقول إنت عايز مين وعايزه
في إيه بدل ما قفل السكة!!

أنا: كنت عايز أكرم جحا الله يخليك عشان عاوزه في موضوع
كده..

فيرد الصوت: جحا معاك.

... صوت موسيقى النصر في فيلم الطريق إلى إيلات...

والسعادة تغمر المكان وها قد حضر جحا ونجحت التعويذة
وحان الوقت للإجابة على التساؤلات.

أنا: لقد جئنا بك اليوم يا جحا لأنه وبعد مرور العديد
من الأعوام مازالت هناك أحداث متشابهة بين زماننا وزمانك،
فأردناك أن تجاوبنا وتعطينا الحكمة..

جحا: كلي آذانٍ صاغية.

أنا: كانت هناك حكاية لك مع ولدك وكان معكما حمار،
وتلك القصة من العديد من القصص الواعظة لك والتي
إنتشرت على مَرَّ الأزمان..

نريد منك أن تروي لنا الحكاية وتخبّرنا كيف نتصرف في
موقف كهذا..

جحا: كنت ذات يوم ذاهباً للسوق بصحبة ولدي وكان معنا
حمارنا، وبطبيعة الحال كنا نسير على أقدامنا ونتبادل أطراف
الحديث غير مهتمين بالركوب على ظهر حمارنا، فقد أخذنا
الحمار لنحمل عليه البضائع في رحلة العودة..

وفي طريقنا مررنا بمجموعة من القوم، فما كان بهم إلا أن
ضحكوا علينا وسَخِرُوا منا قائلين: أنظرا إلى هذان الرجلان
الأغبياء، يسيران على أقدامهم بدلاً من الركوب على حمارهم..
فجعلت ولدي يركب الحمار وأكملنا طريقنا في سلام..

بعد ذلك بعدة أقدام وجدنا قوم آخرون يقفون في الطريق،
فإذا بهم ينهرون ولدي قائلين: يالك من إبنٍ جاحد، أتركب
الحمار وتترك والدك المُسنُّ الضعيف يمشي على قدميه؟!!

فأنزلت ولدي وركبت أنا كي لا ينهره أحد..

فإذا بمجموعة من النساء يرونا، وبمجرد مرورنا بهم إذ هم
يتهامسون قائلين: أنظرا إلى هذا الأب القاسي، يركب هو الحمار
وقد بلغ من العمر أشده وهو قوي البنية، ويترك إبنه المسكين
الذي لا حيلة له يمشي على قدميه. ياله من ولدٍ مسكين..

فقررت أن أركب أنا وولدي على الحمار فهذا هو الصواب بعينه..

وإذا بسيدةٍ مُسنّةٍ تُمّر بنا، فتستنكر قائلة: ما ذنب هذا الحيوان
الهزيل ليتحملك أنت وولدك!! أليس في قلوبكم أي رحمة؟!
وفي تلك اللحظة بالذات أدركت شيئاً في غاية الأهمية..

فألثفت لولدي وقلت له: مهما فعلت يا ولدي فلن تستطيع
أن تُرضي جميع الناس..

فأجتهد وأبحث عن الصواب، ستجده دائماً في طاعة رب
الناس. وما دمت في طاعته فلا تسعى أبداً لإرضاء أي مخلوق.
أنا: ونعمَ بالله ياعم جحا..

ومن هنا ياجماعة لازم نفهم إن عمر الواحد مايرضي جميع
الأطراف، وطالما إحنا ما بنعملش حاجة تغضب ربنا، وكل
الإختيارات بس مجرد إختلاف آراء وثقافات يبقى لازم نوضح
حاجة مهمة جداً..

لازم يا عريس إنت وعروستك تكونوا أذكاء كفاية وتفهمو
إن أهلكم عندهم خبرة سنين، ويعرفوا أكثر منكم بكثير.

ده هيفيدكم جداً في تنقية نوع العفش وخامته، هما عارفين
الزان والأرو وإيه اللي يستحمل وإيه اللي مايستحملش.

هما لما يقولو كده مابيقاش الغرض من كلامهم بس إنهم
يفرضوا رأيهم، الموضوع ببساطة إنهم ينقلو لكم خبرة إكتسبوها
في سنين ومش هيقدرؤا يفهموها لكم في مجرد يوم. عشان كدة
الموضوع ببيان على إنه فرض رأي.

اسمعوا كلامهم وفكروا فيه وادرسوه وشوفوا فين الصح
وإعملوه..

وبالنسبة للأهالي الكرام، ولادكم خلاص كبروا وبقى ليهم
وجهة نظرهم ورأيهم الخاص.

طبعاً عمرهم ما هيكبروا عليكم وهيفضلوا طول عمرهم
عيالكم، بس لازم تبدأوا تسيوهم حرية الإختيار لأن ده هينمي
عندهم تحمل المسؤولية والاعتماد على النفس. وده بالضبط اللي
إنتم هتحتاجوه لما تكبروا عشان تتعكزوا وتتسندوا عليهم...

استسمح أهلك يا عريس، وإنتي يا عروسة طيبي خاطر
أهلك..

إسمعوا منهم وخذوا رأيهم في كل حاجة وشاركوهم، بلاش
تحسبوهم إن مشوار كفاحهم عشان يربوكم إنتهى كده بمنتهى
السهولة.

بس لازم القرار يبقى ليكم في الآخر عشان السكة لسة
طويلة قوي..

قاطعني جحا قائلًا: لقد أعطيتك ما سألتني، وحكيت لك
إحدى قصصي.

والآن حان دورك لتقص علي ما لا أفهمه.. فقد أثرت فضولي
لمعرفة ما يدور!!

أنا: بالطبع يا جحا.

تبدأ الحكاية منذ أن رأى ذلك الشاب تلك الفتاة ووقع في
حبها..

وبدأت أروي حكايتنا وسبب مجيئنا به من الأساس..

رفع جحا حاجبيه قائلًا: لقد أصابني الدهول!!

حيث كانت الحياة في زماني في غاية البساطة وكنت أحسبها
ليست كذلك، ولكن بعدما سمعت حكاية هذا الزمان أدركت
أنني كنت مخطأً تماماً..

فكلما آلت الأمور للبساطة، كلما إقتربت من نصابها
الصحيح ..

أنا: صدّقت يا جحا وأشكرك على نصائحك الغالية، وأتمنى
لو كانت الأمور كذلك في زماننا..

يبقى الحل إيه في موضوع تنقية العفش؟

الحل إن إحنا طالما ما بنعملش حاجة تغضب ربنا، يبقى لازم
يا عريس أنت والعروسة تنقوا وتختاروا وتأخذوا رأي أهاليكم..
والقرار في الآخر ليكم.

نيجي بقة لمرحلة تانية ودي آخر مرحلة من مراحل التجهيز
وبعد كدة كتب الكتاب والجواز نفسه..

مرحلة فرقة العفش..

فاكرين مميزات الشعب المصري الي أنا قولتها بإختصار قبل
كده؟؟

بتظهر بوضوح في المرحلة دي..

بمعنى إنك بتلاقي الناس كلها حواليك ومش سايباك، فلو
مثلا عندك شغل ومش عارف تأجز بتلاقي ١٠٠ ألف واحد
يسد عنك، ويشوفك عاوز إيه، ويروح هو المشوار ده مكانك

وهكذا. والعروسة وهي بتفرش بتلاقي الناس كلها واقفة جنبها وبتساعدھا، ولو عايزة تنزل تجيب حاجة بتلاقي تلاتة مليون واحد يعرض خدماته، أو مثلاً لو حبت تغير نظام الشقة وكل الحاجات من هذا القبيل.

فعلاً والله شعب طيب وجدع ومتعاون بطبعه، قمة العظمة..

وعلى فكرة لو ما حصلش الكلام ده معاكى أو معاك ماترعلوش أبداً، عشان ربنا شايلكم حاجات أجهل من كده بكتير وهيقف جمبكم في مواقف تانية تفوق الخيال..

مرحلة فرش العفش دي بتبقى مرحلة مليانة توتر وقلق عشان خلاص دي آخر محطة قبل الجواز..

فغالباً الولد بيبقى مستعجل وعايز يخلص من كل التفاصيل دي عشان يرتاح وعشان هو مش متعود على كمية التفاصيل بتاعة الستائر تتعلق إزاي، ومفرش العروسة، والسفرة مكانها يبقى فين أشيك، والديكورات تتوزع إزاي في الشقة، وكل التفاصيل من هذا النوع..

هو بيبقى شايف إن كل دي شكليات عشان ربنا خالق طريقة تفكيره كده، يعني ممكن الكلام ده كله يتعمل بعد الجواز عادي من وجهة نظره!! مش سطحية منه على قد ما هي طريقة تفكيره في الإنجاز من غير تفاصيل..

أما العروسة يبقى ده بالنسبالها حلم العمر ولازم يبقى على
أتم وأكمل وجه، عشان هي طريقة تفكيرها اللي ربنا خالقها
بيها كده.. كل لما كانت بتشوف حاجة عاجباها في بيت حد أو
في تفصيلة في مسلسل أو فيلم بتقول في دماغها: لما أتجوز هبقى
أعمل كده في بيتي.. ده برضه مش تفاهة منها على الإطلاق، ده
حلم حياتها!! عش الزوجية..

هي بتفكر بمشاعرها وهو تفكيره عملي، والإثنين صح،
والإثنين بيكملوا بعض..

ماينفعش يبقى الموضوع عملياً بس من غير مشاعر لأنه
هيبقى جاف وخاوي و«لوح ثلج» ولا ينفع إنه يبقى بس
بالمشاعر. وزي ما هنقول بإستفاضة بعد كده: الموضوع محتاج
القلب والعقل، مش القلب بس ولا العقل لوحده..

يبقى يا عريس، قدر تعبها في فرش الشقة وأقف جنبها
وطمنها عشان هي بتبقى في قمة توترها إنها مش هتلتحق
تخلص كل التفاصيل اللي عايزة تعملها، ومتوترة من إحساس
الجواز نفسه وإنها خلاص مش هتبقى في بيت أهلها بعد كده
وهتبقى ليك لوحدهك وعندها مليون سبب يوترها.. هي خايفة،
وجداً كمان..

إحتويها يا عريس، وإديها وقتها ومساحتها وماتبقاش إنت كمان
سبب من أسباب توترها.. خليك إنت السبب في راحة قلبها..

وإنتي يا عروسة، هو تعبٌ جداً في مشوار الشبكة والشقة
والعفش والنجف وكل الكلام ده (وإنتي كمان تعبتي أكيد، بس أنا
بتكلم عليه هو دلوقتي فخليكي برة الكلام لو سمحتي، ماشي؟!)
وهكذا من الضغوط اللي بتبقى عليه من البداية.. فهو خلاص
بيبقى هلكان ومستني اللحظة اللي هتبقوا فيها لو حدكم وتستقلوا
بحياتكم، فمممكن طبعاً تلاقيه بيستعجلك وشايف إن اللي إنتي
بتعمليه ده تضيع وقت.. حاولي تفهمي إنه بيحبك، وقد إيه هو
تعب عشان تبقوا في المكان ده دلوقتي وحارب عشانك بكل قوته،
سواء الظروف الصعبة بقى أو كل اللي إنتي عارفاه.. فواحدة واحدة
عليه وبلاش إتهامك ليه إنه بيقلل من المجهود اللي إنتي بتعمليه،
لأ أبداً حتى لو كان ده الظاهر ليكي..

هو بس تعب خلاص وعايز يستقل بحياتكم ويشيل
المسئولية أكثر عنك ويهنيكي، لأنه هو كمان تعبان لتعبك..
خلاص هانت يا جماعة، واليوم مهما طال هيخلص وينتهي..
والفترة مهما طولت ليها نهاية برضه..

كل حاجة هتخلص زي مانتوا عايزين وأكثر كمان حتى لو
اللي ظاهر مش كده، تأكدوا من الموضوع ده..

وخليكوامع بعض مش ضد بعض عشان الحياة تبقى
أسهل وأبسط، واعرفوا إن بداية الاحتواء الحقيقي بيبدأ بالضبط
في المرحلة دي وبيظهر بشدة..



دلوقتى بقى وصلنا للمرحلة الكوميو، اللي دايماً بتسبب الذعر
والهلع للناس كلها...

الناس كلها حذرتني أروح هناك قالتلي إن في مارد عملاق
مايسبش حد في حاله..

قالولي كلام كتير عنه بس أنا كنت خلاص قررت أروحله
بدافع الفضول وعشان أنا متأكد إني غير الناس كلها وهقدر
أواجهه وأهزمه كمان، وأشوف العالم اللي وراه...

أنا وصلت للمكان على الوصفة تمام..

الوحش واقف هناك أهو، بينفخ نار من بقه وغضبان ورائر
جداً..

واقف زهار على تبة عالية وبينى وبينه جسر خشب على
وشك الإنهيار.

وفجأة الأرض بتترج تحتي من دبذته عليها والجسر بدأ
ينهار فعلاً، جريت عشان أنجو بحياتي بس وأنا في نص المشوار
إكتشفت إني بجري في الإتجاه الغلط.

لاقيت نفسي بجري في إتجاه المارد نفسه..

بصيت ورايا وحاولت أرجع بس للأسف كل خطوة جريتها
خلاص مابقاش ليها رجعة عشان الجسر بيتدمر تحت رجلي..

بدأ جسمي يفرز كميات ضخمة من الأدرينالين لأنني لاقيت
إني لازم أكمل جري ناحيته عشان لا بقی ينفع أرجع، ولا كمان
ينفع أفضل واقف مكاني وإلا هقع أنا والجسر..

فضلت أجري بعزم ما فيا، وبكل جهد لغاية ما خلاص
بقيت شايف الأرض بعيني...

بس سرعتي مابقتش مساعداني الجسر كان بينهار أسرع مني...

خلاص مابقاش ينفع، إستسلمت وقلت خلاص..

مابقاش فعلاً ينفع...

كل حاجة خلاص إنتهت..

كل تعبني خلاص مابقاش ليه لازمة..

كل حاجة خلصت خلاص...

خلاص...

لأ مش خلاص..

لسة في أمل..

أنا ممكن أنط!!

أيوة ممكن أجمع كل قوتي وأنط لفوق...

وبكل ذرة طاقة في جسمي وكل وآخر لحظة أمل نظيت..

بس للأسف ماوصلتش...

وساعتها عرفت وإتأكدت إن دي نهاية رحلتي..

لكن في اللحظة دي حسيت بحاجة بتمسك إيدي..

حاجة قوية جداً بترفعني لفوق لغاية ماوصلت...

أخيراً عدت الجسر...

أنا لسة عايش، أنا لسة حي...

وبعد لحظات السعادة المفرطة دي لمست الأرض تاني ولقيت

نفسي واقف وجهاً لوجه قدام الوحش..

مابقاش قدامي حل غير المواجهة..

مابقاش عندي أي إختيار..

بس أنا تعبان وماعنديش أي ذرة مقاومة ما بقتش خلاص
قادر...

إيه ده؟!!

لحظة واحدة...

الوحش أنقذني ليه?!!

يمكن هو مش شرير زي ما أنا كنت متخيل؟؟!

يمكن شكله وكلام الناس عليه هو اللي مخوفهم منه ويكون
ورا المظهر المرعب ده حاجة تانية إحنا مش عارفينها؟؟!

أو جايز تكون كل دي تهيئات وهلاوس؟؟!

وكان في دماغي استفهامات وأسئلة كتير بس كنت واقف
ساكت وبا صُبله في عينه في انتظار المصير المحتوم..

فضلت منتظر...

مافيش حاجة حصلت...

وطال إنتظاري وبرضه مافيش أي حاجة...

ومع الإنتظار حسيت إنه هو اللي مستغرب وكأنه مستني
يشوف قراري!!

عنيه على قد ماكانت واسعة ومرعبة على قد ما كانت
بتقول كلام كتير لخبطي حساباتي كلها، ووصلتني إشارات منه
وكانه عايز يقول:

عرفت إني مش عاوز أذي حد؟؟

أنا واقف هنا من قديم الأزل..

وكل شوية حد يجي ويحاول يعدي الجسر..

في منهم اللي بيخاف يعدي وييلف ويرجع من قبل حتى
مارجله تلمس الجسر من الأساس..

وفي منهم اللي بيجري ناحيتي وكل لما يقرب مني أكثر يتوتر
ويخاف أكثر ويبدأ يتراجع سنة سنة لحد ما الجسر يقع بيه..

وتانيين بيوصلولي بس بعد كده بيسيوني ويمشوا..

إنت بقى أنهي نوع فيهم؟؟

قررت أجمع شجاعتي وأخيراً وقفت وقفة الفارس بعد
ماكنت برتجف من الخوف، ونظراتي بدأت تتحول لثقة بعد
ماكانت رعب وفزع..

أنا فعلاً ما بقتش خايف..

أنا دلوقتي بس عرفت وإتأكدت إن كلام الناس كان كله
غلط في غلط..

فجأة الوحش فتح فكه على آخره وقرب ناحيتي...

شكلي كنت فاهم الموضوع غلط ولا إيه؟!

كلام الناس طلع صح ولا إيه؟؟!

غمضت عيني وما بقتش عارف أعمل إيه تاني...

لاقيته شالني وعداني التبه...

أنا طبعاً ما صدقتش نفسي وفي الأول كنت بزحزح رجلي
واحدة واحدة وبعدين بدأت أسرع مشيتي وإنطلقت بعدها..

لفيت وبصيت عليه وأنا ببعد عنه وكان فيه فكرة واحدة
مسيطرة على تفكيري ساعتها...

الوحش ده إحنا اللي بنخلق الخوف منه في خيالنا...

هو موجود بالفعل بس مش لازم نخاف منه أبداً...

زي بالضبط الجبل!!...!!

موجود...

وكبير وضخم جداً بس عمره ماهياً ذيك إلا لو إنت اللي
إخترت تنط من عليه..

وساعتها لا تلومن إلا نفسك...

نظرت إلى الوحش نظرة وداع ثم مضيت في طريقي..

وقررت أن أمضي وأكتشف ما يوجد في هذا العالم الغريب
الذي يوجد خلف ذلك الوحش...

ومع كل خطوة أدنوها اتجاه هذا العالم، يزداد بؤبؤ عيني
إتساعاً...

ما هذا المنظر الخلاب وكأنني أرى لوحة فنية مرسومة بدقة
وعناية شديدين وليست من صنع إنسان..

فكانت السماء بلونها الأزرق الرائع والسحب فيها ترسم أروع
الأشكال وأشعة الشمس الدافئة تداعب الأزهار بألوانها الزاهية
والموجودة في تلك الحديقة الشاسعة الممتدة إلى الأفق وكأنها
تلامس السماء..

هكذا كنت أتخيل العالم ما وراء الوحش فيجب أن يكون
كذلك فإن لم يكن كذلك!! إذاً لماذا يسعى الجميع إلى الوحش
ليصلوا إلى ما وراءه بجنون؟! لماذا يتقاتل الجميع ويسردون
الحكاوي والأساطير حول هذا الوحش وما خلفه؟؟

فها أنا إنتصرت عليه ولكنني لم أجد أي عوالم مختلفة عن
عالمنا...

نفس العالم نفس الناس، نفس كل شيء...

فأكملت مسيرتي هائماً نادماً، وأصبح اليأس والإحباط من
أخلص رفقاء الطريق... ولما دق الإرهاق باب جسدي، جلست
لأستجمع قواي وإتكأت برأسي على يدي.. فقد خاب ظني...
وفي تلك اللحظة عينها، وجدت ملمساً ناعماً يمسك يدي
فرفعت رأسي ورأيتها..

إنها ليست بشر أو إنسا هي بالتأكيد كائن ساوي متجسد في
هيئة بشر.. أو هكذا رأتها عيني..

مدت لي يدها برقة، وقالت بصوتٍ عذب: أنا الوحش
حديث الناس.. هذه هي هيأتي الحقيقية، لا تتعجب..

قالتها حيث رأت الدهشة هي عنوان نظراتي وردود أفعالي
جميعها..

ثم أردفت: أنا مكافأتك أيها الفارس الشجاع، أنت تظن أن
هذا العالم هو كعالمك.. أليس كذلك!؟

هززت رأسي بالموافقة بعد صراع طويل لأستطيع التحكم في نفسي من هول المفاجأة فقد عجز لساني فعلاً عن الكلام!!
فإستكملت حديثها: إنه كذلك بالفعل!! هذا العالم هو كأني عالم.. هذا العالم هو نفسه الذي أتيت منه الفارق الوحيد أنك في هذا العالم لست وحيداً أبداً!! فأنا معك في كل خطوة، أسانديك وأشاركك حياتك..
فهيأ معي لنبدأ رحلتنا سوياً وبنبي عالمنا الخاص...

الجواز..

يعني إيه جواز؟؟

الجواز يعني إثنين لو شفتهم مع بعض من غير ماتعرف إنهم متجوزين، تقول عليهم إخوان من كُتر ما تصرفاتهم وطباعهم شبه بعض.

الجواز يعني ما حدش يستنى الثاني يطلب منه الحاجة. لأده بيأدر بالمساعدة وبدون إظهار أي علامة من علامات الإستياء.

الجواز يعني الطرفين عارفين إنهم في مركب في عرض البحر
لازم هما الإيتين يتشاركوا في سواقتها وصيانتها وحمايتها من أي
خطر لحد ما يوصلوا بيها سوالبر الأمان.

الجواز يعني سهر وتعب وألم وحب وغيره وعطف وحنان
وفرح وحزن وأسى وسعادة.

الجواز يعني الإحتواء بمعنى وبكل المعاني..

الجواز يعني سُنة الحياه..

الجواز يعني حياه...

وَصَلت... ولا نقول كمان؟!!

نقول كمان...

عشان نقدر نوصل للمعاني الراقية دي للجواز، هتقابلنا
شوية مشاكل.

بس قبل مانتكلم عن المشاكل وإزاي ببساطة نقدر نحلها،
هنتكلم في موضوع الأول:

الوزن والإعتدال كلمتين هيتكرروا كتير معانا في الجزء ده
بالذات، فلا بد الأول نعمل تنويه صغير عن المعنى العظيم
للكلمتين دول...

لو زاد الملح في الأكل، يبقى صعب أكله.. ولو قل، يبقى
طعم الأكل ماسخ..

أيوة هنلاقي في بعض الأحيان ناس بتحب الملح الزيادة،
وغيرهم مجبرين على قلته للمرض وخلافه..

بس في العموم لو إتكلمنا عن القاعدة العريضة من الناس
هنلاقي الإعتدال في الملح هو اللي بيخلي الأكل ليه طعم جذاب
وبيظهر حلاوته...

ده مثال بسيط جداً عن طبيعة وفطرة البشر..

والأمثلة على كلامي كتير، زي مثلاً الوحدة.. في معظم
الأحيان أو كلها تقريباً بتبقى قاتلة، والإختلاط الزيادة بيؤدي في
النهاية للمشاكل القاتلة برضه..

حتى السعادة، زيادتها ملل وقلتها ألم...

كل الصفات اللي ممكن تستحضرها في ذهنك دلوقتي هتلاقيها
لازم تبقى معتدلة عشان تقدر تقول عليها صفة حميدة...

والذكاء، زيادته بتخليك دايماً مُرَهَق الفكر وبتسبلك الأرق
المُزْمَنُ وزيادته أوي ممكن تخليك تروح في مكان بعيد كل البعد
عن الديانات السماوية وتخليك تدخل في جدال مع النفس في
منطقة «المنطقية»..

وقلته طبعاً برضه مش هتخليك مميز...

الكرم برضه نفس الكلام، والتضحية، والحب، والكره،
والغيرة، والوفاء وغيره من الصفات اللي في إدينا نخليها مميزة
فينالو بس إعتدلنا ووزناها صح...

طبعاً الوصول لحالة الكمال ده مستحيل لأن ما فيش حد كامل
إلا وجه الله عز وجل بس على الأقل لازم نحاول نوصل لشبه
حالة الكمال، لازم نحاول نوزن ونعتدل في تصرفاتنا على قد
مانقدر... لما نعمل كده هنلاقي الأمور دايماً ماشية في الإتجاه
المضبوط..

أمالو ما قدرناش، يبقى على الأقل لازم نبقي عارفين إن ده
عيب فينا إحنا مش في الطرف الآخر..

طيب يالا بينا نرجع للجواز والمشاكل المنتشرة في المرحلة
دي..

أول مشكلة بتقابلنا في الجواز واللي بتنهى علاقات كتير قبل
حتى ما بتبدي:

مرحلة التَّطْبِيعَة...

معلش أنا بعذر عن التطويل في الجزء ده بالذات عشان ده دايماً أول صدام حقيقي بيحصل في أول الجواز ويهد بيوت كثير أو على الأقل بيتبني فيه أساسات غلط فبالتالي العمارة بتفضل طول عمرها مُهَدَّدة بالسقوط...

لكن لو بنينا عمارة أساسها التفاهم والحب والمسئولية والبساطة، فعلاً هنبني عمارة في قمة الروعة..

أه هيحصل زلازل لأن دوام الحال من المحال، بس العمارة عمرها ما هتقع مهما كانت شدة الزلزال!

...تصفيق...

بعد الرجوع من أجازة شهر العسل، والي غالباً ما بتقاش شهر كامل ولا حاجة بس عموماً بيتدي العروسين يارسو حياتهم الشخصية اليومية الروتينية..

وطبعاً في الحتة دي بيحصل صدمات كتير سببها إن الإثنين كانوا فاكرين إنهم خلاص يعرفوا كل تفاصيل وطباع بعض فاكرين إن عشان إرتباطهم دام فترة طويلة يبقى كل اللي جاي مجرد تحصيل حاصل..

وعشان كده قررنا ننزل الشارع ونسأل عينة عشوائية من
الشباب والبنات...

جهاز يابني الكاميرا، في بنت جاية هناك أهى وفي إديها اليمين
دبلة، تعالى نسألها عن خطيها:

البرنامج: مساء الخير يافندم..

ردت البنت: مساء النور.

خير؟!

البرنامج: كل خير إن شاء الله.

إحنا بنصور برنامج إستطلاع رأي، وكنا عايزين نسأل
حضرتك كام سؤال لو تسمحى..

البنت: طبعاً، مافيش أي مشكلة..

البرنامج: من الدبلة اللي في إيدك دي باين إنك مخطوبة.

ممكن أعرف إنتي مخطوبة بقالك قد إيه؟

البنت: بقالنا ستين، وخلاص فرحنا فاضل عليه إسبوعين..

البرنامج: ألف مبروك ربنا يتمم على خير، إنتي إتخطبتي عن

حب؟

البنّت: أيوة، أنا وخطيبي مرتبطين من أولى جامعة وكانت
قصة حب عميقة جداً..

البرنامج: يعني تقريباً كام سنة؟

البنّت: أربع سنين جامعة وستين خطوبة، يعني تقريباً ست
سنين ..

البرنامج: عظيم، هل تفتكري إنك تعرفي كل التفاصيل عن
خطيبك؟

البنّت: طبعاً، هو ما يخييش حاجة عني خالص..

البرنامج: يعني تفتكري هيكون في مشاكل إختلاف طباع
وتفاصيل الحياه اليومية بعد الجواز؟

البنّت: معلش أنا آسفة، بس مش فاهمة قصدك إيه!!

البرنامج: قصدي إنك هل تعتقدي إن بعد ماتتجوزا إن شاء
الله وتبقوا في بيت واحد، هل ممكن تتفاجئي بطباع شخصية
مختلفة خطيبك بيعملها ما كنتييش تعرفي عنها حاجة قبل كده؟

البنّت: مايتها أليش الصراحة لأن من أيام ما حبينا بعض في الجامعة
وإرتبنا وإحنا تقريباً كل يوم مع بعض بنقضي اليوم كله سوا.

يادوب نروح عالنوم ونصحى تاني يوم نتقابل في الجامعة
وهكذا..

وأظن إن أربع سنين كفاية قوي عشان تعرف حد بكل تفاصيله خصوصاً لو كانت حالة زي حالة الجامعة دي، يعني مثلاً أنا عارفة طريقة أكله إزاي ويحب إيه ويكره إيه وكريم ولا بخيل، شهم ولا لأ وكل الحاجات اللي أصلاً خليتني أحبه... البرنامج: طيب إحنا متشكرين جداً على وقتك، ونتمنالكم كل الخير..

المنت: العفو، ربنا يخليك..

أهوأتعالو نشوف الشاب ده كده...

البرنامج: مساء الخير يافندم...

ولا حياة لمن تنادي، سابني ومشيت وأثناء مروره من جمبي رمقني بنظرة مش ولا بد يعني..
اللي بعده...

وبعد مرور وقت كتير وما حدش راضي يصور معانا...

ظهر فجأة البطل الهمام، وأخيراً وافق يصور معانا..

وبعد شرح تفاصيل البرنامج والتأكد إنه لسة خاطب الإسموع اللي فات عن قصة حب دامت ثلاث سنين سأله تقريباً نفس الأسئلة وكانت ردوده كالتالي:

أيوة طبعاً أعرف عنها كل حاجة تقريباً، حضرتك عارف
البنات بيحبوا يحكوا التفاصيل وعندهم القدرة للكلام في
التليفون كثير، أو على الأقل أنا خطيتي كده..

فطبيعي إني أكون عارف عنها كل حاجة..

البرنامج: متشكرين ليك يافندم، وربنا يتمملك على خير.

وعملنا لقاءات تانية مع ناس مختلفة من الجنسين وكانت
معظم إجاباتهم قريبة جداً لبعض وكلهم مشتركين في نفس
الإجابة: أيوة طبعاً نعرف كل حاجة عن بعض..

تنبيه هام:

كل اللقاءات دي من وحي الخيال فقط لدعم الفكرة العامة
وتوضيحها!

المهم إن فعلاً دي حقيقة..

دايماً العروسين بيبقوا فاكرين إنهم عارفين تفاصيل بعض،
الصدام بقى بيحصل لما يكتشفوا إنهم فعلاً لسة في حاجات
كتييير محتاجة تطبع عشان الحياه تبقى أبسط وتمشي..

طب زي إيه مثلاً من صدمات الطباع الشخصية قوي؟!

في كذا مثال على الكلام ده، هنحاول نذكر كذا واحد عشان
الفكرة توضح على قد ما تقدر..

مثلاً هو بيحب أول ما يصحى يفضل قاعد نص ساعة
عالسرير لحد ما يفوق وقبل كده ما بيكلمش حد ولا بيعمل أي
حاجة..

وطبعاً تفصيلاً زي دي عمرها ما هتظهر قبل الجواز عشان
هو أصلاً ما كانش بيكلمك قبل ما يفوق!

كان بيصحى ويقضي النص ساعة بتاعته لحد ما يفوق كده
ويبقى تمام وبعدين يكلمك يصبح عليكى ويتدي يومه..

تعالى نشوف بعد الجواز لما تصحى من النوم تعملي الفطار
وَكُلِّكْ أَمَلْ وإقبال عالحياء وتيجي تصحيه عشان يفطر معاكى
ويشوف المجهود اللي إنتي عاملاه عشان تبسطيه...

وتلاقيه صاحي مقريف ومش طابق نفسه وعمال يَأْفِنْف
عشان روتينه اليومي إختل..

هنلاقي الحوار غالباً بيبقى كالاتي:

إنتي: حبيبي إصحى ياللا أنا عاملالك فطار وكل الأكل اللي
إنت بتحبه.

هو: ماشي سييني شوية لما أفوق .

إنتي: ماينفعش يا حبيبي الأكل كده هيرد..

هو: بقولك يا عمري سييني شوية هفوق وأقوم على طول.. وغالباً يقول الجملة دي وهو جازز حبتين.

إنتي: طب يا حبيبي ما أنا بقولك الأكل هيرد.

هو: أنا أعملك إيه يعني، إبقى سخنيه تاني...

إنتي: الحق عليا إني كنت عايزة أبسطك، براحتك بقى...

وبتقوم تفتط لوحدها والحزن مالي قلبها وبتكلم نفسها وبتقول إنها، إتسرعت في الجواز وكان لازم يعرفوا بعض أكثر عشان مش هو ده الراجل اللي هي حبته إلى آخره من الأفكار اللي فعلاً ممكن تهد بيوت...

أو مثال تاني زي الترتيب والنظام..

لو طرف منظم جداً في إستخدامه لحاجته الشخصية وحاجة البيت والطرف التاني عشوائي حبتين..

بنلاقي مواقف صغيرة ممكن تعمل صدام شديد.

فبعد ما كان الشبشب بيتساب في أي حطة والفوطة عمرها
ما إتعلقت مكانها والهدوم بتاعة الشغل دايمًا عالسيرير وكباية
النسكافيه أو الشاي مكانها من إمبارح على الكومودينو...
وطبعاً الطرف المنظم والمرتب بالنسباله دي مأساة بمعنى
الكلمة..

بنلاقي الجُمَل دي بتتكرر كثير:

ياحبيبي بعد ماتغسل إيدك حط الفوطة مكانها معلش..
حبيبي ده شبشب الحمام مش النزول، عشان خاطري ماتنزلش
بيه...

حبيبي ممكن تقلع الجزمة عالباب؟!!

إنت ليه بترجع من الشغل ترمي هدومك عالسيرير؟!!

لأ ماهو مش كده يعني ماتمسح رجلك في المشاية قبل
ماتدخل أنالسة ماسحة البيت!

يووه! أنت حتى كباية النسكافيه مكسل تشيلها!!!

أكيد إنتو ملاحظين الكلام بيتطور إزاي وبيستمر الوضع لحد
مايحصل صدام حقيقي مَرير بيودي في داهية في معظم الأحيان..

وعلى فكرة تفصيلا الفوطة والشبشب والهدوم وكباية
النسكافيه والكلام ده كله عمرها برضه ماhtظهر قبل الجواز..

مش مصدقني؟!

طيب أنا هاثبتلكم حالا..

عُمُر حد فيكم شاف أو سمع مكالمة من المكالمات دي بين
اتنين مخطوبين:

- أيوة يا حبييتي، أنا صحيت أهو وغسلت وشي ورميت
الفوطة عالغسالة..

أو مثلا:

- حبيبي فلان، أنا رجعت البيت.. هغير هدومي وأرميها
عالسريرو وأبقى أكلمك تاني..

ولا حتى:

- أنا نازل أشترى حاجات لماما يا حبييتي ولما أرجع هبقى
أرمي الشبشب في أي حته..

ها؟!!

عمركم حصل معاكم كده أو سمعتم عن مكالمات من النوع

ده؟

صعب جداً..

طيب إيه تاني من الأمثلة اللي ممكن نقولها؟!!

مثلاً هو بيحب يقعد في البيت براحته قوي، وهي بتتكسف أكيد..

ولا مثلاً هي بتحب تنام ساعتين بعد الشغل وبعدين تصحى

لليوم، وهو ما بيعرفش ينام غير مرة واحدة بليل.

ويا سلام بقى لو هي بتحب تنام خفيفة وهو بيحب يتعشى

قبل ما ينام علطول..

أو النظافة الشخصية مثلاً زي غسيل السنان وخلافه...

أو مثلاً لو هو بيحب بعد الأكل يقعد يأتخ شوية قبل ما

يغسل إيدته وهي ده بالنسبها لشيء مقزز..

وغيره من الأمثلة لطباع شخصية جداً عمرها ما ظهرت ولا

هتظهر غير بعد الجواز...

وعلى فكرة ولا هو كان بيخدعك ولا هي كانت بتمثل عليك...

الموضوع وما فيه إن إحنا عمرنا ما كنا نتخيل إن تفاصيل

حياتنا الشخصية الصغيرة قوي دي ممكن تعمل مشاكل كبيرة

في بداية الجواز..

عشان كده لازم نبقى فاهمين إن الموضوع لسة في مرحلة التطبع وإن الخلافات دي بسبب حاجات ما كتوش تعرفوها عن بعض مش بسبب إن مش ده الراجل الي أنتي حبتيه ولا دي البنت الي إنت عشقتها، وبحُكم إنكم دلوقتي في مرحلة أعظم بكثير من مرحلة الخطوبة يبقى لازم تبقوا عاقلين ومتفاهمين وناضجين وعارفين إن إنتم زي ماتم ..

فلو إنت فعلاً بتعشقها وإنتي فعلاً بتموتي فيه زي ما بتقولوا يبقى لازم تشوفوا الصبح فين وتعملوه من غير مكابرة وعناد ومن غير الكلمة المشهورة بتاعت «أنا كده»...

طيب تعالوا نشوف مثال زي «الترتيب والنظام» نتعامل فيه إزاي من وجهة نظري المتواضعة طبعاً..

النظام والترتيب أصلاً حاجة جميلة وصحية وبتخليك دايماً شايف بيتك مرتب ومنظم وهكذا.

زيادة الترتيب ممكن تُخنق، وقلته بتجيب أمراض (وحشرات في بعض الأحيان)...

وهنا لازم تتكلموا مع بعض ..

إنتي دورك إنك تطلبي منه لما يشيل حاجة يبقى يرجعها مكانها بمنتهى الهدوء، وطبعاً الموضوع عمره ما هيبقى كن فيكون... لأن دي قُدرة إلهية فقط!!

الموضوع لازم ياخذ وقت ..

في الأول مش هتلاقى أي إستجابة ومش هيعمل حاجة،
معلش قومي إنتي إعملها مرة واتنين وتلاتة وعشرة .. لحد ما
يتعود على النظام.

صدقيني هتلاقيه بدأ يبقى مرتب واحدة واحدة لحد
ما توصلوا إنتم الاتنين لحالة الإتزان ..

يعني لو في عشر حاجات هتلاقي نفسك بعد ماكتي بتعملي
العشر حاجات كلهم، لأ إنتي بقيتي عملي تمانية وهو إتنين ..
وبعدين إنتي ستة وهو أربعة ومرة تانية إنتي إتنين وهو تمانية
وهكذا الحياه هتمشي بمنتها البساطة ..

وإنت برضه لازم تبقى فاهم إن هي لا بتأمرك ولا بتنكد
عليك ولا أي حاجة من الحاجات اللي الناس بتقولها عن
الوحش الأسطوري ده ..

الموضوع ببساطة إنها بتحب الترتيب والنظام ودي في الأساس
حاجة أصلاً صح مش غلط أبداً ..

يبقى ليه ماتحاولش تعمل الحاجة الصح دي؟!!

لو إنت فعلاً تقبلت الموضوع بصدر رحب و زود على الكلام
ده حبك ليها و ضيف كمان إن دي حاجة أصلاً صح، هتلاقي
نفسك مع الوقت بتعمل كده تلقائياً..

ده طبعاً بفرض إن البنت هي اللي بتحب النظام ولو العكس
برضه هيبقى نفس الكلام..

أرجوكم بلاش يانا يا إنتي، خليها أنا وإنتي...

يعني مش لازم عشان إنتي مُرتبة و منظمة يبقى هو كمان
كده يا إما غلط..

أو إنت تحسبها إن هي طالما بتحب كده يبقى هي اللي ترتب
كل حاجه وأنا مالي..

خلوها هي شوية وإنت شوية...

وهقول حاجة صغيرة عن أول مثال:

هي ماهاش ذنب إنك لازم تفوق الأول على السرير وقبل
كده ما بتحبش حد يكلمك..

ولا هو ليه ذنب إن خلاص جسمه وعقله إتعودوا على
كده..

طب مايجي تقرب المسافات شوية!!

خذ وقتك على السرير زي مانت عايز بس على الأقل إبتسم
في وشها وطبب عليها وماتكلمش ..

سهلة وبسيطة أهو .. صح كده؟!

وإنتي إديله وقته وماتحضريش الفطار دلوقتي، أخريه شوية
صغيرين بس لحد مايفوق ...

إيه رأيك، سهلة وبسيطة أهي .. صح كده؟!

شوفتوا الموضوع سهل إزاي؟

إحنا بس لو خدناها ببساطة كل الأمور هتعدى ..

وهنقيس على كده كل الطباع الشخصية اللي مستحيل تظهر
قبل الجواز وهنحلها بنفس الطريقة ..

نشوف الأول الصح فين وبعدين نحاول نوصله سوا ..

ولازم طبعاً نُصبر عشان موضوع التطبع وعلاجه بياخد
وقت ..

وأكيد لازم نبقى عارفين إن أساس الجواز هو التفاهم
والبساطة ..

بعض النماذج في مرحلة التطبع ..

آخر جزئية في مرحلة التطبع دي هي المشاكل اللي ممكن تحصل بسبب حاجات إحنا عارفينها عن بعض بالفعل بس عشان ماكناش متجوزين وفي بيت واحد كان الموضوع لا يمثلنا أي مشكلة ..

دلوقتي بقى الحاجات دي بقت ملموسة وبتأثر عليكم شخصياً فيبدأ نوع من الاعتراض والخلافات المستميتين .. هو ضح أكثر شوية ..

فاكرين لما قلنا قبل كده إن مستحيل تلاقي شخصيتين متطابقين تماماً؟. بس بيبقى في قاعدة عريضة من الناس متفقين في سلوكيات معينة ..

إحنا بقى قسمنا الناس دي لنماذج هنذكر بعضها دلوقتي ..

النماذج دي بتاعت إيه؟؟

النماذج دي بتبقى عن أسلوب الحياه نفسها ...

بالنسبة للولاد:

- في نموذج حياته عبارة عن شغل وقاعدة عالقوه ..

هو بيحب كده ..

هو بيبقى ليه حسبة في منتهى البساطة ..

طول اليوم في الشغل وقرف الشغل وضغط الشغل والناس
الي في الشغل وطلبات المدير وحناقات وقصص وروايات ممكن
تتحكي..

فهو لو روح على طول ورجع البيت على طلبات وقصص
تانية وحكايات يبقى أي منطوق يقول إنه هيقدر يستحمل ده كله
من غير ما ينفجر!!

ده طبعا اللي بيدور في دماغه عشان هو طاقة تحمله كده...

فبالتالي موضوع القهوة بالنسبale إنه يروق على حاله ويستجم
شوية ويعمل رفرش قبل ما يروح لحكايات البيت..
هو شايف إن ده الصح وما فيش صح تاني غير كده...

وعلى فكرة، حتى لو هيروح يقعد لوحده على القهوة. يعني
الفكرة مش في الصحبة الي عالقهوة على قد ما الفكرة بتبقى
في الحالة الرومانسية والإرتباط العميق اللي بينشأ بين الشاب
والقهوة عموماً..

وطبعاً إنتي كتتي عارفة الكلام ده من قبل الجواز، وممكن
تكوني إعتزتي عليه كام مرة كده عالماشي بس دايماً الموضوع كان
بيعدي..

دلوقتي بقى الوضع إختلف تماماً..

الموضوع بعد ما كان فاوول من نص الملعب، أصبح ضربة
جزاء وكارت أحمر كمان ..

عندي نصيحتين هنا في الجزء ده، واحدة للولد والثانية
للبنات ..

نصيحتي ليك:

الوضع دلوقتي إتغير وإنْت مابقتش لوحدك، بقى في حد
مسئول منك ومستنيك في البيت تخفف عنه ويشكيلك همومه ..
وزي ما إنْت محتاج تفرغ الطاقة السلبية الي عندك عالقهوة
عشان تبقى قادر تتحمل مشاكل البيت.

زي ما هي برضه مشحونة (سواء كانت بتشتغل فمشحونة
من الشغل أو مابتشتغلش ومشحونة من إلتزامات البيت
وخلافه) .. بس للأسف هي ما عندهاش قهوة تقضي فيها شوية
وقت وتستجم وهكذا ..

مابقولكش إقطع موضوع القهوة ده، بس على الأقل حاول
تخفف منه على قد ماتقدر ..

نصيحتي ليكي بقى:

زي ما إنْتي بتستمتعي بحكايات البنات زي مثلاً الميكياج
وطلاء الأظافر وخلافه، وبالنسبة للولاد الموضوع ده فعلاً

مالوش وجود من الأساس، زي ما بالضبط إحساس التواجد في القهوة عنده وإستمتاعه بالموضوع ده مش هيبقى شيء مبرر بالنسبة ليكي..

هتقوليلي، أيوة بس حاجة البنات مابتخلنيش أقصر في حقه..
أنا بعمل الكلام ده وأنا قاعدة جمبه مش بسويه وبنزل!!
هرد عليكى وأقولك: أنا مابقولكيش ماتضايقيش، بس
إحسيها حسبة تانية أبسط!

حاولي واحدة واحدة تشديه للبيت، لأن إنتي لو حقتيله
موضوع الإستجمام لفترة وجيزة بعد ما يرجع من الشغل
صدقيني الوضع هيفتلف تماماً..

- نموذج ثاني بيبقى البيت بالنسبائه عبارة عن «فندق»..

أو على الأقل دي الكلمة الي دايماً يسمعها من أهله طول
الوقت..

لأن الموضوع في الحقيقة مش كده خالص..

هو غالباً بيبقى شخص إجتماعي جداً وعنده أصحاب كثير في
كل حته فلما بيخلص شغل بيلاقي كم هائل من الناس المفروض
يقابلهم. وبعد ما يشوف ده ويكلم ده ويأجل مع ده وضيف
عليهم كمان الناس الي يقابلهم في طريقه للبيت، وكلمتين مع

ده وإتفاق على مشوار بكرة مع ده بتلاقيه لما بيرجع البيت -
وغالباً يبقى متأخر جداً - بيكون يومه خلاص مافيهوش أي
لحظة لحدث جديد يضاف ليها..

وأبوة طبعاً يبقى مقصر في حق نفسه وبيته وده غلط بس كل الي
هقوله إن الوقت جاي لا محالة الي هيفهم فيه معنى كلمة «ألويات»...
النموذج ده بقى أعتقد إن مافيش كلام كثير يتقال عليه..

لأن هو بيعمل كده عشان عارف إن في حد غيره يسد عنه في
البيت، والده بقى أو أخوه أو أياً كان..

لكن لما بيتجوز ويعرف كويس معنى كلمة أولويات بتلاقي
الحياة بتمشي..

ده بحكم إن هو إجتماعي وفاهم كويس في العلاقات
الإنسانية، فكل الي بطلبه منه إنه لو مش واخذ باله يبقى لازم
يركز أكثر ويعرف برضه إن دلوقتي مابقاش في حد يسد عنه،
دلوقتي مابقاش في غيره دلوقتي بقى هو الأساس..

- النموذج اللي بعد كده هو مدمن الهوايات...

زي مثلاً الصيد / السفر / لعب الدومينو والطاولة والكوتشينة
بأنواعها / السينما / البلاي ستاشن وخلافه من الهوايات اللي
هتبقى مقننة بعد كده بس لسة ماجاش الوقت..

دايمًا بتلاقي النموذج ده بيقضي أسعد لحظات حياته في الهواية دي أو التجهيز ليها، وطبعاً لأن مش كل الهوايات ينفع تتعمل كل يوم فبتلاقي الشخص ده لو في البيت أو في زيارة ما بيتكلمش كثير. لكن لو كلمته في الهواية بتاعته تلاقي الحماس والإقبال عالحياء هما أساس الكلام غير كده بيقى أقرب للحاضر الغائب...

النموذج ده بقى تلاقيه في معظم الأحيان مع أصحابه اللي بيشاركوه نفس الهواية ويستمتعوا بيها سوا..

هو بس حاطط كل تركيزه وإستمتعاه في حاجة واحدة..

حاوي على قد ماتقدي تشاركيه هوايته أيًا كانت أفايش حاجة صعبة. إحنا دايمًا اللي بنصعبها على نفسنا..

ولو فعلاً إنتي مابتحبيش الهواية بتاعته أو مش قادرة تتعلميها بيقى عالأقل شاركيه نفسياً، بالسؤال بقى أو أي طريقة تانية. المهم المشاركة...

وإنت برضه قدر اللي هي بتعمله عشانك وماتحبهاش، ولو مش هتعلمها بيقى عالأقل شاركيها وماتهمشهاش...

- النموذج البيتوتي... -

ده بيبقى سعادته في البيت، يحب قوي يرجع من الشغل عالبيت يسترخي ويقضي بقية يومه قدام التلفزيون أو الكمبيوتر أو أي حاجة ممكن تتعمل بدون الإحساس بالملل..

أهو ده بقى مافيهوش مشكلة بالنسبة ليكي، صح كده؟!
لأ طبعاً مش صح..

لإن لو إنتي إحتجتي حاجة ممكن تلاقيه مش عايز يعملها زي مثلاً الخروج والحركات..

إنتي نفسك تخرجي وهو عايز يأتخ في البيت وده مايبقاش ليوم ولا اتنين، لأ ده بيبقى كل يوم تقريباً..

طب الحل إيه؟؟

بالنسبة لك الموضوع في الأول هيبقى جميل وروعة، حد طایل جوزه يفضل قاعد في البيت طول اليوم معاه؟! بس بعد كده هيبقى ممل وجداً كمان.. كل المطلوب إنك تشاركه أنتخته وإستمتعاه بالهدوء والجلوس في اللاوعي، من غير أي إنتقاد لسلوكه. وحاولي لو محتاجة تخرجي، يبقى ترتبي معاه قبلها.

بلاش في نفس اليوم.. ترتبي معاه وخليها شوية عليك وشوية

عليه..

وإنت كمان، لازم تعرف إن كل حاجة وليها وقتها.. الأنتخة
ليها وقت، والنظر لإحتياجات مراتك ليه برضه الوقت وكل
الوقت. فبلاش تبقى مُتضرِر لما تلاقي نفسك هتتحرم النهارده
من الأنتخة وهتفرهد، لأنك هترجعلها تاني ماتقلقش...

وهضيف حاجة واحدة بس في الحتة دي:

الوزن والإعتدال هو دايماً بيبقى الحل...

طيب بالنسبة للبنات..

هل ياترى فيهم نهاذج برضه؟!

أكيد طبعاً..

زي إيه مثلاً؟

- نموذج البنت العشرية..

النموذج ده بتبقى البنت دايماً علاقتها قوية بأسرتها وأهلها
من أول بنات وولاد خالتها لغاية جوز بنت عمتها، وبالتالي
بينعكس ده على الأصحاب برضه. بمعنى إنك هتلاقي عندها
أصحاب من أيام ماكانت في تالته إعدادي مع العلم إنها
دلوقتي خلصت جامعة وبتشتغل..

بس بعد الجواز الموضوع هيبقى ليه أبعاد ثانية لأن ساعتها هي ممكن تقصر في حقك بحكم إنها متعودة تقف جنب كل أهلها وأصحابها..

طيب ماتيجي نحسبها حسبة ثانية:

الحب طاقة، الإبتسام طاقة، ومنح الطاقة الإيجابية... طاقة.

والسعادة برضه طاقة..

كل إحساس حلو محتاج طاقة عشان نقدر نَظْهَرُهُ...

وهنا بقى لازم تفهمي إن طاقتك عمرها ما هتزيد عن ١٠٠٪

فلما تخلصي ٨٠٪ منها على العيلة والأصحاب فده معناه إن

يادوب باقي ٢٠٪ لجوزك!!

طب بزمتك ينفع كده؟!

مش هو برضه ليه حق عليكى؟؟

بصيلي هنا وأنا بكلمك!!

ماتنسيش إنه مسئوليتك ولازم يبقى عندك طاقة تبسطيه

وتمتصيه وتسعديه وتسمعيه هو كان..

ماتخليها طيب عالقل ٥٠٪ للعيلة والأصحاب، ولجوزك

النص الثاني؟؟

كل المطلوب كالعادة... الوزن والإعتدال!!

أو زوديتها شوية وخليها أكثر من النص لجوزك.. يا سلاام.

وأنت كمان حاول تظهر لها إحتياجك لأهتمامها، وشاركها في لحظات سعادتها لحد ماتوصل للنسبة الي أنت محتاجها من الطاقة دي..

- وفي نموذج الأخت الكبيرة...

هي طبعاً مش الأخت الكبيرة حرفياً، بس دايماً بتلاقيها بتعامل على هذا الأساس..

يعني بالنسبة لأسرتها، تلاقيها دايماً الي بتصدر نفسها في كل موقف. وتلاقيها عارفة كل حاجة في البيت ودايماً على إتصال بالأهل والأقارب وهي لازم تكون طرف في أي خلاف سواء بالإيجاب أو السلب..

ودايماً شايلة الدنيا كلها فوق دماغها وشاغلة نفسها بحاجات ممكن ماتكنش تخصها أصلاً وده في معظم الأحيان..

وبتسمع كتير وتعترض قليل..

حتى في الشغل بتلاقيها بتعامل مع كل الناس على إنهم أسرتها الثانية..

قبل كده إختلاطها الزيادة بعيلتها وجيرانها وأصحابها
ماكانش بيَشْغَلِكْ عشان الكام ساعة اللي بتقضيها معاها بيبقى
الوضع تحت السيطرة.

وكنت بتسمع إنها النهارده رايحة لخالتها وبكرة هتبات عند
بنت عمته وهكذا..

ردودك في معظم الأحيان بتبقى: وماله يا حبيبتى ..

بعد الجواز بقى...

لما تقولك عاوزين نزور خالتي وعمتي وبنت خالتي في الأول
هيكون عادي بس بعد كده هتعرض وبشده كمان..

أنا عايزك تحسبها ببساطة، لأنها بتعمل كده من منطلق
طبيتها فحاول تفهمها واحدة واحدة إن أنت مش في كل وقت
هتبقى قادر تعمل كده وماتقولش «يعني هي مش عارفة الكلام
ده الحاجات دي ما بتطلبش»..

إوعى تفكر بالطريقة دي لأن ما ينفعش نحاسب حد على
طبيته وجدعنته وللا إيه!؟

وكم إن على فكرة هتلاقي الكلام ده هي بتعمله مع أسرتك
وأهلك إنك كمان فبالتالي مش هتقضي نص عمرك بتحاول

تقنعها إنك عايز تزور أهلك النهاردة بل بالعكس هتلاقي دايمًا
المبادرة من عندها..

وآخر حاجة هفهمها لك ثاني:

فهمها بالهداوة إن الإختلاط الزيادة بيعمل مشاكل وقلته
برضه بتعمل مشاكل، فالإتزان والإعتدال هما أسياد هذا
الموقف..

وبالنسبة لك إنتي كمان. شوفي البنت العشرية عملت إيه في
موضوع الطاقة ده وإعملي زيها، عشان نفس الكلام ينطبق هنا
كمان..

**- النموذج اللي بعد كدة بيبقى عكس اللي فات
واسمه نموذج البنت صاحبة الرأي السديد..**

وده في أغلب الأحيان في خلافات مع الأهل والأسرة وحتى في
الشغل بسبب قراراته الجريئة الصارمة..

تعالوا نشوف المناقشة دي عشان نفهم المقصود من كلمة
«قرارات جريئة»:

بابا أنا جالي شغل في بنها!

بس يابنتي إحنا ساكنين في القاهرة، هتروحي وتيجي إزاي؟!

هتعب شوية في الأول بس بعد كده هترقى وأجي القاهرة في
فرع الشركة اللي هنا.

بس أنا يابنتي شايف إن الموضوع مش مستاهل ..

معلش يابابا أنا عايزة الشغل ده وتعبت عشان أوصله
ومرتبة في دماغي كل حاجة وهبدأ من الإسبوع الجاي إن شاء
الله، إدعيلي إنت بس وبارك...

في الأول الأب بيبقى معترض، وواحدة واحدة البنت بتنجح
وفعلاً بتنقل القاهرة وبتحول نظرة الأب ليها بعد ماكانت إنها
بنت عندية، لإحساس بالفخر ببنته مديرة قسم العلاقات العامة
في أكبر فرع للشركة وفي القاهرة جمبه ..

وهكذا من القرارات اللي بيبقى حوالها جَدَلٌ كثير، مش
شرط إنها تكون غلط أو صح. الموضوع كله متوقف هل هي
مقتنعة بيه ولا لأ ..

وغالباً وفي معظم الأحيان بتبقى صح ...

النموذج ده بيعترض كثير ويسمع قليل عشان مايبعجوش
الحال المايل، ولا النفاق والرياء فبالنسبالة المجاملات اللي لابد
منها دي حاجة مش حلوة خالص فبتلاقيه عشان كده في ركن
خاص كده مع نفسه ..

كل الكلام ده كان في الأول مُبهر بالنسبالك وشايفه ميزة، بس
بعد الجواز لما تلاقي «القرارات الجريئة» دي معاك إنت، مش
هتقبل الموضوع ده بسهولة!

طيب، أنا هقولك حاجة حلوة..

النموذج ده مش أي حاجة تقنعه بسهولة، صح؟

فمعنى إنك قدرت تقنعه بيك من الأساس يبقى أكيد إنت
ذكي كفاية عشان تعرف تتعامل إزاي معاها..

أكيد إنت ما بتلغيش شخصيتها، ودايماً عندك سبب مقنع
لتصرفاتك ومتطلباتك وعارف إن مش معنى إن مراتك ليها
كيان إن ده يبلغني وجودك، إطلاقاً..

بل العكس تماماً، كل ما كانت مراتك شخصيتها واضحة
وظاهرة وفي نفس الوقت إنت اللي دايماً بتحتويها يبقى دي أكيد
حاجة عظيمة تعلق منك مش العكس...

إلغني فكرة (كلمة مين اللي تمشي في البيت) وبدلها بفكرة
(الصح هو اللي هيمشي في الآخر)!

وبالنسبة ليكي إنتي كمان..

لازم تفهمي إنه لما يطلب حاجة مش عاجباكي، ده مش
عشان يلغني شخصيتك، لأ أبداً.. الفكرة كلها إنه مقتنع بالحاجة

دي نفس إقتناعك بسفرك لبنها أو أي حاجة الي حواليك مش موافقين عليها أو مش عاجباهم!!

يبقى نحاول سوانحتوي بعض ونفهم إن الإختلاف فرض وليس إختيار، وبالتالي نحاول نتقبل بعض ونحترم قرارات بعض ونخلي الكلام ده أساس أي نقاش..

- في بقى النموذج الإحالم... -

نموذج البنت الرومانسية الخيالية، الي الأمور كلها بالنسبة ليها المشاعر.

النوع ده بيبقى حساس وخجول جداً، مش هقول إنطوائي لأن هو مش كده خالص بس نشاطاته بتبقى قليلة مقارنةً بنماذج تانية من الناس..

دي بقى مشاعرها هي مشكلتها، إعمل أي حاجة في الدنيا إلا إنك تأذيها في مشاعرها..

حاول تهتم بيها على قد ماتقدر وعاملها بالضبط زي ما بتعامل موظف البنك الي إنت طالب منه قرض وبتحاول على قد ماتقدر ترضيه وتفعله كل طلباته عشان يوافقلك عالقرض.. نفس الفكرة بالضبط معاها بس الفرق إنك لو عملت كده، الجائزة مش هتبقى فلوس!

دي هتبقى حاجة أعظم من كده بكثير، حاجة لاتقدر بهال
ورجالة كثير راحوا عشان يلاقوها..

الكنز!

الكنز ده هو إهتمامها وقلبها..

وإنتي كمان محتاجة يبقى في جزء عقلاني شوية عشان توصلي
لهدفك في الكمال...

الدنيا مش كلها قلوب وألوان زاهية، الأبيض والأسود
والرمادي برضه من الألوان..

وزي ما ربنا خالق لنا قلب عشان نحس بيه، خلقنا برضه
عقل نفكر بيه...

ولو القلب توقف عن العمل الإنسان يموت، وبرضه لو
العقل توقف عن العمل الإنسان هيموت...

فخلاصة الموضوع إن الإحساس ده نعمة من ربنا بس لازم
نقننها شوية بالعقلانية اللي هي برضه نعمة من نعم ربنا...

ممكن طبعاً تلاقي خليط من نموذجين في نموذج واحد،
يعني شوية من هنا على شوية من هنا وقام النموذج..

وكمان ممكن تلاقي حد بيتحول من نموذج للتاني في فترة
من فترات حياته، الموضوع مش ثابت أبداً.

وأكيد في نماذج تانية إحنا ما ذكرناهش عشان كلامنا للتوضيح
لا للإجمال ..

طيب في سؤال مهم جداً لا بد يتسأل هنا، إحنا ليه إتكلّمنا
عن كل النماذج في مرحلة الشغل؟.

لأن المرحلة اللي قبل كده وهي مرحلة الدراسة المرحلة دي
بيبقى فيها تخبطات وحيثيات وظروف تانية خالص بعيدة كل
البعد عن كلامنا الحالي.

فأنا بعتبر مرحلة الشغل دي بداية الإلتزام والإتزان الفعلي
والنضوج ..

المهم هنكتفي بالكلام عن النماذج اللي ذكرناها، عشان
الهدف من ذكرها أصلاً هو توضيح فكرة معينة ..

آه وعلى فكرة، نماذج الولاد والبنات دول مش شرط يبقوا
كده ..

بمعنى إنك ممكن تلاقي نماذج بيقى في منها الولاد وفي برضه
منها البنات والعكس برضه صحيح ..

وعلى فكرة برضه، في قاعدة عامة للراجل أياً كان نموذج
إسلوب حياته القاعدة دي بتقول: الراجل بيحتاج مساحة من
روقان البال في بيته عشان ربنا خلق الرجالة بعقليات أحادية

التركيز، بمعنى إن الرجل يقدركم كويس قوي في حاجة معينة، بس لو بقوا حاجتين الموضوع يبقى صعب ولو تلاتة يبقى شبه مستحيل.. ده مش قصور عنده أبداً، إنما ده تكوينه وتركيبه..

إنتي بقى ربنا خالق فيكي حنة التركيز في كذا حاجة في نفس الوقت، بس عمرك ما هتقدري تتحملي ولو جزء بسيط من اللي الراجل بيتحملة، وصدقيني هو بيتحمل كتير إنتي بس اللي مش عارفة... وأنا مش هضخم الموضوع ده لأن أنا راجل ومش عايز الموضوع يبقى في أي نوع من أنواع الإنتقاد إني متحيز فيكفي إني أقولك خدي الموضوع ببساطة...

يا جماعة الموضوع ببساطة عامل زي مشهد في الأفلام العربي القديمة اللي كلنا حباها وبنينا أمانا عليها وإحنا صغيرين..

المشهد هو إثنين على شط البحر كل واحد فيهم واقف في ناحية، ويبجروا ناحية بعض عشان يحضنوا بعض..

إجروا في إتجاه بعض عشان في النهاية حياتكم تحضنكم...

بلاش تتنازلو عن طباعكم الشخصية عشان الأمور تعدي وخلص، لأن ده هيعمل مشاكل أكبر قدام وهتفضلوا طول عمركم بتضحكو على بعض...

لازم تشوفو فين الصح وتحاولوا إنتم الإتين تعملوه سوا...
أي تنازل عن الصح للغلط من الأول إعتقاداً منكم إنكم
بتعملوا كدا عشان المشكلة تعدي لأ.. بلاش..
أي طرف هيتنازل، يبقى ما يندمش...
لو إنت أو إنتي صح يبقى ماتتنازلوش لا إنت ولا إنتي،
حاولوا تبسطوا الموضوع وتقربوا لبعض سوا..
هي دي الفكرة العامة من التطبع..
طبعاً بيتخلل مرحلة التطبع وكل المراحل تقريباً أسطورة تانية
بتظهر إسمها..

أسطورة النكد...

أسطورة النكد دي من زمان جداً، نشأت لما بقينا نستصعب
نحل مشاكلنا، وبقت شاعة بنعلق عليها كل حاجة إحنا مقصرين
فيها..

وللأسف الزوجة المصرية دايماً هي الضحية...
دايماً بنسمع أساطير عن الزوجة المصرية النكدية، وإزاي هي
بتتفنن في أساليب النكد وتنوع حالاته..

طيب إيه تعريف النكد المتعارف عليه؟!

النكد ده بيطلق على أي إعتراض من الزوجة على أي تصرف للزوج ..

بمعنى إن لما الزوجة تطلب حاجة من الزوج وهو يكبر دماغه مرة وإثنين وتلاتة بيبدأ ساعتها الوحش يكشر عن أنيابه ويدخل في طور النكد اللي كلنا عارفينه، بدايةً من لَوِي البوز ونهايةً بالبيات عند والدته حضرتك...

ده طبعاً التعريف السائد والدارج عن النكد، واللي أصحابك المتجوزين هيحكولك أساطير ويألفولك مجلدات في الموضوع ده.. أحب أقول للناس إن دي فعلاً أسطورة مقتبسة من الحضارة الزوجية العريقة، واللي فيها جزء من الحقيقة بس مش كلها..

التعريف المنطقي للنكد من وجهة نظري المتواضعة إنه هو: «رد فعل» مزعج عن شيء غلط حصل، سواء الحاجة الغلط دي كانت صادرة من الراجل أو من الست..

إيه ده، يعني الراجل كمان ممكن يكون نكدي؟!

أيوة طبعاً، إحنا بعون الله مايفش حاجة ما بنعرفش نعملها!! مع إختلاف طرق التعبير عنه طبعاً، يعني أكيد مش هتلاقي الراجل «لاوي بوزه».. الموضوع بيبقى أصعب من كده بكثير..

عشان كده أنا سميتها أسطورة، لأن النكد موجود.. بس
الأسطورة في الأمر إنه فعل، مش مجرد «رد فعل». وإنه يشمل
الزوجة بس..

طيب عايزين بقى مثال كده عشان نفهم ونمخمخ...

تعالو كده نحلل المثال الشائع في موضوع النكد ده، لما
الزوجة تطلب من الزوج حاجة يعملها زي مثلاً إنه يصلح
حوض المطبخ عشان ينقط أو يغير لمبة النجفة بتاعت الطريقة،
أو يجيب عتبة لباب الشقة عشان التراب، أو يركب سلك لشباك
الصالة عشان الحشرات، أو يتشعلق عالحيطة وينور بدل النجفة
وهكذا من الطلبات المنطقية والبسيطة والتي فعلاً هتبقى بسيطة
لو إتعملت ساعتها..

بس للأسف الحاجة مش في معظم الأحيان بتتعمل وقت
الطلب، وده بيخلق مادة خام للنكد فيظهر بأروع حالاته..
وزي ماوضحنا قبل كده إن عقليات الرجال والست مش زي
بعض..

هو يفكر إزاي؟...

إيه المشكلة لما حوض المطبخ ينقط؟ إيه اللي هيحصل يعني
لو ماصلحتوش دلوقتي؟ ولا حاجة طبعاً (ده من وجهة نظره)

أو مثلاً لمبة النجفة بتاعت الطريقة إتحرقت ومحتاجة تتغير،
طب إيه المشكلة مانور الحمام منور الطريقة والدينازي الفل..
هيجرى إيه لو ماتغيرتش دلوقتي؟؟ ولا حاجة برضه.

والعتبة بتاعت باب الشقة بتدخل تراب، ماشي إيه المشكلة
ما التراب كده كده بيدخل!! يعني هي الحتة الصغيرة اللي
تحت الباب دي هي اللي هتدخلنا عواصف رملية؟؟!!

طيب إمتى بيعمل الحاجة دي بقى؟؟

لما تتحول لكارثة!!

يعني لما الحوض بتاع المطبخ ينفجر والمطبخ يغرق، هتلاقيه
ساعتها عملك اللي إنتي عايزاه.. لأن ساعتها بس بيكتشف إن لو
كان عمل المشكلة الصغيرة قبل ما تكبر، ماكانش كل ده حصل.

أو لما نجفة الحمام تبوظ هيا كمان فتلاقي نص الشقة بقى
ضلمة، ساعتها بيكتشف إنه لو كان صلح لمبة الطريقة كان زمانها
منوراله الحمام عشان يغير اللمبة المحروقة، وبقى الموضوع أسهل.

أو مثلاً لما يلاقي بُرُص في البيت أو أي حشرة زاحفة سبب
دخولها إنه ماعملش سلك للشباك أو العتبة اللي ماعملهاش
برضه.. ساعتها بيبقى إتأكد إنه لازم يعمل السلك والعتبة.

وساعتها «النكد» يبقى هو المسمى للأحداث اللي بتحصل
بعد وقوع الكارثة مباشرة ...

ليه طلب بسيط عندك، حاول تعمل الحاجات الصغيرة دي
قبل وقوع الكارثة، عشان إنت شوفت بنفسك أهو لما الحاجة
بتتساب إيه اللي ممكن يحصل..

طيب ماتيجوا نحسبها ببساطة زي ماتعودنا؟!!

حاولي تنوعي في أساليب طلبك للحاجة، يعني مثلاً مرة
كده قوليله: حبيبي أنا حاولت أصلح حوض المطبخ بس
بوظته أكثر.. ممكن تيجي تساعدني؟؟

أو مثلاً تقوليله: حبيبي عايزة أغير لمبة الطرقة بس خايفة
أقع من على الكرسي، ممكن تيجي تسندني؟؟

ورداً على حد ممكن يقولي: دلّع ماسخ هقول للحد ده إن
الموضوع مش دلّع خالص أو مش ده المقصود من كلامي..
أنا قصدي إنك تحسسيه إنك بتحاولي ومحتاجة مساعدته مش
رامياها عليه زي المدرس اللي طالب واجب من تلميذ ومستني
عشان يحاسبه عليه..

طيب، بعد ماردينا على الحد ده نرجع لكلامنا، شايقة الطلب
بالطريقة دي يبقى شكله منمق أكثر وصياغته بتبقى أكثر لباقة
إزاي!!..

وعلى فكرة مش عيب أبداً إن الست تساعد في عمل الحاجات دي في البيت يعني بلاش تقولي لنفسك:

يعني أنا هعمل كل حاجة في البيت لوحدي؟؟ هو ولا يساعني في طبخ ولا توضيب البيت ولا الغسيل ولا أي حاجة يبقى كمان لما حاجة تبوظ أنا اللي هصلحها؟؟

وهنا بتظهر مشكلة تانية لازم نشوفها حل بسيط إسمها «المشاركة» بس لسة الدور ماجاش عليها وهتكلم عليها بعد شوية بس نحل الأول مشكلة النكد دي...

لأ هو اللي هيصالحها بس هو محتاج يحس إن الحاجة دي ضروري تتعمل دلوقتي، عشان زي ما قولنا قبل كده في مرحلة التطبع إن الرجاله بيقوموا محتاجين شوية مساحة للروقان في البيت فلما تيجي تتركبي الدنيا فوق دماغه بالطلبات دي، واللي هيه مهمة جداً بالنسبالك ومش ضرورية بالنسباله بتلاقي رد فعل «التطيش» هو الحاجة الوحيدة اللي بتحصل...

طبعاً ممكن تلاقي منه ردود أفعال غير متوقعة زي: طيب سيبها دلوقتي وأنا هعملها لك بعدين!!

خلاص ما فيش مشكلة يا حبيبي أنا هحاول أعملها دلوقتي، من غير أي نوع من أنواع الزعل جواكي عشان صدقيني لو

عملتي كده واحدة واحدة هتلاقي رد فعل مختلف تماماً لأنك كده هتبقى حركتي عنده غريزة الحس الأمني للحفاظ والخوف عليكى فبالتالي وبساطة كل حاجة هتبقى ممتازة...

إنت بقى تعالالي هنا، فرحت إنت وإفتكرت إني هسيبك وهمشي وإن اللوم كله عليها وخلص الكلام خالص..

لأ طبعاً لسة ماخلصش، لأن إنت كمان عليك دور في غاية الأهمية...

لازم تبقى فاهم إن «التطيش» ده شيء مش كويس وإن الإستجمام والجلوس كدة في منطقة الفراغ ليه وقته، مش في كل وقت ينفع...

لما حاجة تبوظ في البيت دي مسئولية لامفر منها عليك وعليها طبعاً بس خلينا دلوقتي في الجزء اللي عليك إنت لازم تبقى فاهم إن أسطورة النكد دي ماهاش أي أساس من الصحة.. لما بتطلب هي منك طلب وإنت مابتعملوش ده بيبقى تقصير منك فبالتالي لما بتعدي الأيام وأحياناً السنين بتلاقي رد فعل عال كلام ده واللي بيطلق عليه في عالم الرجال «النكد». يبقى بلاش نعلق تقصيرنا على شاعة «النكد»

وخلينا نفكر شوية بإيجابية ونفهم إن هي مش مخلوقة عشان
تكد عليك لأهي مخلوقة عشان تخلي الحياه ليها طعم جميل
وبها بيكمل نص الدين...

بلاش نحكم على «رد الفعل» وخلينا نشوف أساس الفعل
ونحاول نعالجه أو على الأقل نبقى عارفين المشكلة فين بالضبط..

وطبعاً مش حنهمل الأمثلة الكثير بتاعة أسطورة النكد زي مثلاً
زيارات الأهل (واللي برضه هنتكلم عليها كمان شوية) أو مثلاً لما
بتتأخر مع صحابك أو لما بتطلب منك تخرجها أو لما بتغير من
واحدة عندك في الشغل وإنه سايق فيها (أو هي شايفة كده) أو
المثال المشهور بتاع «إنه كل يوم ترجع من الشغل تنام وساييني
بين أربع حيطان» وكل الكلام والحواديت دي...

كل ده بيندرج تحت مسمى النكد بالنسبة لك واللي هو في
الحقيقة بيبقى رد فعل على تصرفاتك...

أنا مابقولش إن رد فعلها ده مضبوط، لأ هو برضه محتاج إعادة
توجيه بس في الآخر إسمه رد فعل...

لأنك عمرك ما ترجع البيت مثلاً وتقرر إنك تقضي
معها وقت لطيف وتلاقيها قبالك البيت جحيم، ولا عمرك
هاتشوفها عاملة نفس رد الفعل ده لو طلبت منك حاجة
وعملتهاها ساعتها، عمرها ما تحصل..

فبالتالي هعيد تاني كلامي، إن النكد ده أسطورة بنعلق عليها
تقصيرنا وإستسهالنا في حل مشاكلنا. وبدل مانقول كده خرينا
نحاول نعرف المشكلة فين ونحلها سوا...

معلش أنا محتاج بس أتكلم في المثال بتاع «إنت بترجع كل
يوم من الشغل تنام»...

بص ياسيدي عايز ألفت نظرك لشوية حاجات...

سواء هي كانت بتشتغل أو مابتشتغلش هتلاقيها دايماً محتاجة
وجودك حوالها يعني حتى لو هي عند أهلها وإنت معتقد إن
وجودك مالوش لازمة فبالتالي يا إما بتنزل تخرج وترجعلها بعد
ما تلخص أو تروح تنام ساعتين وترجعلها أو أي حاجة تانية.. المهم
إنك مابتكونش موجود، لأهي فعلاً بتبقى محتاجة وجودك.. سواء
عند أهلها ولا في البيت ولا أي حاجة وتفصيلة ممكن تتخيلها...

أمال هي بتخانق معاك «وبتنكد» عليك زي مانت بتقول
ليه؟! لما تتأخر عليها أو ترجع تنام وتصحى تاني يوم عالشغل
وهكذا طول السبوع!؟

محتاج منك رد صريح وواضح عالسؤال ده...

بس الرد ده أنا مش عايز أسمع، خليه جواك.. عشان أنا
هَرُد من وجهة نظري الأمور ماشية إزاي.

هي بتخانق معاك عشان وجودك فارق معاها جداً ومقصر فيها.. وجودك حواليتها يعني الأمان ليها حتى لو هي ما قالتش ده.. بس صدقني دي الحقيقة اللي في الكواليس. ده ممكن حتى هي نفسها ماتبقاش عارفة كده هي كل اللي حاساه وعارفاه إنها عايزاك موجود جنبها وحواليها وخلص...

أنا عارف إنك بترجع مرهق وخلصان من الشغل والطريق والزحمة والكلام ده كله، فبترجع وكل أحلامك وطموحاتك بتبقى دايرة حوالين هدف واحد بس... عاااييزز أناالم..

طب نام ياسيدي مافيش مشكلة..

إرجع نام النهاردة، وبكرة إرجع وخليك قاعد معاها وإسمع أحداث يومها وشاركها أحداث يومك..

إسمعها حتى لو الكلام بالنسبالك مش مهم، إسمعها وتفاعل معاها زي ماهي بتسمعك لما بتشتكي من مديرك في الشغل اللي هي ماتعرفوش أساساً ولا يخصها...

وبعد بكرة إرجع نام، وبعد كده إرجع نام برضه مع إضافة كلمتين حلوين كدا: حبيتي معلش اليوم كان مجهود جداً النهاردة، فمعلش سامحيني لو راحت عليا نومة بدري.. بس هعوضالك بكرة، وخليك فعلاً قد كلامك وخرجها بكرة.. خليها تثق فيك وفي كلامك مع الوقت والإصرار منك على كده..

واحدة واحدة حتى لو هي في الأول رفضت ولوت بوزها
يوم وزِ علت يوم تاني، لما تشوفك بتيجي على نفسك بس
عشان ترضيها الوضع هيفتلف تماماً.. لو هي ماقدّر تش ده
من أول يوم، هيقى تاني يوم أو تاني إسبوع أو تاني شهر..
ما تقلقش، حياتك هتبقى أفضل بس إنت ماتبأسش بسرعة
وإعرف إن كل حاجة لازم تاخذ وقتها، وعلى قدر صيدك الحلو
عندها وتصرفاتك معاها!! على قد ما الموضوع مش هيطول..
إيني أساسات العمارة صح عشان بعد كده تعيش مرتاح
طول عمرك...

لازم تشوفك بتتغير علشانها، للصح طبعاً.. بلاش إسطورة
الزوج المصري المأنتخ تبقى حقيقة وتتأكد يوم بعد يوم..

طبعاً إنت مش مجبر تعمل كل الكلام ده، صح؟!

أنا هحكيك عن نموذج وأسيبك إنت اللي تقول لي صح،
ولا مش صح...

النموذج ده أنا ما ذكرتهوش قبل كده من ضمن النماذج في
مرحلة التطبع عشان النموذج ده بيظهر بعد الجواز، ومابيقاش
ليه وجود قبل الجواز..

نموذج الزوجة المستقلة:

مع مرور الوقت بييتدي يحصل «فتور عاطفي» بين الزوجين ولو ماتعالجش بندخل في مرحلة جفاء وبعد ماكانت الزوجة بتتخانق مع جوزها و «بتنكد» عليه عشان إتأخر في الشغل أو بيرجع ينام ومايقضيش وقت معاها أو مثلاً بتطلب منه حاجات ومشاوير ويطنش أو أي تفصيلة من التفاصيل الحياتية اليومية اللي دايماً بتبقى محتاجة وجوده حوالها ومعاها..

أصبح الموضوع إنها خلاص تعبت وزهقت.. والراجل للأسف فاهم إنها بقت نكدية ومقرفة وكل ماتحاول هي تتكلم معاها بتلاقي إنفجار لأن هو مش طايق تصرفاتها وهي مش عارفة تعبر عن اللي حاسة بيه أو بتكابر أو بتعاند أو أياً كان المبرر..

المهم الموضوع إنها خلاص بطلت تطلب منك تقعد في البيت عايز تقعد براحتك ولو مش عايز يبقى أحسن..

بطلت تطلب منك حاجات تعملها يعني مثلاً لما حوض المطبخ ييوظ هتتصل هي بالسباك وتجييه عشان يصلحه..

بعد ماكانت «بتنكد» عليك لما مابتخر جهاش، إبتدت لما تحتاج تشم هوا تكلم حد من صحابها أو قرابها أو إخوانها وهكذا..

بدأت لما تحصل أي مشكلة بعد ما كانت بتحكيها لك وتاخذ رأيك فيها وإنّ يبقي الكلام ده بالنسبة لك صداع وتفاهة وما بتسمعوش.. بتلاقيها بتدور على حلول لوحدها وتتعامل فيها وتنفذها كمان.. ممكن تلاقي كارثة حصلت مع حد من أهلها أو في البيت وإنّ ماتعرفش عنها حاجة.

كل ده بيحصل ليه؟!!

عشان هي بالفعل إبتدت تتعود على عدم وجودك فبالتالي واحدة واحدة بتلغيك من حياتها وبتبقو متجوزين بس على القسيمة!!

فيايه رأيك لما تلاقيها بتجري على أخوها أو خالها أو أبوها أو جارها لما تقع في مشكلة؟

إيه رأيك لما ترجع البيت تلاقيها إتكهربت عشان كانت بتحاول تغير لمبة النجفة بتاعت الطرقة، ووقعت ودماغها إتفتحت؟!!

طب وإيه رأيك لما تيجي داخل عالييت وتلاقي جيرانك مقابلينك بالدموع ويقولولك: البقاء لله يا أستاذ فلان شد حيلك. وتكتشف إن حصل تسريب في الغاز نتيجة التقصير أدت للوفاه!!

كفاية كده ولا أقول كمان؟

أعتقد إن الموضوع ده صعب جداً، فأرجوك من البداية حاول تعالج الأمور وتتكلم معاها وتشاركها، وتعالى على نفسك شوية قبل ما الموضوع فعلاً يكبر وتبقى العيشة مستحيلة..

ما تقولش ما أنا عملت كده وما فيش فايده، ما تقولش أنا حاولت كتير معاها.. جرب تاني وحاول تالت..

أي معدن في الكون بيحتاج لوقت مختلف ودرجة حرارة مختلفة عشان يلين، بس في النهاية بيلين. مهما كانت خصائصه أو شدته...

وما تقولش طب لما أنا أعمل كل حاجة أمال هي إيه لازمتها؟؟ خليك في نفسك وإعمل اللي عليك الأول ولما تبقى عامل كل اللي عليك ساعتها إبدأ شوف هي مقصرة في إيه.. طيب في حته كده قولناها في النص وما تكلمناش فيها كتير..

الراجل كمان ممكن يبقى نكدي؟؟

طبعاً، لأن زي ما قولنا إن تعريف النكد هو رد فعل مزعج حاجة غلط حصلت..

ده معناه إنه لما يقولك لأ على الخروج النهارده يبقى ده نكد..

لما يقلب وشه أول ما تبتدي تهزري مع ابن خالك في العزومة الي عاملاها ماهيتاب مرات خالك، وساعتها بتتأكدي إن يومك مش هيعدي أول ما تروحو البيت.. ده برضه إسمه «نكد»...

أو لما تبقى في حاجة مضايقاه، وإنتي مالكيش أي علاقة بيها.. وتلاقيه طلع الكلام ده على عنيككي، سواء بعصبيته أو تكشيرته الجميلة الرائعة وبرضه منعك من خروجة معينة كان واعدك بيها أو زيارة لحد أنتي بتحبيه وهكذا..

بس زي ما دافعت عنك قبل كده، لازم برضه أدي للراجل حقه.

فلما يقولك لأ على خروجة معينة، ده نكد بالنسبة لك..

طب ماتشوفي هو رافضها ليه!

مش يمكن المكان زحمة وهو مش عايز معاكسات وخناق واليوم بدل ما يبقى جميل، لأ ده هيتحول لحلة مصارعة؟

أو هو تعبان النهارده مش قادر عالزحمة..

ولا مثلاً هو ليه حسبة تانية لا أنا ولا إنتي نعرفها..

فإيه رأيك لو بمنتهى البساطة سألتيه: ليه يا حبيبي مش عايز
نروح المكان الفلاني؟؟

شفتي سهلة إزاي؟

طيب بالنسبة للمثال الثاني..

هو كمان بيبقى ليه حسابات تانية لما مثلاً يقلب وشه في
عزومة ماهيتاب، هو أكيد بيبقى منبه عليكى ماتهزريش معاه
عشان هو واصله إشارات مش لطيفة من ابن خالك. وزي
ماقلنا كتير قبل كده إنه فاهم التصرفات والحركات بتاعة
الرجالة، فبالتالي قالك ماتهزريش معاه.

فلازم لما تبقوا في البيت تناقشيه ويا تقنعيه يا يقنعك،
وهتخرجوا من المناقشة دي بحاجة من اتنين:

- يا إما هتقنعي بكلامه، ساعتها يبقى هو ليه الحق يقلب
وشه لما عملي عكس اللي إتفتوا عليه..

وماتقوليليش: طب أعمل إيه يعني لما يجي ابن خالي هو
اللي يهزر معايا؟ أخرجيه يعني؟

هقولك: طالما وافقتي وإقتنعتي بالكلام، يبقى آه إخرجيه!

إخرجيه عشان ترضي جوزك، ده مش عيب أبداً..

- ويا إما هيقتنع هو بكلامك، وساعتها ياستي إعملي اللي
إنتي عايزاه.. بس برضه هقولك خلي بالك عشان مش هتعرفي
تقولي نص كلمة لما يجي هو يهزرمع بنت خالته نفس الهزار
الي بتهزريه مع ابن خالك!!

يبقى الحل الأمثل في الموضوع ده إيه؟

الي النهارده ليك بكرة ممكن يبقى عليك. فراعوا بعض
ياجماعة وإعرفوا إن هي مش خناقة مين يكسب فيها الموضوع
إننا بنحاول نبني حياة مستقرة ومرتنة...

ولما بيبقى متضايق من حاجة إنتي مالكيش ذمب فيها
ويتخانق معاكي..

صدقيني هو نفسه مايعملش كده، بس إنتي اللي بتديله
الفرصة دي على طبق من ذهب.

إزاي الكلام ده؟

يعني لما يجي يقولك: إنتي واخدة بالك من نفسك زيادة
عن اللزوم كده ليه وشكلك زي القمر؟؟

ده إيه القرف ده!

الموضوع ده باين جداً إنه بيتلكك، وفي حاجة مضايقه بس
هو مش عارف يودي غضبه وضيقه فين.

تعالى بقى شوفي لو إنتي بمنتهى البساطة قولتيله: مالك
ياحبيبي؟ قوللي بس إيه اللي مضايقتك.

يااااه...

هتلاقى الوحش إنحول لطفل عنده خمس شهور...

إنما بقى لو إنتي مافهمتيش الكلام ده وقولتيله مثلاً: بقولك
إيه، ماتلككش! وماتطلعش زعايبك عليه..

أو الردود اللي من هذا النوع، ساعتها ماتزعلش عشان إنتي
كده بالضبط عملتي اللي هو عايزه وإدتيه الفرصة على طبق
من ذهب...

إستحملوا بعض يا جماعة، لازم نقضي على أسطورة «النكد»
دي نهائياً...

وغيرهم من الأمثلة الكثير اللي ممكن تتقال.. بس عشان مش
الهدف إننا نعمل مقارنة بين الراجل والست ونشوف مين اللي
هيكسب، هنكتفي بالأمثلة دي لتوضيح فكرة إن الراجل كمان بيبقى
«نكدي» لو إنتي مافهمتيش تتعاملي مع الموقف إزاي...

حد هيقولي: ياسلام!! يعني أنت كاتب كل الكلام ده عن الست
ونكد الست والراجل كاتبلي عنه كلمتين كده ماياكلوش عيش؟؟

يبقى الكلام صح بقى إن الست هي مصدر النكد وإن دي
مش أسطورة ولا حاجة..

هرد وأقول: أولاً، هو مثال «لما الزوجة تطلب حاجة من
جوزها ومايعملهاش».. ده مثال واحد بس وفصلناه، وإتكلما
فيه عن الرجل والست. مش الست بس.. وقلنا كام مثال تاني
كده وبإختصار عشان نفهم المضمون.

وثانياً وده الأهم: إن لما قلنا «الرجل كمان نكدي» ماإحتجناش
نفسر أكثر من كده لأن إحنا بالفعل شرحنا معنى النكد بما فيه
الكفاية، وأظن إن الموضوع مش محتاج إعادة!

يبقى ببساطة كده ونهاية الكلام، في إدينا غير أسطورة النكد للأبد
لو قربنا لبعض المسافات أكثر وحاولنا نفهم بعض أكثر وأكثر...

المشاركة..

عُمر ما المشاركة كانت ضعف أو عيب، بل على العكس
تماماً...

كل حاجة في الدنيا لما بيتم المشاركة فيها بتبقى أبسط وأسهل،
والأمثلة على كلامي كتير..

يعني مثلاً جملة «العمل الجماعي» أو «إيد لو حدها ماتسقفش» و«القفة اللي بودنين يشيلوها إثنين» إلى آخره... الجمل دي مش جاية من فراغ..

تعالو نشوف كده جملة «العمل الجماعي» والمقصود منها:

العمارة عشان تبني محتاجة عمل جماعي، ماينفعش أبداً تطلع لو حدها أو بفرد واحد.. لازم يبقى في عمال ومهندسين وتنظيم عشان الصرح يكمل على أتم وجه..

وفي أي شركة في العالم صغيرة كانت أو كبيرة، عمرك ماهتلاقي فيها موظف واحد هو اللي بيعمل كل الشغل وما فيش موظفين غيره... مستحيل!!

التدرج الوظيفي ده أصلاً أكبر دليل على العمل الجماعي من وجهة نظري..

بمعنى إن لازم يكون في حد في الحسابات عشان المالىات والمرتبات وخلافه، وموظف صغير ليه وظيفة صغيرة بس مهمة وبتخدم الحسابات وموظف أكبر منه ليه وظيفة أكبر شوية وبتصب عنده معظم مهام الشركة.. وهكذا نهايةً بالمدير العام.

هل ينفع تلاقي الشركة عبارة عن مدير «بس»؟؟

لأ طبعاً لازم العمل الجماعي هو اللي يقوم الشركة..

بتقول إيه؟!!

بقول: لازم العمل ال..

لأ، آخر كلمة في الجملة خالص..

قصدك «الشركة»؟؟

أيوة بالضبط..

كلمة شركة أصلاً جاية من المشاركة.. صح كده؟!!

طيب «إيد لو حدها ماتسقفش»..

عمرك ما تعرف تسقف بإيد واحدة، لازم تحتاج إيد تانية
معاك..

طبعاً ممكن بإيد واحدة تسقف بس لو سقفت عالحيطة
أو المكتب وده برضه إثبات إنك لا يمكن تسقف بإيد واحدة
إكتفاءً بذاتك فقط، لأنك محتاج طرف تاني حتى لو كان جماد..

المهم لو سقفت لوحدك بإيديك الإثنين ده في حد ذاته دليل
عالفرحة، ولو سقفت بإيد واحدة مع حد تاني يبقى ساعتها
هتبقى بتشاركه فرحته أو فرحتك..

وبالنسبة «للُقَّة اللي بودنين يشيلوها اتنين»...

ده نموذج جميل للمشاركة برضه لأن إنت ممكن تشيل القفة لوحدك عادي. بس هتبقى ثقيلة شوية، إننا لو شاركت مع حد وكل واحد فيكم شال من ودن، الموضوع هيبقى أخف وأسهل..

طب يعني المشاركة شيء مهم جداً في حياتنا عموماً، وكل حاجة بيتم فيها المشاركة بتبقى أسهل وأبسط..

في حد لسة مش مقتنع هناك أهو، ومعتقد إنه يقدر يعمل كل حاجة أو معظم الحاجات لوحدته من غير ما يحتاج لحد والموضوع برضه هيبقى بالنسبة بسيطة وسهل..

أحب أقوله حاجة.. إنت لو جبت حاجات من السوبر ماركت، تموين الشهر كله بمعنى أدق..

وإنت حالياً تحت بيتك ومعاك ١٥ شنطة فيها طلباتك، وإمكانياتك وقدراتك البدنية والجسمانية تشيل ٥ شنط بس وتطلع بيهم الدور التاني واللي فيه شقتك..

يبقى إنت كدة محتاج تطلع وتنزل ٣ مرات.. صح؟؟

لأهما في الحقيقة ممكن يبقو أكثر من ٣ مرات لأن لو عملنا حساب الوقت والمجهود هتلاقي نفسك مع آخر مرة مش قادر تشيل الخمس شنط كلهم فبالتالي يا إما هتقسمهم وده هياخد مجهود زيادة يا إما هترتاح شوية وتطلع بالخمس شنط دفعة واحدة وساعتها برضه هتبقى ضيعت وقت زيادة..

طب بص بقى المشاركة...

المشاركة جاية هناك أهى، اتنين جيرانك شافوك معاك الشنط
دي كلها فقرروا يساعدوك..

الشنط هتطلع كلها مرة واحدة..

- بأقل مجهود لأن لو كلنا قدرتنا الجسمانية واحدة يبقى كل
واحد هيشيل ٥ شنط ويطلع، لكن فى الحقيقة القدرات البدنية
بتختلف وده الأوقع فبالتالى واحد هيشيل ٧ شنط والتانى ٣
والأخير ٥ أو أى تقسيمة تانية، المهم المجهود هيقبل طبعاً..

- وفى أقل وقت لأن الحاجة كلها هتطلع مرة واحدة وده أكيد
وقت أقل من لو الحاجة طلعت على ٣ مرات أو أكثر...

شوفت بقى المشاركة حلوة ومهمة إزاي؟

نفس الحد هايقوللى: طب ما أنا ممكن أضغط على نفسي
وأتعب شوية وأشيلهم كلهم..

هرد عليه وأقوله: تمام، بس أنت كده برضه قدرت تحقق
بند واحد بس وهو إنك وفرت الوقت.. إنما المجهود كان كبير
ومتعب ومرهق لأنك هتستنفذ معظم قوتك..

إنما المشاركة هي الحاجة الوحيدة اللي هتحقق البندين، توفير
المجهود والوقت...

أکید لو عندك أسانسیر فی العمارة وبواب یقی مش هتحتاج كل الی أنا قلته ده بس أحب ألفت نظرك لحاجة، حتی البواب یعتبر مشاركة برضه..

طیب فی نوع تانی من المشاركة؟؟

تعالوا نشوف المثال ده قبل مانجاوب عالسؤال:

شخص قاعد قدام التلیفزیون ویتفرج علی حاجة ممتعة جداً بالنسبة له، وحصل حدث محتاج تفاعل، فتفاعل معاه.. بس لما بص حوالیه مالقاش حد غیره یتفرج.

تانی مرة هی تفاعل برضه، بس بعد كده هی لاقی إظهار التفاعل مالوش لازمة.. فهیقل لحد ما یقی تفاعل داخلي فقط!

تعالوا بقی نشوف لو حد قاعد مع الشخص ده، ویاسلام لو كان بیحبه (مراته بقی أو حد من العیلة أو الأصحاب أو أياً كان)..

مع مراعاة إختلاف أنواع التفاعل، بس الی هقوله إن الشخص ده هی تفاعل وبقوة، ده لأنه ببساطة لقی حد یشارکه فرحته أو ضحكه أو تأثره بمشهد معین وإلی آخره..

الفرحة لو مالاقیناش حد یشارکنا فیها عمرها ما هتبقى كاملة..

لما تنجح في الثانوية العامة وتجيّب مجموع كبير، تخيل بقى بعد
ما تعرف النتيجة وأنت طائر من الفرحة وفي قمة السعادة وتروح
البيت ماتلاقيش حد!! بتبقى قاعد مش على بعضك مستني أي
حد يجي عشان يشاركك فرحتك ويضاعفها.. ومع دخول أول فرد
للبيت، بتلاقي نفسك وبأعلى صوتك بتقوله: أنا

نجيييييحت.. صح ولا أنا غلطان؟

يبقى الإجابة: أيوة في نوع تاني من المشاركة وهو مشاركة
المشاعر..

خلاصة الجزء اللي فات ده إن المشاركة نوعين:

مشاركة بدنية..

ومشاركة المشاعر..

وعلاقة ده بكلامنا إننا محتاجين نشارك بعض في كل حاجة
سواء في بيت الزوجية وده عن طريق المشاركة البدنية في تنظيف
البيت وخلافه.. أو مشاركة مشاعر الفرح والحزن وكل تفصيلا
من هذا النوع..

الكلام جميل وسهل بس ليه دائماً التطبيق بيبقى صعب
ومايحصلش؟؟

يعني ليه ما بنعملش كده في بيت الزوجية؟

ليه غالباً - أو خرينا نقول دايماً - الموضوع بيبقى صعب
ومعقد جداً ويبقى في حسابات تانية وإعتبارات أكثر؟؟

ليه ما يبقاش «بس» المشاركة؟؟ ليه ما يبقاش بسيط؟

خرينا نوضح ونخصص أكثر شوية..

هنتدي بالمشاركة البدنية واللي هنخصصها ونقول:
«المشاركة في البيت»

في معظم إذ لم يكن كل الأحيان بتلاقي الراجل ما يبساعدهش
في البيت خالص، والمقصود هنا مش إنه يشيل كباية النسكافيه
اللي شرب فيها أو يحط هدومه في الغسالة.. لأ أنا قصدي كل
حاجة في البيت.

ليه يا جماعة؟! ليه بنعمل كده؟

في مرحلة «النكد» طلبت من الست وقولتها إن مش عيب
أبدأ إنك تساعدي في تصليح حاجة باظت في البيت فاكرين؟

دلوقتي بقول للراجل كمان، مش عيب أبدأ إنك تساعد
مراتك في شغل البيت وتشاركها..

بالعكس ده إنت لو عملت كده هتوفر على نفسك حاجات كتير جداً يعني مثلاً لو إنت دايماً بتشارك ودايماً إيدك في إيدها ساعتها لما لمبة النجفة بتاعت الطرقة (فاكر اللمبة دي اللي عملت مشاكل قبل كده) تبوظ هتلاقيها من نفسها ومن غير ماتطلب منك هتجيب كرسي وتغيرها هي. وهيبقى على قلبها زي العسل وهتبدل جملة «هو لا يبساعدني في توضيب ولا غسيل ولا أي حاجة أوكمان لما حاجة بتبوظ أنا اللي هصلحها؟!» وهتلاقيها أصبحت «ما أنا لسة طالبة منه حاجات وماعترضش وعملها وكان زي العسل أنا مش هقومه تاني بقى.. أنا هغير اللمبة، سهلة مافيهاش أي مشكلة»...

كفاية بقى فرجة وإعجاب بالأفلام والمسلسلات الأجنبية وبطريقة حياة وعيشة الأجانب وقد إيه هما متفهمين عشان «إيه يعني لما البنت يبقى عندها صحاب ولاد وأهلها عارفين عادي؟!.. وإيه يعني لما يبوسو بعض في الشارع ويلبسوا ضيق وقصير وماحدش بيعاكسهم»...

هو ده اللي بنشوفه من كلمة متفتحين..

هو ده بس اللي بنشوفه، السلبيات بس وللأسف بنحاول نقلدها..

مابنشوفش لما تلاقي الزوجة واقفة في المطبخ وجوزها واقف
معها ويساعدها، أو هي بتطبخ وهو بيغسل الأطباق.. أو
العكس، بمنتها البساطة..

أو هي نزلت تجيب الطلبات من السوبر ماركت وهو كان
قاعد في البيت عادي ماهو شارك في البيت بالفعل وخلص اللي
وراه.. والموضوع بيبقى عادي وبسيط جداً..

مابتلاقيهاش داخله تقوله: إنت إزاي قاعد كده وأنا اللي
نازلة أشترى الحاجة؟؟

إنت راجل إنت؟!..!

قوم شيل مني..

وتقوم مجزرة...

أو تلاقي الراجل بينفجر في الست لما تطلب منه يعمل شاي
مثلاً أو يناولها حاجة في المطبخ ويرد عليها:

أنا راجل مابقاش بشقى وبتعب طول اليوم وتيجي تقولي
إعمل كذا وكذا...

وبرضه تقوم مجزرة..

ليه كده؟؟

ليه بناخد السلبيات بس؟؟

ليه آلافات مننا بيروح عمرهم عشان فرصة سفر برة؟؟ مع
إننا لو بس طبقنا ديننا صح وأخذنا الأمور ببساطة مش بتشدد
ولا إنحياز، هنلاقي الغرب هما اللي المفروض يتعلموا مننا..

وحتى النماذج اللي بتساعد في البيت في منهم نوعين:

النوع الأول بيتقى دايماً حاسس إن ده كرم أخلاق وتفضل منه،
يعني لو ماعملش كده ما حدش يقدر يلومه ولو عمل يبقى مقابل
الخدمة الجليلة دي هو منتظر يعيش في نعيم لمدة ٣٤ سنة وكل ما
مراته تطلب منه حاجة ما فيش عنده غير رد واحد بس:

أنا مش لسة مساعدك في توضيب البيت من ١٢ سنة؟؟

أمال بتخانقي معايا ليه عشان دخلت البيت من غير
مامسح رجلي في المشاية اللي برة وطينت الدنيا، وحرقت
السجادة وكسرت كباية النسكافيه اللي جمبي عالقومودينو بقالها
أسبوعين؟؟؟

ليه بقى الخناق؟؟

أنا غلطان إني ساعدتك من ١٢ سنة، فاكرة؟؟

النوع الثاني يساعد وعن إقتناع تام إن المشاركة في البيت واجبة على الزوج والزوجة بس ما يحبس حد يعرف ولا يشوف الكلام ده إعتقاداً منه إن ده هيقبل منه ويجرح كرامته كراجل قدام عيلته أو أصحابه أو الجيران إلى آخره..

وارد طبعاً إنك تحس أو تسمع الكلام ده «لأ إحنا ما عندناش رجالة تعمل شاي، أو تنشر...» أو مثلاً «الولد ده دلدول مراته، شوفوا بتخليه يعمل إيه؟» أو «دي مماشية جوزها على عجين مايلخبطوش»...

لو سمعت الكلام ده أو حتى كلام قريب منه، إبتسم.. اللي إنت بتعمله ده إقتداءً برسولنا الكريم..

سُئلت عائشة ما كان رسول الله صلى الله عليه وسلم يعمل في بيته؟

قالت: «كان بشراً من البشر يخيظ ثوبه ويحلب شاته ويخدم نفسه». رواه أحمد

إنت ما بتعملش حاجة غلط، بل بالعكس تماماً.. إنت بتعمل حاجة راقية جداً مش أي حد يقدر يفهمها...

في طبعاً زوجين بيقوا متفقين إن كل واحد ليه وظيفة معينة في البيت مثلاً الراجل مسئول عن أي حاجة تبوظ في البيت،

والست مسؤولة عن الأكل وهكذا.. وفي رجالة بتحب الطبخ
وده مش عيب، ولو عيب يبقى المفروض كل برامج الطبخ اللي
بيقدموها رجالة تتقفل.. المهم إن الأدوار بتتقسم..

ياجماعة البيت ده بيتكم إتم الإثنين، اللي يقدر يعمل حاجة
يعملها.. بلاش أنا الراجل ماعملش كذا ولا كذا، أو أنا الست
أعمل كذا وماعملش كذا..

بلاش يا أنا يا إنتي..

خلوها أنا وإنتي...

وكم إن أحب أضيف حاجة، بغض النظر إذا كانت الست
بتشتغل أو مابتشتغلش.. الكلام ده مالوش علاقة إنك تشارك
مع مراتك في البيت برضه..

هتقوللي يعني أنا أشتغل برة وجوة؟؟؟

هرد عليك وأقولك: هي بتشارك حياتها كلها، إنت مش
عايز تشاركها في مأساتها في البيت؟

وكم إن أنا لسة كنت بقول إن اللي يقدر يعمل حاجة يعملها يعني
الموضوع مالوش علاقة بمين شغال ومين مش شغال.. الموضوع وما
فيه إن كل واحد وليه قدرة بدنية معينة وزى ماشفنا في المثال بتاع الـ

١٥ شنطة إن المشاركة بتسهل حاجات كتير وبتقلل الوقت والمجهود، وصدقني لو شاركت حتى بكباية شاي فالمشاركة دي في حد ذاتها بتقربكم من بعض وبتخليها تمسح من قاموسها الجملة الشهيرة اللي دايماً بتعبر عن إحساس هي بتحسه لما إنت مابتشاركش خالص معاها.. الجملة دي هي «أنا مش شغالة عندك!!»..

وإنتي برضه بلاش الجملة دي تتردد في ذهنك حتى، لأن عُمر ماخدمتك لبيتك وجوزك كان معناها أبداً إنك شغالة عنده.. بجانب إن إنتي بيتعملي حاجة ماחדش غيرك هيعرف يعملها بالجمال ده وعلى أتم وأروع وجه، لأ ده غير الثواب العظيم اللي بتاخديه قصاد كل نقطة عرق وذرة مجهود بتعمليلها..

دلوقتي بقى هنتكلم عن مشاركة المشاعر..

للأسف على الرغم من سهولة النوع ده من المشاركة إلا إنها غالباً بتتفهم غلط وبتتنفذ غلط في غلط..

يعني بدل ما الزوج يرجع من الشغل بعد إجهاد اليوم يشاركها أحداث يومه بمتتهى البساطة، لأ بتلاقيه يطلع قرف اليوم وزحمته وحره عليها سواء بالعصيبة بقى أو برفضه لأي طلب ليها أو أياً كانت الطريقة!!.. ماهو متضايق وعايز يطلع ضيقه ده في أي حد...

والزوجة برضه بدل ماتشتكيله من اللي مضايقتها بمنتهى
البساطة، لأ دي بطلع عليه قرف المشكلة اللي حصلت بينها
وبين بنت خالتها الصبح لما مامتها كلمتها وقالتلها إنها إتكلمت
عليها كلام بايخ وقالت إن جوزها كان المفروض يوصلهم بليل
وهما نازلين عشان الوقت كان متأخر وهما ياما وصلوهم!!
ويظهر ده عن طريق ردودها السخيفة عليه وعدم تحملها أي
كلمة منه، ما هي متضايقة وعايضة تطلع ضيقها ده في أي حد...
مع إنهم لو شاركوا بعض مشاعرهم ومشاكلهم الموضوع
هيبقى أصلاً ما فيش موضوع ولا مشكلة نتكلم فيها...

طيب بالنسبة للزوج..

هي ماهاش ذنب إن الطريق كان زحمة، ولا ليها أي ذنب إن
الجو كان حر والرطوبة عالية وواحد صاحبك في الشغل فقع
فيك إسفين عند المدير ولا كل الكلام ده ليه أي علاقة بيها من
قريب أو من بعيد..

فبلاش تدخل البيت مكشر ومتعصب وبالتالي لو هي
طابخالك أكلة حلوة أو لابسالك هدوم شيك ولا ريحتها وريحة
البيت منعشة إنت مش هتاخذ بالك وهتضيع الكلام ده على
نفسك، وهتلاقي نفسك بدل مابتشوف الحاجات الحلوة لأ ده

أنت بتلاحظ ريحة البصل والتوم وتكشيرتك بتزيد، وعينك فجأة بقت بتشوف أدق التفاصيل ولمحت بقعة الصلصة الصغيرة جداً على هدومها وأبديت إستياءك من الموضوع ده.. كل ده عشان إنت أصلاً داخل متحفز وبتدور على أي حاجة تكون سبب إنك تنفعل وتترفز وتفش غل اليوم في حد...

وطبعاً هي هتحاول تلفت نظرك وتقولك: مش شامم ريحة حلوة؟

أو: أنا إترقت في الشغل!!

وإلى آخره من العبارات اللي بيبقى الغرض منها إنها عايزة تشاركك في أحداث هي عاملاها ومستنية رد فعلك أو أحداث خارجية حصلت وبرضه عايزة تشاركها معاك.. وبتبدأ هي تعترض وتقول كلام بيسترفك بالضبط زي ما أنت إستفرتها..

وساعتها بيبقى ده ردك: بقولك إيه، أنا راجع قرفان ومش طايق نفسي.. فإعملي اللي تعمله المهم أنا جعان وعايز أكل وأنام..

طب بدمتك ده اسمه كلام!؟

عشان هي لو بتشتغل يبقى شافت نفس الحر والزحمة اللي إنت شوفتهم ومع ذلك فكرت فيك وإزاي تسعدك، ماقلتلكش

أول ما رجعت وسألت عن الأكل: أكل إيه؟. الجو النهاردة كان
حر والدنيا زحمة وخنقة، ومديري كان فاحتني شغل النهاردة..
ولما بتعمل أو تقول كده أو حتى حاجة قريبة من كده
بتنتقدها وتبقى شايفها زوجة غير صالحة ومحتاجة تقويم
وبتعترض بشدة وتقولها: وأنا مالي، أنا جعان...

وحتى لو مابتشتغلش، فده في حد ذاته إرهاق نفسي إنت
مش متخيله.. حيطان الشقة كلامهم ممل وسخيف وحواديتهم
كلها تؤدي للإنتحار.. بس هي رغم ده كله وبدل ما تتصل
بحد من صاحباتها أو إخواتها ولا تتفرج عالتيلفزيون طول اليوم
إلى آخره، لأهي بتدور تسعدك إزاي.. بطبخة حلوة بقى أو أي
حاجة تانية، ومستنيك بفارغ الصبر عشان تبهرك.. وتلايقك
داخل مكشر ومش طايق نفسك ولا طايقها..

أنا عارف إنك بتبقى تعبان ومجهد جداً، وعارف إنها
المفروض تشاركك تعبك ده وتقدره..

هقولها الكلام ده كله ما تقلقش بس الكلام ليك دلوقتي..

هيجرى إيه لو دخلت مبتسم، مابقولكش كركر من
الضحك.. إبتسم بس.

هتقوللي إزاي يعني بعد قرف اليوم ده كله أعمل كده؟؟

أنا هقولك إزاي...

أول ماتوصل على باب شقتك إرمي كل حاجة مضايقك ورا ظهرك وخذ نفس عميق وإعرف إن كل ده خلص خلاص.. الحر خلاص كان تحت وخلص لأنك دلوقتي هتدخل بيتك وتاخذ دش ساقع كده ومنعش وجميل، وخلص الزحمة راحت لحالها ومديرك والشغل وكل الموظفين مش موجودين هنا، دول هناك في المكتب أو روحوا أو أياً كان.. المهم إنهم مش موجودين دلوقتي..

كل حاجة كانت مضايقك ومعصباك خلاص خلصت على عتبة باب بيتك، إنت دلوقتي داخل على بيتك وحياتك اللي إنت بنيتها وأسسيتها صح.. عدت خلاص مرحلة الوحش (واللي تقريباً بتلعبها كل يوم) وداخل على الجائزة..

دلوقتي إفتح باب شقتك بمفتاحك، دلوقتي إنت هتقدر

تبتسم..

إبتسم وشاركها إبتسامتك..

وإشكيلها يومك وقولها: ياه، الجو النهارده كان صعب قوي والطريق زحمة بطريقة مش طبيعية، وتخلي مدحت زميلي في الشغل عمل فصل بايخ قوي.. بس الحمد لله أنا خلاص رجعت البيت. إنتي بقى قوليلي يومك كان عامل إزاي؟

وإسمع منها بطولات يومها كانت عاملة إزاي.. وعملت إيه
عشان تبسطك وتسعدك، شوفها طابخالك إيه وشم الروائح
الحلوة وعبر عنها..

من الآخر، إبدأ يومك معاها.

وكأن اللي فات ده كان يوم، وعند عتبة البيت ده يوم جديد...

بالنسبة للزوجة بقى..

لازم تقدري تعبته وإرهاقه ويبقى الكلام ده ليه قيمة عندك..
هو بيعمل كل ده عشان هو راجل مسئول ويحاول على قد
مايقدر يشتغل ويشقى ويتعب ويسعدك ويحبيلك كل إلتزاماتك
وإحتياجاتك، وإنه رغم كل الكلام ده بيحاول يتسم (طبعاً هو
هيسمع كلامي ويعمل كده) ومايشيلكيش أي هم..

فبلاش الكلام من النوعية دي: مش ملاحظ حاجة غريبة
في ترتيب البيت؟ أو مش ملاحظ حاجة متغيرة فيه؟؟ أو مثلاً،
مش دايق طعم مختلف في الأكل النهاردة؟؟

موضوع الأسئلة ده فعلاً بيتقى سخيف ومالوش طعم ودايماً
بيتفهم إنه كمين لإعلان بداية خناقة لأن الراجل عارف إنه أياً
كان رده، مش هيبقى كفاية بالنسبة لك..

وبيتدي ده يصحي الوحش اللي جواه والمارد العملاق
إستعداداً للحرب..

وعلى فكرة الموضوع ده مش بيبقى مستفز بس وقت رجوعه
من الشغل، لأ ده بيبقى في أي وقت تتقال فيه جمل الأسئلة
والفوايز دي..

خليها: حبيبي إيه رأيك في الترتيب الجديد للبيت؟ أنا غيرت
مكان الكنبه جبتها هنا، والسفرة هنا..

أو مثلاً: حبيبي شوفت ورق الحائط الجديد ده؟؟.. إيه رأيك
فيه؟؟

ولا مثلاً: حبيبي أنا إشتريت حلق جديد النهاردة، شكله
حلو؟؟

أي حاجة عملتها عشان تفرحيه وتبسطيه قوليهاله على طول
وشاركه وخدي رأيه.. بلاش تستني ياخذ باله عشان طبيعة
الرجالة كلها مش جوزك بس، إنه لو دخل البيت والتلاجة مش
موجودة أساساً، أو إنتي من غير دراعك، أو غيرتي مكان الدولاب..
كل الحاجات دي مايركزش فيها غير لو إحتاجها ومالقاهاش..
يعني لما يحب يشرب ويروح عند التلاجة مايلاقيهاش ساعتها بس
هياخذ باله وهيسألك، غير كده مش هيلاحظ..

طبعاً لكل قاعدة إستثناءات بس أنا بتكلم عن القاعدة
العريضة والنسبة الأكبر من الرجالة..

وده مش عيب فيهم لأن زي ما قولت كذا مرة قبل كده إن
عقليات الراجل والست مختلفة عن بعض..

عموماً لو إنتي عايزة تشاركيه، إسألينه عن رأيه في الحاجة
على طول.. ماتتظريش غير كده..

ده حتى أبسط ما تفضلي مترقبة ومتربصة ومتضايقة ومستنياه
ياخد باله من حاجة إنتي عملتيها وكل دقيقة بتعدي بيزيد
ضيقك وغيطك إنه لسة ماחדش باله!!

طب ليه كل ده؟؟

شوفتي كل الأحاسيس اللي فاتت دي؟؟ هتبدل لما تقولي
جملة واحدة بس «حبيبي أيه رأيك في كذا وكذا»..

سهلة وأبسط، صح كده؟!

وخلي بالك من حاجة عشان واحدة واحدة نقضي على أسطورة
إن الست بتبقى قاعدة في البيت مبهدلة في نفسها وريحتها طيبخ
وخلافه..

خدي من وقتك عشر دقائق قبل ماجوزك يوصل البيت
وتخلصي من تسريحة شعرك الغير مهندمة والملابس المهلهلة
والروايح الغير محببة عشان ماتضيعيش مجهودك وعشان هو
برضه مالوش ذنب في الكلام ده...

أيوة طبعاً مش دايماً هتبقى قادرة تتزوقي وتبقي على سِنجة
عشرة، بس بلاش يبقى الطبع الغالب إنك مش واخدة بالك
من نفسك وماتقوليش لنفسك: ده بيتي لما أبقي دايماً متزوقة
ومركزة في الكلام ده، أمال هبقى براحتي إمتى وفين؟؟.. عشان
المفروض إن أهم شخص في العالم يشوفك جميلة ونظيفة على
طول هو جوزك اللي بيحبك وبتحبيه وإنتي اللي إخترته يبقى
شريك حياتك.. مش كده ولا إيه؟؟

طيب في نوعيات من الناس مشاعرهم بتبقى جامدة شوية
أو مايعرفوش يعبروا عنها ويشاركوها مع حد نتيجة النشأة
والتربية أو ظروف الحياة القاسية أو موقف حصل معاهم أو
قدامهم وهما صغيرين أو أياً كانت الأسباب المسببة للموضوع
..ده

المهم موضوع مشاركة المشاعر بيبقى صعب بالنسبالمهم
وغصب عنهم.. ساعتها خلينا نتدي واحدة واحدة ونحاول
نشارك حتى لو بجزء بسيط من المشاعر دي..

وخلينا نقول إن إحنا كلامنا من الأول عن جواز بدايته حب وعشرة، فأكيد لو في طرف مشاعره جامدة شوية فالطرف الثاني عارف الموضوع ده من الأول وراضي بيه..

فكل الي هقوله: حاولوا تشاركوا مشاعركم وأحداث يومكم مع بعض وما تخلوش يبقى فيه بينكم أسرار عشان تقدرُوا تفهموا بعض أكثر وتقدرُوا بعض أكثر وأكثر وتشيلوا البيت سوا وتبنوا أسرة سعيدة وحياة متزنة ومستقرة مع بعض...

صحيح، بالنسبة للأسرار. في جزء في غاية الأهمية ودايماً بيعمل مشاكل ولازم نذكره..

بتلاقي الراجل بيخبي على مراته حاجات زي مثلاً إنه إترفد من الشغل أو إتحانق مع مديره وإحتمال يترفد أو إنه إكتشف إن عنده مرض معين وهكذا...

وبيبقى عنده مُبرر قوي عشان يخبي: مش عايز أشيلها هم ولا أقلقها..

وطبعاً نظراً للسر الي هو مخبيه، بتكون نفسيته زي الزفت ومتوتر وقلقان علطول. فبالتالي إنفعالاته وعصبيته بيبقوا غير مبررين بالنسبة للزوجة لأنها شايفة الدنيا جميلة والحياة مافيهاش مشاكل وهي ماعملتش أي حاجة غلط ولما بتسأله بيخبي وبيحسسها إن الدنيا وردى..

طب أمال إنت مش مضبوط ليه؟ وعلطول عصبي ليه؟!

وغالباً بداية المشاكل بتحصل لما الست تبدأ دماغها تروح في حته الشك والغيرة أو إنه مابقاش يجهازي الأول وكل الكلام ده..

وفي نهاية الفيلم وبعد حدوث خناقة مدمرة، بيعترف الراجل وبيختم كلامه: عرفتي بقى أنا ماكنتش عايز أقولك ليه!

وطبعاً هو بيظهر بدور البطل اللي بقاله شهور كاتم في قلبه وساكت وهي بتضطر تسكت عن كل الجرائم اللي هو عملها في الكام شهر دول تحت مسمى «أنا كنت تعبان».

والست برضه نفس الكلام!

يعني لو إكتشفت إنها مابتخلفش أو جوزها ما عندوش القدرة عالإنجاب أو إن أخوه بيقول كلام وحش عليه أو كل الكلام ده، برضه بتخبي عليه..

وعند حدوث نفس الخناقة المدمرة، بيحصل نفس الكلام...

الزوجة بطلة الفيلم، والزوج ظالم!

وأنا قصدت أقول فيلم عشان دايماً بنلاقي الجميل دي في الأفلام:

- أنا كنت بعمل كده عشان أحميكي..

أو..

- أنا بقالي ١٧ سنة محبي عليكى إني إتعميت عشان
ما تقلقيش ..
ولا مثلاً..

- أيوة العيب فيك إنت يا صلاح، إنت اللي مابتخلفش...
وغالباً رد الطرف التاني بيبقى: يا حبيبي، وأنا اللي كنت
ظالمك..

وبينتهي الفيلم بمشهد ملحمي متأجج بالمشاعر !!

بس على أرض الواقع، الكلام ده ما بيحصلش.

عشان لما الإعتراف ده بيحصل، بيبقى الطرف اللي محبي
شايف إن معاه حق، والطرف التاني بيبقى فقد عنصر التسامح
لأنه شايف إنه سامح كتير وخلص طاقته خلصت..

طب ليه؟

كل ده ليه؟؟

يا جماعة إنتم في بيت واحد..

شاركها مشكلتك أياً كانت، خليها تشيل معاك.. وبدل
ماتدور على مبرر لتصرفاتك، لأ خليها تدور على حلول معاك.
صارحها...

صارحيه...

لو حصل موقف معاك وإنّ راجع من الشغل، لما ترجع
البيت شاركها...

ولو إنتي شوفتي حاجة أو حصل معاك موقف لمس عندك
حتة معينة، شاركه..

ولو إنت زعلان من حاجة معينة حتى لو هي مالهش
علاقة بيها، شاركها...

وإنّتي لو متضايقه من كلمة حد قالها عندك في الشغل،
شاركه..

مشاركة المشاعر دي حاجة في غاية الأهمية وبتخلينا نوصل
مع بعض لحالة إتزان مناسبة جداً في المرحلة دي..

بلاش تتعصب عليها وبدل ماتشاركها قرف يومك بالطريقة
دي، لأ إبتسم في وشها وإشركها في يومك بحلوه ومره بالطريقة
الي إتفقنا عليها..

وإنتي بلاش تشاركيه بطريقة التحقيقات والأسئلة والفوازير،
لأ بدل كده قوليله وخدي رأييه وإشركيه في الحاجة الي إنتي
عملتيها بالطريقة الي إتفقنا عليها..

مشاكل الأهل (الزيارات) ..

خلينا الأول نعرض نقطة مهمة جداً قبل ما نبدي نتكلم عن
مشكلة زيارة الأهل ..

في لغز كان محير العلماء كلهم وماكانوش لاقين تفسير منطقي
ولا مبرر للنظرية دي ..

نظرية إيه؟؟

النظرية الي بتقول: دائماً أو خلينا نقول في معظم الأحيان
بتلاقي مرات الإبن مكروهة، وجوز البنت محبوب؟؟!!

والنظرية دي قائمة بغض النظر عن الصفات الشخصية
والأخلاق من عدمهم بمعنى إن حتى لو أخلاق مرات الأبن
كويسة وتتخط على الجرح يطيب، وجوز البنت كان أخلاقه
سيئة جداً.. برضه النظرية دي شغالة، هو هيتحب وهيتوجدله
مبررات لتصرفاته الغلط وهي هتتكراه وكل تصرفاتها هتتفهم
بالمعنى الغلط...

طيب ليه الكلام ده؟؟

لإن النظرية دي من قديم الأزل..

في بعض الأعراف والديانات السماوية القوامة للراجل وده
خلي الأهالي يفكروا بالطريقة دي:

بما أن الراجل هو اللي قوام فبالتالي يقدر يهد البيت ويخربه
على البنت..

إذا أهل العروسة كانوا معتقدين إن كل ما عاملو جوز بنتهم
كويس، كل ما الموضوع ده عاد بالإيجاب على بنتهم في إستقرار
البيت وسعادتها.. فبالتالي مجرد ما إتجوز بنتهم، هم مجبرين
يعاملوه كويس حتى لو إكتشفوا بعد كده إنه مش كويس
إعتقاداً منهم إنهم كده بيحافظوا على بيت بنتهم من الخراب...
خرافات.

وبما أن الست ماتملكش القوامة..

إذا أهل العريس مش مجبرين يعملوها أي حاجة بل على
العكس تماماً. ده إنت بتلاقي إنهم بيعاملوها وحش جداً في
الأول عشان هي فرد جديد في العيلة ومجبرة تتعامل بطريقتهم
وبعاداتهم وتقاليدهم وكل أعرافهم، وطبعاً مش حاملين أي هم
لأن إبنهم قوام عليها فبالتالي إحنا نعمل اللي إحنا عايزينه وهي
مجبرة تستحمل.. برضه خرافات.

ومن ساعتها وهي عادة يتوارثها الأجيال وبتلاقي معظم الناس بتعامل على هذا الأساس للأسف..

أهل العريس يتصرفو على أساس إنهم في موقف قوة ومن حقهم يعملو الي هما عايزينه في العروسة.

فبالتالي أكيد العروسة بيبقى ليها رد فعل عال كلام ده فاي بكر هوها.

وأهل العروسة يتصرفو على أساس إنهم في موقف ضعف ومش من حقهم يعترضوا على أي تصرف لجوز بتتهم عشان ما يخرّبوش بيتها فبالتالي الي بيبقى ظاهر للناس إنهم يحبوه.. طيب لازم أوجه رسالة للطرفين..

رسالتي لأهل الزوج:

يا جماعة إنتم فاهمين الموضوع غلط، زي ما أنتم متخيلين إن في إيده سلاح قوي وهو القوامة فيعمل مابداله والكلام ده.. زي ما بالضبط لازم برضه تتخيلو هي إزاي ممكن تحول حياة إبنكم لجحيم وتعملوا حساب «إن كيدهن عظيم»...

إنتم كده بتأذوا أبنكم، لأن هو الي بيروح في الرجلين في الصراع الي بينكم ده..

إنتم عايزين تسيطر وا عالبت وتفرضوا عليها عاداتكم
وتقاليدكم وأعرافكم ولازم تعمل كده وتسمع الكلام ولو
ماعملتش كده يبقى الإنتقاد والكره هما الحل بالنسبالكم..
وطبعاً برضه إنكم هو الضحية لأنه بيحبها فحياته بتتشقلب
رأساً على عقب، يروح لأهله يلاقهم بيشتكوله من مراته
وقد إيه هي قليلة الأدب ومحتاجة شدة إلى آخره من الكلام
اللي يودي في داهية واللي مش شرط إنه يكون الواقع، بل هو
تضخيم للواقع، ويروح لمراته تلاقها بتحكيه وبتشتكيه من
كلام تاني خالص.. وفي النهاية الطرفين، الأهل والزوجة، مش
طايقين بعض والراجل مش عارف ينحاز لأي فريق عشان دول
أهله ودي شريكة حياته..

إدوها فرصة تثبتلكم إنها كويسة لأنها فعلاً كويسة (ولو هي
مش كويسة يبقى روحوا لومو إنكم عشان ده إختياره من
الأول)، هي كمان جاية من نفس المجتمع ونفس التقاليد بس
مش نفس العادات.. فخلينا نبقى أعقل من كده وبلاش النظرة
والتعامل يبقى أساسهم مراكز القوة والضعف والكلام الفاضي
ده، وخلينا نعيد الكلام بتاع تقبل الاختلاف تاني ونقول أننا
لازم نتقبل الاختلاف عشان مصلحة ابننا أولاً..

وعلى فكرة الأهل والزوجة برضه بتحصلهم مشاكل كثير بسبب التطبع في البداية، وفيها كل التفاصيل اللي قولناها قبل كده بس الفرق إن هنا الموضوع مايبقاش في حب قوي وبيقى برضه فيه حته مركز القوة بحكم السن بقى أو الخبرات العمريه أو أيأ كان..

ورسالتى لأهل الزوجة:

أنتم عمركم ماكنتو في مركز ضعف، أنتم فاهمين الموضوع غلط خالص..

أول الكلام لما العريس جالكم عشان يطلب إيد بتكم، كان من حقكم ترفضوه أو تقبلوه..

مين ساعتها اللي كان في موقف ضعف ومين قوة؟؟

ولما عرض عليكم إمكانياته المادية والتعليمية والثقافية كان من حقكم ترفضوه أو تقبلوه..

مين ساعتها اللي كان في موقف ضعف ومين قوة؟؟

ولما قولتو شروطكم سواء عن الشبكة أو أي إتفاق تضمنوا بيه حق بتكم..

مين ساعتها اللي كان في موقف ضعف ومين قوة؟؟

كفاية ولا أقول كمان؟؟

يا جماعة أنا مش بقول إنكم تتدخلوا في كل حاجة عشان ده أصلاً غلط، بس لو لقيتو الزوج بيعمل أخطاء بلاش تتغاضوا عنها إعتقاداً منكم إن ده هيحافظ على بتكم وعلى بيتها.. لأ ده ممكن بدل ما المشكلة كانت صغيرة وممكن تتقوم ساعتها، بتكبر وتتعظم لأن ماكانش فيه أي رادع فساء فيها ووسعت منه فخرب البيت... في حين إن شوية توجيهه عاقلين منكم كانت ممكن حلت المشكلة من قبل حتى ماتبتدي.

طيب خلاصة كلامي في الموضوع ده للطرفين، بلاش تمشوها مراكز قوة وضعف لأن مايفش حاجة دائمة واللي النهاردة في مركز ضعف وإنك إفتريت عليه هييجي يوم وتبقى بنتك هي اللي في نفس مركز الضعف ده وأهل جوزها يفتروا عليها.. لو كانت دامت لغيرك ماكانتش جاتلك.

طيب ماتخلونا ببساطة نحسبها صح ونفهم إن الأهل والعرسان برضه بيععدوا بمرحلة تطبع ولازم الموضوع ياخذ وقت لحد ماتوصلو لحالة الإتزان. واحدة واحدة يا جماعة، ولازم نبقى عارفين إن أي كره لأي طرف من العروسين ده معناه إنكم بتأذوا عيالكم بنفسكم..

وعشان كده كلامي اللي جاي هيبقى مبني على أساس إنكم فهمتموا كلامي وطبقتموه بطريقتكم وإن كلنا سواء وما فيش حد أقوى من حد غير الصح، دايماً أقوى من الغلط...

طيب، دلوقتي بقى عايزين نتكلم عن مشكلة زيارات الأهل..

المشكلة دي بتواجهنا برضه في بداية الجواز ويبقى الموضوع حساس جداً لأنه مابقاش بين الزوج والزوجة بس، لأده بقى فيه ماما وبابا وإخواتي وعيلتي..

في شكلين للمشكلة اللي بتحصل نتيجة زيارات الأهل:

١- المشاكل الناتجة عن زيارة الأهل لينا.

٢- المشاكل الناتجة عن زيارتنا للأهل.

هنمسك أول شكل وهو زيارة الأهل لينا...

طبعاً في البداية وبعد الرجوع من شهر العسل مباشرة، بيدأ أهل الطرفين في ترتيب ميعاد لزيارة العرسان الجداد..

ويبقى بيت العروسين عبارة عن متحف ومزار سياحي لإستقبال كم هائل من الزوار..

ومع كل زيارة لازم تاخذ الناس جولة في البيت ويتفرجوا
عالعفش.. في الأول العرسان بيبقوا مبسوطين لأن الناس كلها
بتشوف لأنهي درجة هما تعبوا وشقيوا وقد إيه هما ذوقهم حلو
وخلافه من الأحاسيس الجميلة المستشعرة.. لحد ما الأحاسيس
دي بتبدي بطبيعة الحال تتبدل بملل وزهق لأن الموضوع بقى
روتين في كل زيارة بيتقال نفس الكلام..

وبعد ماكل الأهل للطرفين خلاص زاروا العروسين وعملوا
الواجب، وكل الأصحاب والأقارب، وكل حد ماكانش حضر
الفرح لأي ظروف كانت عنده..

خلاص الزيارات الرسمية والمباركة إنتهت..

الصدام بيحصل بقى مع أول زيارة بعد الكلام ده كله، ومع
خروج كلمة بتضايق أحد الأطراف من أهل الطرف التاني..
والكلمة دي بتبقى زي جرس الإنذار بوقوع حرب أهلية!!

طيب الزيارات دي بتنقسم نوعين:

- زيارة أهل الزوج لبيت الزوجية.
- وزيارة أهل الزوجة لبيت الزوجية.

* نبتدي بأول نوع وهو زيارات أهل الزوج لبيت الزوجية..

يعني زي مثلاً أهل الزوج لما بيروحوا زيارة للعروسين،
والعروسة تضاييفهم طبعاً، هنا بيبدأ ينشأ نوع من الإنتقاد سواء
لطريقة المضايقة أو لمحتواها..

- الجمل الإنتقادية دي بنسمعها كثير:

لأبس الأكل كان محتاج تسوية أكثر من كده يا حبيتي، لأ ده
إنتي المفروض تغذي ابننا أكثر من كده شوية!!

إيه ده يا حبيتي، إنتوا بتاكلوا في الأطباق دي؟؟

مش واخدة بالك من نفسك ليه يا حبيتي، إنتي عايزة الولد
يبص برة؟؟

لأ ده إحنا دافعين كتير في العفش ده يا حبيتي، خلي بالك
شوية.

طبعاً إنتوا كده فهمتموا قصدي كفاية..

كل الجمل الإنتقادية من النوع ده غالباً بتعود بالضرر
عالطرفين، مافيش منها أي نفع على الإطلاق..

وطبعاً نظراً للنقطة اللي ذكرناها في الأول، إن أهل الزوج دايماً
بيدوروا على الطبايع المختلفة اللي عند مرات ابنهم وبينتقدوها

ويحاولوا يغيروها معتقدين إن ده حقهم ولاغيين تماماً فكرة إن الموضوع محتاج تطبع من الطرفين، هما وهي..

واعتقادهم كده إنهم بيأسسوا حياة كريمة لابنهم، عشان لو هي طباعها مش زي طباعه (والي هيه برضه طباعهم) هيحصل مشاكل بينهم والحياة هتبقى متذبذبة..

فالانتقادات بتزيد مع الوقت وبتتحول لدرجة الأوامر المباشرة، وبالتالي مرحلة التطبع بين أهل الزوج، والزوجة، بتأخذ شكل قاسي جداً وغير محتمل!! فأى محاولة لإبداء أي إعتراض أو رأي آخر بيبقى حكم الإعدام هو سيد الموقف خصوصاً بعد المعلومات اللي حصلنا عليها من مصادرنا إن الزوجة بتتآمر لقلب نظام الحكم..

ويحصل دمار شامل..

وهنا كل الأطراف بتبقى مسئولة عن الدمار ده، ولازم نتكاتف كلنا ونقعد قعدة عرب ونحل مشاكلنا..

في نصائح من وجهة نظري لكل الأطراف:

نصيحتي للأهل ..

طبيعي إن مرات إبنكم تبقى مختلفة عنكم وعن عاداتكم، ده مش معناه إن هي غلط عشان مختلفة. وطبيعي برضه إنها تكون مختلفة لأن هي لو مش كده ماكانش حصل إنجذاب بينها وبين إبنكم ..

ده مش معناه إن هي كل تصرفاتها الغلط من وجهة نظركم بتبقى مجرد إختلاف طباع بالتأكيد بتعمل بعض التصرفات الغلط اللي مايتخلفش عليها اتنين وده لأن ما فيش حد كامل أبداً وده برضه ممكن نسميه قلة خبرة منها ..

يبقى لازم الأول نفهم الغلط ده أساسه إيه، وبعدين نبتدي نتكلم شوية .. وبلاش النقد اللي مالوش أي فائدة غير إنه بيولد نوع من المشاحنات الغير منطقية والغير مبررة، خليها أحسن تيجي على هيئة نصيحة وبرضه مش في الأول .. خلينا في الأول دايماً نفرض حسن النية ونتعامل بحب ..

يعني لما نشوف الزوجة مثلاً بتضايفنا بطريقة زيادة وكأنا ضيوف وإحنا طباعنا مش كده خالص، يبقى نفهم من كده إنها كريمة، مش إنها مصرة تحسسنا إننا ضيوف. ونعديها ..

ولو بتضايقنا مش زي ما كنا متوقعين فده مش معناه إنها بخيلة أو حريصة، خلينا نحسبها إنها على طبيعتها ولسة مش فاهمة ومش عايزة تحسسنا إننا ضيوف. وبرضه نعددها..

ولما مثلاً تعتذر عن عزومة عندها يبقى ده مش لازم أبداً يكون عشان هي قليلة الذوق، ممكن بمتتهى البساطة تكون تعبانة أو عندها أي ظرف أو مش قادرة تستقبل حد في بيتها في الوقت ده أو مرتبة على حاجة معينة في اليوم ده مع جوزها والي هو ابنكم وهكذا من الأسباب المنطقية على فكرة، بس بتحتاج منا شوية تفكير وتقدير لظروف الغير..

وليه ما طلعتش الطقم الصيني لما عزمنا على الغدا؟ ده برضه ممكن يكون سببه إنها حست لو عملت كده هتخسوا إنكم ضيوف مش من أهل البيت خصوصاً إنها طلعت الطقم ده لما عزمتمكم أول مرة..

وهكذا ياجماعة من المواقف اللي لو حسبناها بطريقة تانية وبصينالها من منظور آخر وزودنا عليهم حسن النية وفرض الكويس قبل الوحش وخلطنا ده كله مع شوية بساطة هنلاقي كل المشاكل اللي ممكن تحصل في الجزء ده مش هيبقى ليها وجود من الأساس...

وبلاش أهل الزوج نفسهم يقارنوا نفسهم بأهل الزوجة
يعني بلاش شوف هي بتعمل إيه مع أهلها وشوف بتزورهم
قد إيه وأول يوم العيد قضته معاهم بدل عندنا وهكذا..

لأن المقارنة دي مش صح من الأساس، لأن طبيعي إن البنت
بتكون مرتبطة أكثر بأهلها ومامتها وإخواتها، ولسة مش متعودة
إنها تبعد عنهم وتنفصل بحياتها لأن بحكم إن دي عاداتنا
وتقاليدنا يبقى من نفس المنطق هنقول إن البنت بتقضي معظم
وقتها بعد الشغل في البيت.. عشان هي لو عملت عكس كده
المجتمع مايرحمهاش، طيب يبقى طبيعي إن إرتباطها بأهلها يبقى
محتاج وقت أطول عشان يتدي يروح لحد تاني.. وبحكم إن
الراجل في مجتمعنا يبقى له مطلق حرية الحركة فبالتالي معظم
وقته بعد الشغل يبقى خارج مع أصحابه أو على القهوة ولا
يلعب بلايستاشن أو أيأ كان مبرره لوجوده فترات طويلة برة
البيت.. فبالتالي الموضوع يبقى أقل عنده بكتير من البنت..

يبقى ده سبب تاني يخلينا نحسبها واحدة واحدة وبراحة لحد
ما الزوجة تثبتلكم عكس كده، يعني إفرضوا حسن النية من
تصرفاتها، قدموا الحب مرة واثنين وتلاتة، سيوها تثبت نفسها،
مش من أول غلطة نعلق المشانق، وإلتمسوها الأعذار، بعد ده
كله لو برضه لسة بتضايقكم ساعتها بجانب توجيهاتكم المنمقة

والمدرسة تروحووا تتكلموا مع إبنكم لأن أكيد هتلاقوا شرح مفصل لتصرفاتها عنده..

بلاش إنتقاد عمال على بطال ولا برضه نصايح على كل حاجة، الوزن والإعتدال هما كالعادة أسياد الموقف..

وجملة أخيرة لأهل الزوج: إعملوا مع إبنكم ومراته زي ماكان نفسكم يحصل معاكم زمان لما كتتم مكانهم..

طيب بالنسبة للزوج...

أنت برضه دورك مهم جداً في المشاكل المحتمل تحصل في الجزء ده..

لازم تبقى موجود وتوضح الأمور لأن معظم المشاكل بيبقى أساسها سوء تفاهم وبيتطور لو سكت ومافسرتش..

مراتك وأنت بتحبها وعارفها كويس وعديتوا بمرحلة التطبع وخلاص عرفتوا عيوبكم ومميزاتكم، المطلوب منك في الجزء ده إنك لازم ماتبقاش سلمي.. بلاش تاخذ جانب حد من غير وجه حق.

بمعنى إنك لازم تُحكّم بالعدل عى قد ماتقدر طبعاً لما يحصل موقف مُعين، ماتاخذش صف مراتك وتتحمق على أهلك أياً كان.. دول أهلك وليهم واجب التقدير والإحترام تحت أي ظرف.

بس برضه الواجب عليك تلفت نظرهم عشان وارد جداً يكون
الموقف ده مجرد سوء تفاهم بسيط بس محتاج توضيح ، وبحكم إنك
عارف مراتك أكثر منهم وخلاص المفروض إنكم إتطبعتم زي ماقلنا
وإتكلمنا فبالتالي إنت عندك شرح مفصل لكل تصرفاتها وفاهمها..

ولو شفت مراتك هي اللي غلطانة وجِهَهَا وبلاش تتحمق
عليها.. بسط الأمور وإعرف إن أهلك ومراتك برضه بيعدوا
بمرحلة التطبع الي أنت لسة جاي منها.

أنت حلقة الوصل بينهم إوعى تفتكر إن المشاكل دي مالكش
دعوة بيها.. لأ طبعاً، أحب أقولك إن أنت أصلاً السبب فيها!!

أنا؟؟ وأنا مالي!! هو أنا اللي بقولهم إتخانقوا؟؟

طب تعالى نقعد بس كده نتكلم شوية وأنا هشرحك...

بص ياسيدي زي ماقلنا قبل كده ومتفقين إن أي مشكلة ليها
طرفين غلطانين مش طرف واحد..

بس للأسف أنت كل اللي بتشوفه هو إن طرف واحد الي
غلطان وبالتالي لو مراتك الي غلطانة بتقول:

إنتي إزاي تغلطي في أهلي (مع العلم إن كل الحالات عمرها ما
تبقى غلط أصلاً، ده بيبقى مجرد إختلاف طباع وتضييق بصيرة)

وبتروح أنت في سكة إنك لو ماز عقتلهاش وما أخرجتهاش
قدام أهلك يبقى إنت كده مش بار بيهم!!

طب ليه؟؟؟!!

ولو أهلك هما اللي غلطانين فيها بتلاقيك برضه بتسكت
وتعمل مش واخذ بالك ولما مراتك تيجي تلومك على
تصرفك السلبي ده تلاقي ردك برضه: أيوة أعمل إيه يعني؟؟
إنتي عايزاني أرد على أهلي؟؟ اللي مالوش خير في أهله مالوش
خير في حد، وبرضه بتفتكر كده إنك بار بيهم..

طب برضه ليه؟؟

أنت فاهم الموضوع غلط خالص..

إختلاف الطباع بيخلي أهلك في الأول يشوفوا مراتك غلطانة
في تصرفات كتير قوي فلما يحصل صدام بينهم خليك عاقل
ووضحلهم في ساعتها وحالا إنها ماكانتش تقصد ده، أو كانت
تقصده بس هي عشان طبعها مختلف ومتريية على كده.. لازم
توضح وماتستناش، عشان موضوع الشرح كل ماخذ وقت
أطول كل ما النفوس هتفضل شايلة أكثر وأكثر.

يعني مثلاً هي بتحب الخصوصية وهما مصممين يقتحموا
خصوصيتها بتحب الهدوء وهما مصممين عالزجاج، أو هي
بتحب الإزجاج وهما مصممين عالهدوء وهكذا...

شفت دورك مهم جداً إزاي؟! شفت إن كرامة أهلك محفوظة
و برك بيهم مالوش أي علاقة بالموضوع ده؟؟

أما لو لقيت أهلك هما اللي غلطانين نتيجة إختلاف الطباع
برضه يبقى لازم تلفت نظرهم حالاً للموضوع ده.. بمنتهى
الهدوء مرة واتنين وتلاتة، إوعى تفقد أعصابك على أهلك مهما
كان حبك لمراتك..

بس لازم تتكلم معاهم وتوضحلهم إن إحترامهم ليها يعني
ليك أنت كمان وحبهم ليها من جهم ليك والعكس طبعاً
صحيح.. عُمر التوضيح ماكان عقوق..

ده في حالة إنك شايف طرف واحد بس اللي غلطان..

بس في الحقيقة إنك محتاج في أي مشكلة تتكلم مع الطرفين
وتوضحلهم قد إيه المشكلة صغيرة بس إحنا نبسطها على نفسنا
حب مراتك بس إياك تيجي على أهلك وتقصر معاهم عشان
فعلاً اللي مالوش خير في أهله مالوش خير في حد ولما قلنا الجملة
دي قبل كده كانت برضه صح بس في المكان والتوقيت الغلط..

وبر أهلك بس ماتجيش على مراتك وتقصر معاها..

نصيحتي بقى للزوجة ..

زي ما إنتي عايزاهم يتعاملوا معاكي على إنك بنتهم يبقى لازم تستحملكهم زي بنتهم وتتعاملي معاهم زي بنتهم وتحبهم برضه زي بنتهم ..

ولازم تخلي بالك إن أهله أكبر منك سنأ وأكثر منك خبرات حياتية وأمور مشابهة .. وكان مش يبحبوكي قد حب إبنهم ليكي لأنهم لسة ماشافوش منك حاجة كل الموضوع ومافيه إنهم شايفين إن ليهم الحق يغيروكي .. ماشي ياستي واحدة واحدة إثبتني ليهم إنتي إيه، إثبتلهم إنك فعلاً تستاهلي أحسن من المعاملة دي وإنك بتمري معاهم بمرحلة التطبع ..

فبلاش مكابرة وعناد وشوفوا الصبح إيه وإعملوه، اللي عنده صفة كويسة وضح يبقى التاني لازم يحترمها ومايجاولش غيرها لمجرد إن الصفة دي مختلفة .. بل بالعكس، ده لو عرف يطبقها يبقى أحسن وأحسن واللي عنده صفة غلط يبقى برضه بلاش مكابرة وعناد وحاولوا تصلحوها .. الكلام طبعاً لكل الأطراف ...

★ طيب النوع الثاني وهو زيارة أهل الزوجة لبيت الزوجية..

زي ماقلنا في بداية الجزء ده، إن أهل الزوجة بيبقوا شايفين إن مالهومش حق يعترضوا على تصرفات جوز بنتهم لا مع بنتهم عشان «مايسخنوهاش» ولا مع جوزها عشان مايجربوش البيت- في إعتقادهم- صح كده؟؟

وبرضه زي ماقلنا قبل كده وشرحنا إرتباط البنت الزيادة بأهلها، فبالتالي وإستناداً على البندين دول نقدر نقول إن المشاكل الناتجة عن زيارة أهل الزوجة للبيت مايتبقاش بحجم المشاكل الي إتكلمنا عليها..

كل الي عايز أقوله هنا إن أيوة لما تسعدوا جوز بنتكم ده هيعود عليها طبعاً بالسعادة، بس مش بالطريقة دي، مش بطريقة الإنكسار والرضوخ وكأنكم ماتقدروش تعملوا غير كده.. لأ.

طيب مانفس الكلام على فكرة ساري على طرفين الأهل، يعني برضه أهل الزوج لو أسعدوا مرات إبنهم برضه ده هيعود عليه بالسعادة..

فلو شفتهم أو لاحظتم إن تصرفات جوز بنتكم مش صح وهي مش مبسوطة وجت تستنجد بيكم يبقى بلاش سلبية وواجهوا وإعترضوا ورَبُوا...

تاني شكل بيبقى زيارتنا للأهل ...

قلنا كثير وهنعيد للمرة الأخيرة ..

ال بنت بتبقى مرتبطة بأهلها أكثر من الولد بحكم مشاعرها
الي أكثر وضيعف الكلام الي قلناه قبل كده ..

فطبيعي جداً إنها تطلب من جوزها بعد الجواز تزور أهلها
بإستمرار ..

وهنا يحصل شوية صدمات !!

لأن الزوجة بحكم إرتباطها بأهلها فبتطلب تزورهم كثير،
والزوج طبعاً مايبقاش عنده أي مشكلة لأن غالباً قبل الجواز
بحاجة بسيطة البنت بتتدي وتتوتر وتحس إنها لسة مش جاهزة
وخايفة إلى آخره من المشاعر المتلخبطة جواها والي بتخليها
بدون ماتشعر تتكلم مع شريك حياتها عن موضوع زيارات
الأهل ده وبتبقى المناقشة غالباً كالاتي:

البنت: حبيبي إنت هتخليني أزور ماما كثير، صح؟

الولد: طبعاً يا حياتي ماتقلقيش كل يوم جمعة هنزور عندي
وعندك ..

البت: طيب ولو إحتجت ماما في أي وقت غير الجمعة،
هتوديني ليها؟؟

الولد: لأ طبعاً!!

البت: إيه؟؟

الولد: بهزر معاكي يا حبيبي، أيوة طبعاً..

فبالتالي بعد المناقشة دي بتلاقي البنت إطمنت إلى حدٍ ما.

تعالوا نروح بقى لبعد الجواز..

الزوج في الأول بيبقى عارف كده من قبل الجواز وبيبقى
متصالح مع الفكرة دي.. بس بعد كدة لما بيلاقي نفسه يعمل
زيارات لأهل مراته أكثر من أهله بيتدي يعترض ويقارن
ويقول إشمعني؟؟

مع العلم إنه ممكن يكون مش فارق معاه قوي الموضوع
ده لأن في تصوره إن خلاص هو دلوقتي بقى راجل مسئول
ومستقل بحياته، بس لما يقارن زيارته لأهل مراته وزياراته
لأهله بيظهر عنده فجأة إحساس الذنب وعذاب الضمير إنه
مقصر مع أهله، والإعتراض ده بيظهر في شكل من إثنين:

- لو مرة طلب من مراته يزوروا أهله النهارده وهي كانت
تعبانة شوية ومش قادرة تنزل من البيت وطلبت منه يأجلها
لتاني يوم، بيثور جداً وبيظهر كائن الأبوهب اللي جواه متمثل
في دور الرجل الأخضر ومعاهم عم رمضان بتاع الفول..

وردوده غالباً بتبقى: مش أنا لسة موديكي لأهلك إمبرح؟؟
وأول ماقلتلك عايزين نزور أهلي عملتيلي تعبانة؟! طب ما أنا
الأسبوع اللي فات كنت تعبان ومع ذلك وديتك تزورهم؟
وهكذا من الكلام اللي بيبقى للأسف مبني على المقارنة، وده
قمة الغلط..

- الشكل التاني بيظهر مع أول مرة تطلب الزوجة تزور
أهلها بعد ظهور إحساس الذنب عنده بينفجر فيها برضه
وغالباً بيبقى رده: هو كل شوية أهلك؟؟ ده أنا بشوفهم أكثر
مابشوف أهلي!! إحسبيلي كده الشهر ده زرنا أهلك كام مرة
وأهلي كام مرة؟؟

طب ده اسمه كلام؟؟

ياجماعة الموضوع مش كده خالص..

ماتقارنش نفسك بيها عشان هنعرف بعد كده لما نتكلم
عالمقارنة إن دي قدرات..

إنت كنت تعبان وجيت على نفسك عشان تزور أهلها وهي
دلوقتي تعبانة ومش قادرة تيجي على نفسها، ده مش معناه إنك
عملت كده عشان خاطرها يبقى هي لازم تعمل كده عشان
خاطرك.. الموضوع عمره ما إتخسب كده..

هي كمان بتعمل حاجات عشان خاطرك وإنت مابتقدرش تعمل
زيها!!

لما تستحمل كلمة مهينة من أهلك عشان خاطرك، صدقني
لو الأدوار إتعكست أنت عمرك ما هستحمل الكلمة دي على
نفسك ومش هتسكت ولا حتى عشان خاطرها.. شفت بقى
إنها فعلاً قدرات!!

قادر تعمل حاجة إعملها وماتعايرهاش بيها بعد كده، ولو
مش قادر يبقى إعتذر وما تعملهاش أحسن بكتير من إنك
تعملها وتخسبها جميلة.

مافيش جمايل بين الأزواج، خدها مني نصيحة.

ولما هي كانت بتطلب منك كتير إنها تزور أهلها إنت كنت
بتوافق على فكرة، فماتجيش دلوقتي لما تحس بالذنب ناحية أهلك
تروح مطلع الكلام ده عليها.. واحدة واحدة الأمور هتعددي،
ولو تعبانة النهاردة معلش خليها بكرة مافيهاش مشكلة.

طبعاً لو أنت حسيت إن الحجج عمالة تزيد في كل مرة تطلب منها إنك تزور أهلك، ساعتها لازم تعقل وتعرف إن في مشكلة أنت مش شايفها.. بس لو أنت عاجلت الموضوع بينها وبين أهلك زي ما قلنا قبل كده من كام سطر، مش هيحصل موضوع الحجج ده من الأساس لأن الموضوع هيبقى بسيط وبُحْب وهيبقى لو قائلتك إنها تعبانة يبقى هي فعلاً تعبانة...
طبعاً وارد إن الأدوار تبقى معكوسة، يعني زيارات الزوج لأهله تبقى أكثر بحكم قرب المسافة بقى أو أياً كان، فبالتالي كل الكلام هيبقى معكوس بس نفس المعنى بالضبط...

كلمة كمان للرجال:

هي مالهش ذنب في إحساسك بالذنب..

إحساس الذنب ده معناه إنك مقصر، زي مانت مقصر في حاجات كتير في حياتك.. فخليك راجل قد المسئولية وحاول تعالج التقصير ده بدون ماتعلق شاعة تقصيرك عليها.

وكلمة زيادة للبنات:

لما تحسي إن في مشكلة بينك وبين أهله بتخليكي مش قادرة تروح لهم لازم تحاولي تحليها بالإستعانة بالزوج أو لوحدك.. المهم بلاش تحطيه في إختيار من أتنين:

- إما إنه يروح لأهله لوحده ويبقى شكله وحش..

- أو إنه يقصر في حقهم وما يروح وحش أصلاً.. عشان لو إنتي
مكانهم وابنك مش بيزورك ساعتها هتحسي إحساس وحش أوي..
هتعرفيه لما ربنا يرزقك وتخلفي وتكبري وتسهرى وتتعبى..

الغيرة..

خلينا نبقى متفقين إن الوزن والإعتدال لازم نخليهم دايماً في
الإعتبار..

وقبل ما نتكلم عن غيرة الحب لازم نبقى عارفين إن في كذا نوع
من الغيرة، بدايةً من غيرة الأطفال وبنلاحظها لما يبقى عندنا طفل
ويوصل مثلاً لسن الإدراك الحسي وبعدين ربنا يرزقنا بطفل تاني..

هنا بنشوف غيرة بريئة جداً نشأت لأن بطبيعة الحال الإهتمام
كله بيروح للمولود الجديد بحكم إنه محتاج رعاية أكثر، بس
الطفل الأولاني لسة مش مُدرِك الموضوع ده، هو بس بيعس إن
الإهتمام إتسحب منه وراح لحد تاني.

وعشان الغيرة دي بريئة جداً، حلها بسيط جداً جداً...

وهو إن إحنا نحاول على قد ما نقدر نوزن في المعاملة ونوزع
الإهتمام على الطفلين، ولازم الطفل الأكبر يفهم، سواء كان كبير

كفاية للمناقشة أو لأ، المهم إن لا بد يوصله إن ده طبيعة الحال
ونحاول نخليه هو كمان يتدي ياخذ باله من أخوه أو أخته
على قدر عمره طبعاً..

وفي نوع تاني اللي هو غيرة الحقد - يا ستار يارب - ..

أنا شايف إن فلان أو فلانة ما يستهلوش النعمة اللي هما فيها
عشان هما بخلاء جداً، وما يجبوش الخير لحد وطبعاً الصفات
دي مش شرط أبداً تكون موجودة في الشخص ده بالفعل وإنما
هي مجرد تبرير لحقدي عليهم...

والحل هنا هو كلمة واحدة بس.. الرضا..

صفة الرضا دي نعمة من نعم ربنا علينا، ولازم نبقى عارفين
إن ما فيش حد كامل. وإذا كان هو ناجح ومعاه فلوس كثير بس...
يتيم..

وأنا أو إنت أو إنتي مامعناش فلوس كثير بس ربنا يخليلنا
أسرتنا وأهلنا..

وأنا تعمدت أذكر مثال أنا قلتة قبل كده لأنني مصر أوصل
فكرة إن فعلاً ما فيش حد كامل..

اللي ناقص عندهم هتلاقيه زيادة عندك والعكس صحيح
تماماً.

وفي نوع آخر من الغيرة وده بينقسم لشقين:

الغيرة الهدامة

ودي لما تكون في شغلك وشايف حد متميز جداً والناس كلها بتتكلم عنه..

بينشأ هنا نوع من الغيرة والأفكار الهدامة، وبدل ما تتحمس وتحاول تجتهد في شغلك أكثر وتجبه بتلاقي نفسك بتبص لعجزك وكل ما زاد تميزه بيزيد إحساسك بالعجز.. مع العلم إنك لو حيت شغلك زيه هتتميز زيه وأكثر كمان.

أو مثلاً زي واحد ما ييجتهدش في شغله ولا في حياته عموماً، وبطبيعة الحال شايف أصحابه وعيلته بيتقدموا وهو واقف محلك سر وكل اللي بيدور في دماغه مجرد الأفكار الهدامة فقط.

دايماً يفكر إنه لو كان جاتله واسطة زي اللي جت لابن خاله كان زمان الحال غير الحال، أو لو كان وافق على الشغلانة اللي جاتله من ستين كان زمان الحال غير الحال..

الظروف دايماً هي شماعته..

إسمع بقى نصيحتي :

قوم أقف، حارب الظروف وماتفكرش بسلبية ومالكش دعوة بإبن خالك، إوعى تستسلم لقيود الظروف وإعرف إن كان في ناس أسوء من ظروفك بكتير ودلوقتي أصبحوا مخلصين في صفحات كتب التاريخ وكل العلوم الي عرفتها البشرية، وطالما إنت لسة بتتنفس وعاش يبقى إنت كمان تقدر وهتقدر تعمل أي حاجة..

أخرج من سجن الظروف وخليك حر..

وفي بقى الغيرة البناءة

والشخص الي بيغير غيرة بناءة هو الشخص الي بيعمل الحلول الي لسه قايلينها لعلاج الغيرة الهدامة..

الشخص ده دايماً غيرته بتدفعه لقدام..

طولنا قوي في الحتة دي ولسه ماتكلمناش عن الغيرة الي

ليها علاقة بكلامنا!!

معلش أرجو المعذرة، بس من وجهة نظري كان لازم نوضح إن الغيرة مش بس غيرة الحب الي بين الراجل والست عشان لو شفنا أي نوع من أنواع الغيرة الي ذكرناها في بيت الزوجية مع شريك الحياة، نكتشفها ونبقى عارفين نتعامل معاها إزاي في العموم..

طب ياللا بينا بقى عالغيرة الي ليها علاقة بكلامنا!!

غيرة الحب..

في كذا حالة للغيرة دي؛

- حالة الغيرة الزيادة.

- حالة إنعدام الغيرة.

- غيرة التملك.

- وحالة الإتزان في الغيرة (ودي الحالة المثالية ومابتولدش

مشاكل فبالتالي مش هنتكلم عليها).

أمال ذكرناها ليه؟؟

عشان هي دي الحالة الي عايزين نوصلها أو على الأقل

نحاول...

هنمسك أول حالة وهي:

الغيرة الزيادة...

* بالنسبة للست الي جوزها بيغير عليها زيادة عن اللزوم،

هو كان بيغير عليك قبل الجواز وكانت برضه غيرته زيادة بس

بحكم إنه مش معاك معظم الوقت فكانت الأمور بتعدي..

دلوقتي الوضع إختلف!!

إنتي طبعاً شايفه إن غيرته دي غير مسيبة وغير مقنعة بأي شكل من الأشكال بس في الأول كنتي دايماً بتقولي لنفسك إنه بيعمل كده عشان بيحبك ومع الوقت وخصوصاً بعد الجواز، بتبدأي تحسيها شك وتحكم مش حب خالص لأن الموضوع بدأ يبقى فعلاً صعب وغير محتمل..

هو كده من الأول ماتغيرش، الوضع هو اللي إتغير..

طب هو بيعمل كده ليه؟؟

السؤال ده فعلاً جميل، وقبل أي إنفعال أو نرفزة أو إتخاذ قرارات في الوقت ده، لو سألنا السؤال الجميل ده لنفسنا، فعلاً ممكن نلاقي أسباب كتير ترجعنا لعقلنا تاني وتحلينا نفهم بعض أكثر ونسامح أكثر وأكثر..

المهم، إنتي محتاجة تعرفي هو يفكر إزاي ويحسبها إزاي..

زي ماقلنا في الأول خالص إنه كان شاب وعارف الشباب يفكروا إزاي وعارف إن الدنيا مش أمان وعشان كده لما بتتجوزوا وخلص بقيتوا في بيت واحد، بتبدأ غريزة الحس الأمني للحفاظ والخوف عليكى.

(الي ذكرناها قبل كده بإختصار) في الظهور بقسوة زي
بالضبط الحارس الشخصي للوزير..

لما بيقول إن في خطر، كل الموجودين بما فيهم الوزير شخصياً
بسمع كلامه...

مايسألش في إيه، لأ ده بسمع كلامه وينفذه حرفياً لأنه واثق
إن الحارس بيعمل كده حفاظاً وخوفاً على حياته!

بس طبعاً المثال ده بالنسبة للوزير، والحارس الشخصي بتاعه
مش بيجير عليه أكيد. هو بيحافظ على حياته وبيظهر ده على
صورة أوامر للوزير زي «إتحرك حالياً يا سيادة الوزير، في خطر
على حياتك»

وهو مش شرط يكون بيحب الوزير أو بيكرهه.. الموضوع
كله إن دي وظيفته..

لو قسنا بقى الكلام ده على جوزك هنلاقي إن زيادة على
الحس الأمني المشترك بينه وبين الحارس الشخصي للوزير
إنه بيحبك وفعالاً خايف عليك وعايز يحميك بس مش
من الطلقات النارية بقى، لأ دي النظرات النارية والتلميحات
النوية والكلمات البايوكيميائية، هو عارف الرجالة يفكروا
إزاي ودماغهم وحركاتهم ومعظم تصرفاتهم على عكسك تماماً
لأن إنتي مش راجل زي كمان ما هو مش ست..

الموضوع مالوش علاقة مين أذكى من مين على قد مالفكرة زي ماقلنا سابقاً وهنعيد «الموضوع ببساطة إن ربنا - سبحانه وتعالى - خالق الراجل والست بعقليات مختلفة».

أنا معاكي إن الموضوع زيادة عن اللزوم وبيبان تحكم وكل الحكايات دي، وماقولكيش أبداً إرضي بالأمر الواقع.. بس كل اللي بقوله إنك لازم تبقي فاهمة هو بيعمل كده ليه. وأنا رايحله دلوقتي عشان أتكلم معاه شوية..

بص يا سيدي، هي مالهاش ذنب إنك فاهم وعارف تلميحات ابن عمها اللي متربي معاها...

لأن هي مش فاهمة ده، إنت اللي فاهمه. يبقى توصلها الموضوع ده بالهداوة كده وواحدة واحدة وماتتوقعش إنها تتغير معاه تماماً لأن هو بالنسبالها ابن عمها وأخوها الصغير اللي متريية معاه ومستحيل تفكر فيه غير كده، وهو كان قدامها لو كانت مشدوداله أو معجبة بشخصيته أو أي تخيل ممكن يوصلك كانت إتجوزته...

لازم تديلها مساحة من الحرية تعبر عن نفسها وخليك جنبها مش ضدها، ثق فيها وفي نفسك أكثر شوية وهنتكلم عن الثقة كمان شوية بس كل اللي هقولك دلوقتي إن غيرتك الزيادة

دي بتبان شك وعدم أمان وبتخليها بدل ماتركز معاك ومع
سعادتك، لأ دي بتركز في تصرفاتها زيادة عن اللزوم لدرجة
إن الموضوع ده بيخليها دايماً مش مبسوطة وبالتالي عمرها ما
هتعرف تبسطك...

* طيب بالنسبة للست اللي بتغير على جوزها زيادة عن اللزوم،

معظم حالات خيانة الرجل بيقي ليها سبب من اتنين..

يا إما أصلاً الزوج مش كويس وما ييملاش عينه غير
التراب!!

أو تقصير من الزوجة لأنها أهملت في حق جوزها ونفسها،
وماعرفتش تشد جوزها تاني ليها بأي طريقة، أو بطباع غلط
مضايقه وهي مصممة عليها ومابتحاولش تغير من نفسها، لا
علشانه ولا عشان نفسها حتى.. ومن ضمن الحالات هي حالة
الغيرة المرضية من الست على جوزها..

تلاقيه بيتفرج عالتليفزيون وفجأة جه إعلان أو كليب المهم
في بنات صواريخ ولبسهم ضيق ولا قصير، تلاقيها بتقول كلام
منافي للمنطق ومالوش أي لازمة غير الإستفزاز..

زي إيه مثلاً؟؟

زي: هو أنا كل ما أسبيك لوحذك وأرجع ألايك بتتفرج
عالحجات دي والسئات العريانة؟؟

إقلب القرف ده.. بس ياستي أنا بتتفرج عالماش ودي
إعلانات؟؟

ما أنت لو كنت بتخاف ربنا كنت قلبت من غير ما أنا
أقولك بس تلايك عاجبك الموضوع!!

*إنتي لو واثقة في نفسك وواثقة أنك مالية عينه يبقى
عمرك ما تهتقولي الكلام ده ولا القريب منه حتى*..

المهم عبارات من هذا النوع المستفز والي بيحرك مشاعر
الثورة والخناق عند الراجل ويستفزها..

ولا مثلاً لقت جوزها بيتكلم في الأوضة جوة ومش جنبها،
تلايقها داخلة عليه الدخلة بتاعت المباحث دي

وبتقوله: بتكلم مين؟؟ وياسلام لو هو إتلججج في الرد!!

بس خلاص يبقى هو بيخوني مع إنجي أخت سارة زميلة
أشرف في الشغل عنده والي شافها مرة لما كان معزوم عند علاء
بتاع الحسابات ساعة ما مراته ولدت، وبيرتبوا عاجلواز يوم
الخميس الساعة ٦:٣٠

وكل حاجة خلاص إنتهت، وهانت عليه العشرة وأيامنا
الحلوة؟؟؟

ياستي إستهدي بالله بس، مش يمكن يكون بيحضرلك
مفاجأة؟ أو بيكلم واحد صاحبه وواخدين راحتهم في الكلام؟
أو حد من أهله بيكلمه وبيشتكيله من حاجة معينة؟؟؟

فمش معنى إنه إتجلج في الرد عليكى لما سألتيه بتكلم
مين، أو مثلاً شاورلك بإيده عشان توطي صوتك أو تسكتي أو
أياً من التلميحات الثانية، إنه بيخونك!!

قمة الإحراج بالنسبة ليه لما حد من أصحابه أو أهله
يسمعك وإنتي بتقوليله بتكلم مين؟؟؟ وبيسمع تريقة وكلام
سخيف ييمس كرامته كراجل، إنتي مش متخيلاه..

وبدل ماكان الموضوع مجرد مكالمة تليفون، لأ ده أصبح مادة
خام للخصام بينك وبينه..

كل ده عشان إنتي بتغيري عليه ومعتقدة إن دي حاجة بتعبر
عن الحب العميق!!

طب ليه؟؟؟

ليه ماتسييلوش إنتي برضه مساحة من الحرية والبساطة في التعبير عن نفسه من غير روح المفتش وظابط المباحث دي ماتظهر؟؟

بلاش غيرتك تبقى زيادة عن اللزوم وتعطي الحاجة أكبر من حجمها الحقيقي عشان صدقيني هو لو عمل معاك كده هيخليكي توصلي لمرحلة من الجنون الي بتؤدي للإنتحار..

لو هو دايماً حاطك في موضع الإتهام وكل حاجتك الخاصة وتليفونك وشنطتك والحاجات دي إعتبرهم أدلة إتهام ولازم يتفتشوا، صدقيني مش هتستحملي..

الي إنتي بتعمله بيان كده، وبيتفهم كده..

لو إنتي فاكرة إنك كده بتحافظي عالبيت وعليه، بل على العكس تماماً ده إنتي بتدمري بيتك وتبديله بدل المبرر ألف مبرر للخيانة الي إنتي أصلاً بتعملي كل ده خوفاً منها!!

ماتفتشيش في تليفون جوزك ولا هدومه ولا تشميه وهو داخل وكل الكلام الفارغ ده..

ماتصليش بيه تقويله: أنت فين؟؟ إزاي عالقهوة يعني، ده أنا مش سامعة صوت حواليك خالص؟؟ حمام إيه؟ وماقلتش ليه إنك في الحمام من الأول، ليه قولت عالقهوة؟؟ إنت أكيد بتعمل حاجة غلط!!

جوزك مش غبي وما فيش راجل متجوز وغبي وحتى لو
هو كده فبتلاقي ميت ألف واحد من أصدقاء السوء الخبرة
يدلوه على السكة الغلط.. فلو عايز يعمل حاجة من وراكي
هيعملها ومش هتعرفي..

الغلط دايماً الطريق ليه سهل جداً، والكذب عشان نداري
الغلط ده أسهل وأسهل..

بدل ماتفتشي في جيوبه وتعملي خبيثة - مع العلم إنه بيبقى
عارف وشكلك بيبقى بايخ قوي قدامه - إسأليه على سبيل
الإطمئنان وليس الشك وهو هيقولك كل حاجة.

وبدل ماتفتشي في تليفونه إسأليه يومه كان عامل إزاي، أسهل
وأبسط بكثير.. وأهي منها مشاركة ومنها إنك بطمني قلبك..

ولو كذب عليك مرة والثانية والثالثة، ولقى منك حُسن
النية صدقيني المرة اللي بعدها هيتكسف من نفسه وضميره هيأنبه
ومش هيعمل كده.. لأن أصلاً في بينكم حب من الأساس!

وعلى فكرة طبيعة الرجالة إنهم ما يهتموش بالتفاصيل قوي،
فبالتالي لو سألتيه يومه كان عامل إزاي رده هيبقى كالاتي:
تمام الحمد لله. وده طبعاً رد مش هيعجبك عشان خالي
ومجرد من التفاصيل.. ماتخانقيش معاه، ولا تفهمي إنه

بيخبي حاجة عليكى أو بيخونك أو كل الحواديت والأساطير
دي..

هو رد الرد ده عشان دي طبيعته وفطرته والرجالة كلهم كده
أو قريبين من كده.. ده مش عيب فيهم.

*على فكرة الكلام بتاع طبيعة وفطرة الرجالة وطريقة
تفكيرهم دي دراسة وأبحاث موجودة، بس أنا مش هخوض
فيها لأن مش هدف الكتاب هو إثبات ماتم إثباته بالفعل. لأ
إحنا هدفنا نربط الكلام بالواقع اللي بيحصل*

خلي جوزك على طبيعته قدامك، بلاش تخلي سعادته وطبيعته
مع أصحابه أو أهله أو... واحدة تانية!!

صح كدة؟؟

خلي سعادته وطبيعته معاكى وبيكى..

إيه المشكلة لما زميلته تكلمه أو تبعتله رسالة تطلب منه
يجيب فلوس الجمعية بكرة أو إنه بيعت أيميل للمدير الصبح
عشان عايز كذا وكذا!؟

هتقوليلي مانا ما عنديش مشكلة في الكلام ده، أنا عندي
مشكلة إنه ببيخبي عليه؟ طب ليه ما قالش؟؟

عشان عارف إنه لو قالك هتتعدي تستجوبيه وهتضيعوا
اليوم كله في خناق بسبب الموضوع ده..

هو عارف إنك دايماً شاكة فيه، وده واصله من غيرتك
الزيادة عليه. وعارف برضه إنه مايعملش حاجة غلط، يبقى
يجيب وجع الدماغ لنفسه ليه؟؟

ليه الموضوع الي يعدي ببساطة ومن غير أي إتهامات ولا
شك ولا غيره ياخذ أكبر من حجمه..

فيخبي عليكى أو بيسكت مايقولش أو بيتلجلج في الكلام لما
تسأليه لأنه ساعتها يبقى يفكر يخبي ويريح دماغه ولا يقولك
وتتخانقوا؟؟

للمرة الأخيرة هقولك خليه على طبيعته معاكى وماتخطيهوش
دايماً تحت ميكروسكوب، بمعنى إنك لازم تسييه براحتة وتديله
مساحته من الحرية عشان ده فعلاً هيعزز علاقتك بيه وهيفتح
مجالات كتير للكلام بينك وبينه وتشاركوا بعض أكثر وتقل
خلافات كتير كان ممكن تحصل..

وأنت برضه حاول على قد ماتقدر ما تستفزش غيرتها، ولو
زودتها شوية لازم تبقى عارف إنها بتعمل ده بدافع الحب (أنا
عارف إنه غلط، بس أنا قولتلها تعمل إيه خلاص ماتقلقش)..

وحاول ببساطة وواحدة واحدة تخليها تثق فيك وفي تصرفاتك
يوم بعد يوم..

في الأول الموضوع هيحتاج منك تبرير لكل تصرفاتك وده شيء
يفوق التحمل أنا عارف، بس صدقني أنت قدها..

ومع شوية صبر وضيف عليهم ثقتك في نفسك وفيها،
هتكون النتيجة بيت متزن يكاد يكون خالي من الغيرة الزيادة
عن اللزوم!

النوع اللي بعد كده هو إنعدام الغيرة..

هنا أنا هتكلم على الزوج والزوجة على حد السواء، يعني
الكلام ليكم إنتم الإثنين المرة دي..

لما قلنا إنعدام الغيرة كان المقصود هو قلة نسبتها.. بمعنى إن
مقارنةً بالغيرة الزيادة هتبقى إنعدام غيرة، بس في العموم هي
ما بتقاش منعدمة تماماً، لازم تبقوا عارفين إن إحساس الغيرة ده
فطرة جوانا كلنا.. في ناس بتعبر عنها وبقسوة كمان، وفي ناس
ما بتعبرش عنها بالشكل المطلوب أو المفهوم..

الحل هنا مش إن إحنا نتصنعها عشان مانبانش باردين..

ماتظهر وهاش غير لما تحسوا بيها لأن إحساس الغيرة ده ماينفعلش حد يوجهكم ليه ويقولكم تعملوا إيه، لو مش نابع من جواكم يبقى مالوش لازمة..

ماتسمعش حد يقولك لازم تغير عليها أو لازم تغيري عليه عشان ساعتها الموضوع هيبقى مزيف وهيبان إنه مزيف.. والزيف ده هيوصل للطرف التاني، فالموضوع بدل مايبان غيرة حب جميلة، لأ ده بيظهر حاجة مصطنعة ملهاش لالون ولاطعم.

يعني لو هو مايبغيرش عليك بالشكل المعروف والمطلوب وبالنسبالك ده بارد عاطفياً، إعرفي إنك غلطانة لأن هتلاقه بيعبر عن حبه ده بطرق تانية كتيرة غير الغيرة، وسعي مدى نظرك وإنتي هتلاحظي وهتأكدني من كلامي.

إنتي الكائن الوحيد اللي المفروض تحسي بحبه ليكي، فدوري على تصرفاته كده هتلاقه بيعبر عن الحب ده بحاجات كتير وتصرفات أكثر أسمي من الغيرة..

والكلام نفسه ليك برضه..

وأخيراً وليس آخراً، لازم كل الأطراف تفهم إن الغيرة دي تعبير من ضمن التعبيرات عن الحب زيهازي الحزن ومسكة الإيد وهكذا.. إتعاملوا معاها على هذا الأساس..

وآخر نوع من الغيرة هو غيرة التملك...

وفي الجزء ده برضه هتتكلم عن الطرفين سواء..

غيرة التملك بتبقى وجه آخر من الغيرة الزيادة عن اللزوم لدرجة إنها بتوصل لمرحلة التملك، يعني أنا عايزك ليه أنا لوحدي وبس، فبغير من أي شيء أو أي حاجة ممكن تاخذك مني بأي شكل من الأشكال أو حتى تشتت تفكيرك عني!!

ودي بتبقى فعلاً غيرة مرضية ومحتاجة إن الطرف اللي عنده المشكلة دي يفهم إن اللي هو بيعمله ده غلط وإنه كده بيخلق قبلة موقوتة هتتفجر في وشه في نهاية المطاف لأن إحنا مهما وصلنا لدرجات الزهد في الحياة فبرضه مستحيل نعيش من غير وجود ناس في حياتنا وحوالينا، غير كده هتبقى منفى مش حياه..

لازم نبقى فاهمين إن مهما كانت قوة الحب وشدته، ده مالوش أي علاقة لا من قريب ولا من بعيد بالتملك..

لأن مع إحساس التملك ده، بيظهر نوع تاني من الأمراض اسمه الغرور ثم الملل فالتغيير..

يعني مثلاً، شوفت عربية أحدثت موديل فعجبتك وإشتريتها، وإتمنظرت بيها قدام الناس كلها وحسيت إن مافيش حد قدك من الناس دول اللي إنت تعرفهم فتوصل معاك للغرور (مانت

معاك حاجة مش مع غيرك ولا حتى هينفع حد يجيها).. ومع مرور الوقت بتستخدم العربية والسنين بتعدي فبتزهق منها وبتبتدي تدور على غيرها بطبيعة الحال...

طبعاً مع الاختلاف الشاسع بين المثال ده وبين كلامنا إلا إنه يمس الموضوع من الخارج.. هو مثال بسيط عشان نقدر نفهم إن حب الإمتلاك دايماً آخرته وحشة ومزرية..

طب ليه من الأول؟؟

ليه من الأساس؟؟

كل ما الحاجة كانت بعيدة عنك كل ما إحتياجك ليها أصبح ضرورة مُلحة..

حد هيقوللي يعني المفروض نعمل إيه عشان إحنا تُهنا؟؟

هرد عالحد ده وأقوله: من وجهة نظري غيرة التملك دي غير إنها بتؤدي لإنفجار الطرف الثاني مع مرور الوقت لأنه بيتخفق من الوحدة المُسببة لأدي كمان بتأذي الطرف الي عنده حب التملك نفسه..

وبتبقى مجرد حب إقتناء أكثر منها غيرة..

يعني ضررها بيبقى عالطرفين..

ده غير حاجة تانية مهم جداً نذكرها..

لما تغير من كل حاجة وعلى كل حاجة ده هيحط شريك حياتك في وحدة قاتلة وإنْت هتبقى الحل والمنفذ الوحيد ليه عشان يخرج من الحالة دي فبالتالي بدل ما إنت تعيش بحرية مقننة لأ ده إنت عملت في نفسك حاجة هتشتكي منها وهتندم عليها بقيت عمرك... أنت خلقت طفل زنان جداً معتمد عليك في كل خطوة وكل تصرف وكل حاجة. ومهما كنت فاكِر إن دي حاجة كويسة، أحب أقولك إنك غلطان..

لأن لو الموضوع كان حلوا ماكانش هيبقى حلم كل الأزواج هو التفتح والإنطلاق والثقة وحرية التصرف..

طيب يبقى ولا إن كل طرف يبقى مستقل بذاته ده شيء حلوا، ولا كمان إن كل طرف يبقى معتمد تمام الإعتماد على الطرف الثاني في كل حاجة..

من هنا نشأت نظرية المشاركة، ومن هنا لازم نقول إن الوزن والإعتدال هما حل اللغز..

ويا جماعة للفهم مش للحفظ، الغيرة بتبقى عشان أنا بحبك بغير عليك.. فلازم لما الغيرة دي تظهر، يبقى برضه تظهر بحب لأن أساسها الحب، مش تظهر كسلاح محرم دولياً..

الثقة..

بجانب إن إنتي نصيبه وهو نصيبك، هو كان قدامه بنات
العالم كلها بس إختارك إنتي..

وهي دوناً عن رجالة الكوكب إختارتك إنت..

مستني أسمع حد بيقول: سمعنا الكلام ده كتير قبل كده
وعارفينه وحافظينه.

ده كلام إنشاء...

هرد عليه: هي كانت نقطة لا بد تتقال، لأن الي أنت تعرفه
في غيرك ما يعرفوش.

طيب الجديد بقى..

سبيه يبص عالبنات في الشارع ولا التلفزيون وخلافه وإنت
سيبها تهزر مع ابن خالها عادي!! في حدود الأدب والأعراف
طبعاً..

لازم يشوف عيوب ومميزات غيرك عشان تظهر مميزاتك، لأن
مع الوقت هيتعود على مميزاتك وهتبقى بالنسبale عادي.

أما بقى لو إتشد للحد الثاني ده، وبدل ماتظهر مميزاتك لأ ده
مميزاتها هي اللي ظهرت.. يبقى إنتي إختيارك لشريك حياتك
كان غلط من الأول، فماتزعلش..

ساعتها هتحتاجي إعادة هيكلة لنفسك ولا بد تغيري من
نفسك وتستخدمي ذكائك عشان تخليه يرجع تاني للفيلم اللي
هو بيحبه من الأول..

وانت كمان تحت نظرك ورعايتك سيبها تنطلق بحريتها
زي الفراشة الرقيقة جرب تمسكها من جناحها كده؟ هتدبل
وتموت..

ولو راحت لحد غيرك واستقرت عنده يبقى برضه إختيارك
كان غلط من الأساس!!

وساعتها إجمع القوات واعلن الحرب على نفسك لحد
ماترجع تاني تبقى الأمير اللي هي حبه..

بس أنا واثق إن لو عملتم ده، يبقى ولا هو هيسيبك ولا هي
هتروح لحد غيرك..

ثقوا في بعض وفي نفسكم، الموضوع هياخد شكل تاني
خالص..

خليك واثق فيها وفي نفسك..

وإنتي خليكى واثقة فيه وفي نفسك..

لا إنت ملك جمال الكون ولا هي ملكة جمال المجرة، فلو شاف بنت جميلة وأبدى إعجابه بعجها عايزك تحسبها ببساطة..

هي جميلة.. بس إنتي مراته.

هي جميلة.. بس إنتي عشرت عمره.

هي جميلة.. بس إنتي حب حياته.

هي جميلة.. بس إنتي اللي بيترمي في حضنها ويشكيلها همه.

هي جميلة.. بس إنتي حنانه.

زي الهدوم في الفاترينة بالضبط، حلوة وغالية وشيك.. بس مش لايقة علينا ولا مناسبة لينا.. دي للفرجة فقط!!

وعلى فكرة، لما بنشوف هدهد على الشجرة بنقول سبحان من أبدع هذا الجمال.. والموضوع يبقى عادي جداً..

فلو عايزة تغيري عليه وماتثقيش فيه يبقى الأولى تغيري من الهدهد!! أو تعتبري إن البنت دي في قفص!!

يبقى الحل إنك محتاجة تثقي فيه وفي نفسك شوية أكثر من كده..

وبالنسبة لك إنت كمان لما تلاقيها بطبيعتها مع ابن خالها أو
زميلها في الشغل ..

إوعى تاخدها على كرامتك ورجولتك، عشان هما متحافظ
عليهم كويس قوي.

الموضوع وما فيه إنها واثقة فيك وإنت كمان لازم تثق فيها..

لازم تثق إن إنت أمانها وحصنها.

لازم تثق إن إنت حبيب عمرها.

لازم تثق إن مهما حصل هتفضل إنت جوزها وقلبها.

وخليك دايماً واثق في إخلاصها ليك وعشقها.

خليك فنان راقي بمشاعرك وبتراقب فراشة في قمة الجمال
والروعة عشان ترسمها وتستمتع بجمالها، مش عشان تصطادها
وتحبس سحرها..

وكم إن كنت عايز أقولك حاجة كده بيني وبينك، مجتمعا
وعاداتنا وتقاليدنا لوحدها كفيلة إنها تخليها عايشة في ضغط
طول حياتها قبل ماتتجوزك.. ماتبقاش إنت كمان ضغط عليها
وبدل ماتعيشها فراشة زي ما كنت بقولك لأ ده أنت بتقتل شوية
الطاقة والحياة اللي باقين جواها.. خليك سند ليها وصحي
الحياه والأمل جواها وخليك واثق فيها..

وإنتي خليكى الأميرة صعبة المنال، والسهلة البسيطة في نفس الوقت.. خليكى الأميرة الواثقة في نفسها اللي مافيش حاجة تهزها.. واللي عارفة ومتأكدة إن أميرها مهما شاف وصيفات، لا يمكن يروح لواحدة منهم عشان هما وصيفاتك وإنتي الأميرة بتاعتهم..

الممنوع مرغوب..

تأكدوا يا جماعة إن الممنوع دايماً مرغوب..

بمعنى إنك لو منعتي جوزك من إبداء رأيه عن أي بنت في التلفزيون بقى أو في الشارع أو واحدة من قرايبه أو أياً كان، ومنعته من الإتصال بزمايله في الشغل بنات أو ولاد أو مساعدة بنت خاله لما تحتاجه بحجة إنها مايصة كده ومش عاجباكي وهكذا من التصرفات اللي بتبقى بالنسبة ليكي غير مقبولة نتيجة غيرتك الزيادة عليه وعدم ثقتك في نفسك وفيه، وده بالنسبale هو التعريف المنطقي للممنوع..

هتلاقيه تحول لشخص حاسد وحاقد على أصحابه اللي زوجاتهم مابتعملش كده وبتشق فيهم، وبالتالى هتلاقيه حتى لو إنتي مش بتعملي حاجة غلط بس كَرَدَ فِعْلَ طبيعى منه هيمنعك من حاجات عادية بحجة الغيرة برضه!!

وإبقي إعتري ساعتها..

هتلاقي كلام زي الرصاص محتواه ومضمونه إنك إنتي كمان
بتعملي أكثر من كده...

ما بقولكيش سببي الدنيا كده ولا بقولك ماتضايقيش لما تحسي
إن الموضوع خرج من نطاق الأدب واللياقة ودخل في سكة إعجاب
والكلام ده..

لأ طبعاً، إنتي ساعتها لازم تدافعي عن حبك وبيتك وبشراصة
كمان وما حدش هيقدر يلومك. بس كل اللي بقوله إنك تستخدمي
الحاسة السادسة واللي مجودة بغزارة عندك عشان تعرفي الفرق بين
مجرد المجاملة وإبداء الرأي والتصرف بطبيعية، وما بين الإعجاب..
وشوفي إيه اللي ناقص عندك وحاوي تكمليه أو على الأقل
إظهري اللي عندك وبروزيه!

الكلام ليك أنت كمان على فكرة، بس عشان مانكررش
كلامنا هعيدلك بس جملة: ثق في نفسك وفيها..

بلاش يا جماعة تمنعوا المرغوب وخليه أحسن قصاد عنيكم
أحسن ما يبقى من وراكم وعالجوه..

عشان لو بقى من وراكم هيبقى ليه مسمى تاني خالص
مش خيانة على قد ماهو مجرد مرغوب!

وطبعاً كلامي مش عن نماذج الرجال أو الستات اللي
مايملاش عينهم غير التراب..

أنا كلامي عن النماذج اللي بتغلط آه..

بس قابلة للتوجيه!!

المقارنة،،،

كائن المقارنة ده كائن متوحش وشرس جداً.. مايبصدق
يلاقى فريسة عشان يتغذى عليها ولما الفريسة بتقع بين إديه
ماياكلهاش على طول، لأ ده بيتسلى عليها لحد ما يخرب البيت..

الكائن ده موجود بالفعل فينا كلنا بس في اللي بيأكله ويغذيه
ويهتم بيه لحد مايكبر، حيث يتغذى هذا الكائن على الحقد
والغيرة الهدامة والكراهة، فعلى حسب نشأته..

وفي اللي مايبغذيهوش أو يبغذيه شوية غيرة صغيرين على حبة
كره مبررين ومقننين، وبالتالي يادوب الكائن ده بيبقى عايش
ومايبقاش في كامل قوته فبتقل شراسته قوي وبيبقى ممكن
نتحكم فيه..

في فارس واحد بس شجاع، وهب حياته لمحاربة كائن المقارنة
الشرس.. عاش عمره كله يدرس دورة حياته كويس قوي

وأصبح متمرس في القضاء عليه بمنتهى البساطة، ولحد يومنا ده
مش عارفين إزاي بيقدر يهزمه ولا إيه الأسلحة اللي بيستخدمها
ضده.. ده فعلاً لغز حير ناس كتير، بس كل اللي إحنا عارفينه
إنه فعلاً بيهزمه بمنتهى السهولة.

فارس «الرضا والقناعة».. ده اسمه ولقبه، ويعيش في الجبال
ودور العبادة..

يكفي بس إنك لما تلاقي كائن المقارنة المرعب شافك
وجاي عليك من بعيد أهو وشايفه يقرب منك، غمض عينك
وفكر في فارس «الرضا والقناعة» هياخد شوية وقت ويجيلك
ويدافع عنك ويجبس الكائن المقزز ده بعيد عنك وطول ما أنت
بتستجد بيه هيفضل حابس كائن المقارنة..

وقرر الفارس الشجاع إنه يفتح مدرسة لتعليم الناس كيفية
القضاء على الكائن ده بس للأسف لسة مظهرش حد في قوة
الفارس ده وشجاعته..

آه نسيت أقولكم إن الكائن ده ماييموتش، هو ممكن يتحبس
بس.

في كلمات سحرية لو قلتها عن إقتناع، الفارس هيوصلك
أسرع مما تتخيل..

الكلمات السحرية دي كثير، هنذكر بعضها دلوقتي حالا :

- الحمد لله على كل شيء.

- اللهم أدمها علينا نعمة وإحفظها من الزوال.

- ألف حمد وشكر ليك يارب.

وكل الكلمات اللي ليها علاقة بالفكرة دي..

دلوقتي بقى هنجرد كائن المقارنة من لقب «كائن» عشان مش عايزين نديله أكبر من حجمه ونعظمه، لأن بعد مانفهم إزاي نتعامل معاه ونفهم تفاصيله هيبقى فعلاً صغير قوي..

المقارنة بتبتدي دايماً بكلمة «إشمعني؟» ويبقى أساس الكلمة دي مبني على الغيرة في معظم الأحيان، وبناءً على نوع الغيرة بناءً أو هدامة. ببتدي نحكم على المقارنة رايحة بينا لفين وفي أنهى اتجاه بالضبط..

في أنواع من المقارنة:

- المقارنة المبنية على الغيرة البناءة.

- المقارنة المبنية على الغيرة الهدامة.

- مقارنة إرضاء النفس.

المقارنة المبنية على الغيرة البناءة..

ودي بتبتدي لما الشخص يبدأ يغير من نجاح شخص تاني ويقارن نفسه بيه، ويبدأ الموضوع ياخذ شكل الطموح.. فيبدأ الشخص الغيران ده يدور على أسباب النجاح ويحاول يعملها ويصر عليها لحد ما يوصل..

وبالتالي نفس الكلام في علاقة الجواز..

بتلاقي في شقين هنا بيظهروا، ويتكرروا في المقارنة المبنية على الغيرة الهدامة برضه:

* الشق الأول وهو مقارنة الأزواج أنفسهم لبعض..

لما تلاقي طرف من الأطراف يقارن نفسه بالطرف التاني بس بالشكل الكويس.. يعني لما مثلاً الزوج يلاقي مراته بتعمل حاجة كويسة وعاجباه بس هو مايعملهاش، فبالتالي بتلاقيه بيحاول يقتدي بيها ويجرب يوصل للحاجة دي ويعملها..

ونفس الكلام بالنسبة للزوجة..

يعني مثلاً لو الزوجة بتصفى بسرعة ومابتشلس والأمر معاها مابتاخذش وقت للتصالح، والزوج عاقل وشايف إن دي ميزة حلوة بس هو مايقدرش يعملها.. فبتلاقيه بيتبتدي يقارن نفسه بيها ويحاول واحدة واحدة يصفى بسرعة هو كان..

وللا مثلاً الزوجة شايفة جوزها يشاركها في كل حاجة سواء نفسياً أو جثمانياً، فبتلاقي الزوجة بتقارن نفسها بيه وبتحاول بالتالي ترضيه بأي طريقة تانية بإنها ماتتعبوش وتحاول تخفف عنه أو أي حاجة تانية..

وهكذا من الصفات اللي بتشد الطرفين لبعض وبتخلي الحياة أبسط وأسهل..

* والشق الثاني وهو مقارنة طرف من الأطراف بشخص ثاني..

يعني لما الزوجة تشوف ميزة في واحدة تانية وشايفة إنها عندها نقص في الحثة دي، فبتغير لما تقارن نفسها بيها..

بس بدل ماتدور إنها تطلع عيوب في الواحدة التانية دي، لأ دي بتحاول إنها تطور من نفسها وتتغير.. ما هي شايفها ميزة.

والزوج لما يلاقي واحد صاحبه أو أي راجل ثاني بيعمل حاجة كويسة لمراته وشايفها ميزة، بيغير ويقارن..

بس برضه بدل ما يقول: أنا كده ومابتغيرش، لأ ده بيحاول يطور من نفسه. ما هو شايفها ميزة.

وبالتالي المقارنة والغيرة البناءة يعملوا نوع من أنواع التطور الجميل في العلاقة ماينهم عشان هما يبصوا عالنجاح ويحاولوا يوصلوله..

طيب النوع ده مافيهوش أي مشكلة، أمال ليه ذكرناه أصلاً؟؟
ليه ماعملناش زي كل بند؟؟ ليه ما إتكلمناش بس في الجزء اللي
يعمل مشاكل ونحاول نعالجه ببساطة، وسيننا الجزء المثالي؟؟

كل الأسئلة دي صح ومعاكوا حق فيها، بس أنا عندي
تفسير منطقي ورد مقنع من وجهة نظري عال كلام ده..

النوع ده من المقارنة البناءة قلته بتعمل مشاكل، يعني لو
ماخذناش بالناس اللي بيحصل حوالينا وماطورناش من نفسنا
بإستمرار وفضلنا زي ما حنا رافضين أي تغيير هنوصل لمرحلة
الجمود العاطفي اللي هنتكلم عليها كمان شوية، واللي بتعمل
مشاكل كتير لو ماخذناش بالناس..

ولا إيه؟؟؟!

اللي بعده..

المقارنة المبنية على الغيرة الهدامة..

ودي بتبقى كارثة لأن أساسها مبني على غلط..

غيرة هدامة من الشخص الناجح، فبالتالي بتبدأ المقارنة مع الشخص الناجح ده وأكيد هو اللي بيكسب في المقارنة دي لأن من الأساس هو ناجح.. وبتبدأ تاخذ شكل الحقد وإستنكار النجاح ليه ولوم الظروف اللي عملت كدة وجعلت الشخص الناجح، ناجح..

وهنا إحنا محتاجين نفكر في الفارس ونستدعيه ونستخدم الكلمات السحرية ونقتنع بيها، وهو هيعمل اللازم..

طيب بالنسبة للغيرة دي وعلاقتها بالأزواج!

* أول شق وهو مقارنة الأزواج أنفسهم لبعض..

زي ماتفقنا قبل كدة إن كل واحد فينا ليه قدرات معينة بدينية وجثمانية، فلو حاجة أنا أقدر اعملها مش شرط أبدأ إنك تقدر تعملها ولاهي.. كل واحد ربنا بيخصه بحاجة تميزه عن غيره..

وزي ماكل واحد ليه قدرات جثمانية معينة، ليه برضه قدرة تحمل معينة.. يعني برضه مش شرط اللي أنا أقدر أتحمله إنت أو إنتي تقدر واطحملوه.

وهي دي بالضبط السبب الرئيسي للمشاكل اللي بتحصل في الجزء ده..

الزوجين دائماً يقارنو أنفسهم ببعض، يعني مثلاً الزوجة
بتتصافى وتتصالح بسهولة وما بتشلس في قلبها والزوج بيحتاج
وقت أطول عشان يتصافى وينسى.. فالمشاكل بقى بتحصل لما
الزوجة مع أي مشكلة تلاقيها بتقول: ده أنت قلبك أسود قوي،
ده أنا لما بيحصل بيني وبينك مشكلة ما باخدش كل الوقت ده
عشان أصفى وأبقى كويسة.. يا أخي حرام عليك!!

دي قدرات ربنا بيديها لنا نسبة التسامح والنسيان والتناسي
مش ثابتة من شخص للتاني.. فإنتي ياستي بتقدري تصفي
بسرعة، هو لاء!! عادي جداً، ده مش معناه أبداً إن حد أحسن
من حد.. إطلاقاً!!

فبلاش تقارنيه بنفسك وتحكمي عليه إنه غلط عشان هو
ما قدرش يستحمل حاجة إنتي إستحملتيها..

وطبعاً العكس صحيح برضه، يعني لو الزوج هو اللي
بيتصافى بسرعة والزوجة بتحتاج وقت زيادة هيبقى نفس
الكلام برضه ما فيهوش أي اختلاف..

ولا مثلاً لو الزوج ما يبجش يخرج مع أصحابه أو إخواته يوم
أجازته عشان يبحب يريح وتيجي هي تتطلب منه إنها تخرج
مع أصحابها أو أهلها، تلاقي دائماً رده: يعني أنا ما بخرجش مع

أصحابي ولا أهلي عشان خاطر ك وتيجي إنتي تقولي عايزة
أخرج مع أهلي، يا شيخة حرام عليكى؟؟

طيب ليه؟ لو مش قادر تعمل حاجة ماتعملهاش، دي
قدرات.. بس مش معنى إنك مابتجشش تعمل حاجة معينة
إنك تحجر عليها ماتعملهاش هي كمان!! ماتقارنهاش بيك وخلي
الموضوع أبسط من كده.

والعكس صحيح برضه..

ويا سلام لما تلاقي الزوج مثلاً باله طويل فيتحمل حبتين
وممكن يحصل موقف معين وهو يعديه، فلما يحصل نفس
الموقف بس مع عكس الأدوار تلاقي الزوجة ماتحملتش وأبدت
إعتراض فبتلاقي رد الزوج:

يعني أنا لما حصل كذا قبل كده ما إتكلمتش، وإنتي دلوقتي
بتعترضي؟؟

نقول تاني، دي قدرات.. بس كده.

وبالتأكيد العكس صحيح..

أو المثال بتاع الزيارات العائلية، دي برضه تعتبر مقارنة. لما
الزوج أو الزوجة يقولوا: إشمعنى زورنا أهلك النهاردة، ليه

مش أهلي؟؟ وليه قعدنا عند أهلك يومين وعند أهلي يوم
واحد بس؟؟

ده بيحصل عشان بنقارن، كل المشاكل دي بتحصل بسبب
عدم إقتناعنا إن لكل واحد قدرات وإن مش شرط الي واحد
يقدر يتحملة يبقى التاني لازم برضه يتحملة..

يا جماعة الي يقدر يعمل حاجة يعملها ومايقارنش نفسه
بالطرف التاني..

الي تقدر تعمله إعمله وكتر خيرك.. مالكش دعوة بيها..

والي تقدري تعمله إعمله وكتر خيرك.. ومالكيش دعوة
بيه..

بلاش ما أنت لما عملت كذا أنا كان رد فعلي كذا، وإنتي لما
عملتي كذا أنا عملت كذا وكذا..

بلاش ما أنت وما إنتي وخلوها أنا وإنتي..

بمنتهى البساطة...

طرفين المغناطيس لوزي بعض عمرهم ما هيتجاذبوا مهما
حصل، لازم يقو مختلفين عشان يحصل تجاذب شديد بينهم..
وهكذا إحنا برضه، لازم نكمل بعض، أنت تتحمل حاجة وهي
حاجة وكل واحد وقدرته..

لما تعملو حاجة، إعملوها عشان إنتم تقدرُوا.. ماتستنوش إن الطرف الثاني يعمل زيها، لأنه ساعات كتير بيعمل أحسن منها بس إحنا اللي بنضيق بصيريتنا..

أنا عارف إن كل واحد بيعمل حاجة بيبقى نفسه الطرف الثاني يعمل كده معاه عشان كده بيعملها بالشكل ده.. فلما ما يحصلش، الموضوع بيبقى مؤلم..

زي بالضبط الكورة، لما بنخبطها في الحيطه بنستناها ترجعنا تاني بنفس الشكل اللي شوطنها بيه وفي نفس الإتجاه، فلما ما بترجعش أو بتغير إتجاهها ببقى العيب دايماً في الكورة.. ما بعملش أبداً حساب إن ممكن إحنا اللي مانكنش شوطنها بالقوة اللازمة اللي تخلّيها ترجعنا تاني مستقيمة..

الشق الثاني من المقارنة خطير جدا وهو..

* مقارنة طرف من الأطراف بشخص تاني..

عشان إحنا إترينا على: إشرب اللبن عشان ببقى عندك عضلات زي فلان، وذاكر كويس عشان ببقى شاطر زي فلان وتطلع دكتور زي عمو، وخليك مؤدب زي ابن خالتك، وشوف أخوك بيعمل إيه، وهكذا من المقارنات اللي بتبقى معانا من وإحنا صغيرين..

فبطبيعة الحال لما بتتجوز بنكمل المسيرة دي من غير تفكير
وبطريقة استنكارية أكثر منها تشجيعية..

هنتكلم عن الزوجة:

بلاش تبقي ضيقة الأفق وتقارني بين جوزك وبين واحد
تاني في الشغل بقى أو من الأصدقاء أو الأهل أو أيأ كان، كل
مخلوق في الكون بيبقى فريد من نوعه..

الصخرة جميلة سبحان الله وصلبة جداً وبتتحمل، بس
بتوجعنا وممكن تعورنالو دسنا عليها برجلينا..

المياة سر الحياة، بس بنغرق فيها لو ما بنعرفش نعوم كويس..

الهوا من غيره ما نقدرش نعيش، بس الأعاصير بتقتلع
البيوت من أساسها..

فكل حاجة في الوجود بتبقى فريدة من نوعها وخاصة بذاتها
وممكن نفس الحاجة الحلوة الجميلة تكون فتاكة ومهلكة..

طيب إيه علاقة ده بكلامنا؟؟

لما نلاقي خصلة حلوة في حد بلاش نقارن بيها حد بنحبه
لأن ده بيخلق أنواع تانية كتير من المشاكل..

يعني مش معنى إن جوز منى صاحبتك بيخرجها كل يوم
وجوزك مايعملش كده يبقى مع أول مشكلة تحصل تقارني في
خيالك أو تقوليله: على فكرة الناس كلها بتخرج مراتها، ده
حتى جوز منى صاحبتى كل يوم بيخرجها!!

طبعاً الموضوع مش مقتصر بس على الخروجات، أنا بس
ضربت مثل بيحصل كتير.. الموضوع بيبقى عن أي خصلة مش
موجودة في جوزك وموجودة في أي حد تاني.

جوزك مايدلعيكش قدام الناس وبيبقى جامد جبتين، على
عكس جوز سهير صاحبتك.

جوزك مايجبش يبقى متواجد كتير في الزيارات العائلية..
على عكس جوز ليلى بنت خالتك، على طول موجود.

بيهزر كتير ودايماً بيحب المرح والدعابة..

مايجبش المرح والدعابة ودايماً جد..

واخد باله قوي من نفسه ومهندم جداً..

ماياخدش باله من التفاصيل..

ياخد باله قوي من التفاصيل..

وإلى مالا نهاية من الخصال اللي بتبقى موجودة أو مش
موجوده..

لو إنتي بقى شاطرة، بصي على إيه اللي جوزك بيعمله وجوز
منى مابيعملوش.

إزاي؟؟

لو مسكنا الأمثلة اللي ذكرناها دي هنلاقي دايماً العيب
قصاده ميزة..

يعني مثلاً: جوزك مابيجر جكيش كتير وجوز صاحبك
بيجرها كل يوم.

هنلاقي جوز صاحبك مابيحتر مش عقلها ودايماً القرارات
من دماغه من غير مايشاركها، وجوزك مابعملش كده ودايماً
مشاركك تفاصيل حياته..

بس عشان إحنا عيننا مابتشوفش غير اللي ناقصها، عشان
كدة موضوع المشاركة ده بقى عادي فمابقتش الزوجة شايفاه،
وتبص عالي محتاجاه مش على اللي عندها بالفعل..

وجوزك لما مابيدلعكيش قدام الناس، وجوز سهير بيعمل
كده..

هتلاقي الكلام ده مايحصلش في البيت عند سهير ودايماً هي وجوزها في خناقات مستمرة ومايعملوش كده غير قدام الناس بس، إنما جوزك في بيتكم على طول بيدلحك ويأخذ باله منك ومن إحتياجاتك..

وجوز ليلى اللي دايماً متواجد في الزيارات العائلية والناس كلها شايفة ده ميزة، مايعرفوش إنهم لما يروحوا البيت بيقتضوها خناق بسبب إنتقاده لتصرفات عيليتها أو هزارها الزيادة مع فلان.. يعني هو كان موجود بس بهدف الرصد والرقابة.. إنما جوزك اللي إنتي بتقارنيه مع جوزها واللي مابيقاش متواجد في الزيارات دي، بيسيك براحتك مع عيلتك وهو كمان ببسط نفسه بطريقته ولما يرجع عشان يأخدك وتروحو، إنتو الإثنين بتبقوا قضيتوا وقت لطيف فبالتالي بيبقى يوم جميل مافيهوش أي مشاحنات بسبب الزيارة دي..

وهكذا في كل الخصال اللي بتقارني بينها وبين الخصال اللي مش موجودة في جوزك..

وبقية الأمثلة على نفس القياس وأعتقد إننا مش محتاجين نوضح أكثر من كده..

طبعاً واردة إنه يبقى موجود معاكى وما يحصلش مشاحنات بسبب الزيارة دي، ووارد إنه يبقى بيخرجك كل يوم وبيشاركك برضه وكل الكلام ده..

بس المقصود بالكلام إن كل ميزة في شخص تاني هتلاقيها عيب في جوزك، هتلاقي قصاها ميزة ظاهرة في جوزك مش موجودة عند الطرف التاني ده.. أياً كانت بقى.
يبقى بلاش المقارنة، وخلينا نحسبها حسة تانية بسيطة جداً..

لو في خصلة مش راضين عنها في شريك حياتنا، يبقى نحاول نعالجها مع بعض على قد ما نقدر من غير ما نقارن.. ولو ما قدرناش يبقى نستخدم الكلمات السحرية ونستدعي «فارس الرضا والقناعة» وهو هيساعدنا أكيد.

طيب نيجي بقى للزوج:

لما بتشوف بطلات الأفلام اللي واخدين بالهم من نفسهم قوي وعلى المسطرة، إوعى تقارنهم بمراتك أبداً..

عشان ده شغلهم وكل وقتهم، وفي ناس مسئولة إنها تطلعهم بالشكل ده في الأفلام والمسلسلات وصدقني لو مراتك كان ده شغلها وواحد كل وقتها كان زمانك بتشوفها يادوب في التلفزيون!!

هي بقى وقتها ليك، وشغلها أنت..

حد يلاقي ميزة زي دي ويقارن بينها وبين أي حاجة تانية؟؟

مأعتقدش!!

*مع الاحترام طبعاً وكل الإحترام للممثلن والممثلات، أنا
ماقصدش أي نوع من أنواع التقليل من الذات أنا بس بضرب
مثال بيتكرر كثير*

أو مثلاً مرات صاحبك الي مهنياه ومعيشاه في نعيم وعمرهم
ماإتخانووا..

أحب أكملك الجملة عشان الأمور توضح..

عمرهم ماإتخانووا... «قدامكم» بس في بيتهم أكيد حياتهم
غير الحياه الي إنتم بتشوفوها لأن ما فيش بيت بيخلى من
المشاكل.. ودي حقيقة علمية مؤكدة..

ونفس الكلام الموجه للزوجة برضه موجه ليك، يعني
العيب الي هتلاقيه فيها هتلاقي قدامة مميزات تانية أنت مش
واخذ بالك منها، أو إتعودت عليها...

يبقى بلاش المقارنة تهد بيوتنا ونفترس كل شيء جميل في
حياتنا، بلاش نخلي عيننا بس تشوف الي ناقص في بيوتنا، لأ
خلينا نتدي نبص على الكثير الي عندنا..

طبعاً الطموح للكمال ده شيء مش عيب أبداً، العيب إننا
مانقدرش نفرق بين الطموح.. والطمع..

الطمع هو إننا دايماً شايفين الي معانا قليل وعازين الكثير،
إنما الطموح إننا نبقى عارفين إن معانا الي يكفينا وراضين
ومبسوطين بيه، بس لو زودنا عليه هنبقى أحسن وأحسن..

ربنا عادل ومدي لكل واحد فينا واحد صحيح من
المميزات والنعم، فلازم تبقوا واثقين إن مايفش حد عنده كل
حاجة ومايفش حد عنده ولا حاجة..

وآخر نوع من المقارنة هو:

مقارنة إرضاء النفس..

ده نوع من المقارنة غريب شوية بس لازم نتكلم عنه..

النوع ده عام وكل الناس بتستخدمه عشان يرضوا عن الي
هما فيه بس إحنا هنخصص ونتكلم عن الأزواج فقط..

وهتكلم عن الزوجين على حد السواء لأن الكلام ده
بالنسبالمهم هما الإثنين..

الأزواج في النوع ده بيستخدموا المقارنة عشان يثبتوا لنفسهم
إنهم صح وإن الدنيا تمام أهلي وكل الناس بتعمل كده..

يعني لو حد فيهم عنده عيب وشاف العيب ده في حد تاني
بيبدأ يقارن نفسه بيه ويقول لنفسه: أهو، ما في حد تاني زيي
يعني أنا مش الوحيد في العالم اللي بعمل كده.. فيفضل زي ما
هو ومايحاولش يغير من نفسه يقول: كده رضا قوي.

الموضوع ده سلاح ذو حدين..

الحد الأول من السلاح ده، الأزواج اللي بتقارن عشان ترضى
وتحمد ربنا..

في عيوب فعلاً بتبقى فينا ومأرقة علينا حياتنا وعشيتنا ومش
قادرين نغيرها، زي العصبية مثلاً، الصفة دي للأسف ما بتقدرش
نغيرها للنقيض. نقدر طبعاً نقلل منها ونحاول نتحكم فيها
بس بيبقى صعب نغيرها للأبد.. فبالتالي الطرف العصبي ده لما
بيشوف حد تاني عصبي جداً فيقارن نفسه بيه عشان يصبر
نفسه ويرضى عن نفسه شوية..

وطبعاً الكلام ده ينطبق برضه عن أي مشكلة مزمنة في
علاقتنا مع شريك حياتنا لما بنشوفها عند حد تاني بتقارن
ونبتدي نرضى عن نفسنا شوية عشان إحنا مش لو حدنا اللي
بنعمل كده..

وبدل ما نبقى شايفين إننا وحشين ومحتاجين
نتعالج، لأ ده إحنا ساعتها بنرضى ونقول الحمد لله إحنا مش
لوحدنا..

الحمد ده شيء صح جداً طبعاً، بس محتاج برضه عدم استسلام
للأمر الواقع والهروب والبحث عن الأصح، ده برضه صح..

وهنا كل اللي هقوله إننا لما نلاقي عيب قاتل فينا أو في
علاقتنا مانكسلش ونقارن ونقول: ما أهو في ناس زينا أهو.. لأ
إحنا نحاول على الأقل نعرف إن في مشكلة ونحاول على قد
مانقدر نتحكم في المشكلة دي ونقننها وبلاش نستسهل ونرضى
بالأمر الواقع.

والحد الثاني من السلاح، الأزواج اللي بتقارن عشان تسمت..

وده لما ببنتي نلغي آدميتنا ونفكر بحقد لما نلاقي علاقتنا
مع شريك حياتنا بقت صعبة جداً ومليانة مشاكل، فبدل
ماندور إزاي نحلها. لأ ده إحنا بنقارن بعلاقة تانية مليانة مشاكل
برضه ونرضى نفسنا بشماتتنا في غيرنا..

اللي عايز أقوله بقى إن أياً كانت العيوب، وأياً كانت
الظروف بلاش نستسلم للغلط.. مهما حصل خرينا نحاول
ونحاول لحد آخر يوم في عمرنا..

بلاش يا جماعة عشان نرضي نفسنا نبص على عيوب الناس
ونقارن بلاش لما نلاقي عيب فينا بدل مانعالجه، لأ إحنا
نستسهل ونقارن بعيوب الأزواج الثانية ونقول: أهو ما في ناس
أوحش مننا..

قمة الغلط..

عارفين ليه؟

عشان برضه في أزواج وعلاقات أحسن مننا..

يبقى خلونا نحسبها ببساطة ونقول: لازم نشوف الأحسن
مننا والأسوء برضه..

الأحسن نتعلم منه ونطبق بطريقتنا، والأسوء نقول ربنا
يهديه ونحمد ربنا على النعمة اللي إحنا فيها..

**ده جزء خاص بذاته بس هو بيندرج برضه تحت
مسمى المقارنة..**

النوع ده من المقارنة بينشأ في أجواء معينة وبيئة خاصة..

زي مثلاً لما الزوجة تبقى قاعدة مع ناس وتلاقي حد فيهم
يتكلم عن زوجه ويقول: ده أنا جوزي بيساعدني في البيت
ودايماً إيده في إيدي..

فنلاقي الزوجة بخليط من الغيرة والمقارنة بتردد من إثنين:

١- وأنا كما ان جوزي بيشارك معايا دايباً..

مع العلم إنه ممكن يكون مايساعدش خالص!! بس هي عشان غيرانة إن ممكن حد يبقى أحسن منها وبتقارن نفسها بالحد اللي قال الكلام ده فبالتالي هي مش عايزة تبقى الطرف الخسران في المقارنة دي..

وبالتالي بترجع البيت مشحونة وتقارن جوزها اللي مايعملش كدة بالكلام اللي سمعته ويحصل مشاكل كتير بسبب عوامل خارجية مع العلم إنها ممكن تكون إتعودت على جوزها كده وماكانش الموضوع ده بيعمل أي مشاكل بينهم..

والرد الثاني..

٢- لأ ده أنا جوزي مايعملش كده خالص، ده عمره ما ساعدني في حاجة في البيت وكل حاجة على دماغني أنا لوحدي.. مع العلم إنه بيساعدها بس هي خايفة من الحسد والغيرة وخلافه!!

وبالتالي بترجع البيت بعد ما قارنت بين جوزها وبين الكلام اللي سمعته برضه، وبتحس إن اللي جوزها بيعمله معاها ده عادي جداً وكل الأزواج بتعمل كده، فبعد ما كانت شايقة

جوزها رئيس مجلس إدارة شركة «المساعدة والمشاركة في البيت»
وهي ترقى سفير النوايا الحسنة كمان يومين، لأ أصبح المفروض
إنه يعمل كده عشان ده الطبيعي!!

طيب الناحية الثانية بقى:

يبقى الزوج قاعد في قاعدة وواحد يمدح في مراته ويقول:
أنا مراتي عمرها ما إتخانقت معايا لما بكلم واحدة من زمايلي
في الشغل قدامها، لأ دي عارفاهم كلهم..

فبتلاقي رد الزوج برضه رد من إثنين:

١- لأ ده أنا مراتي بطلع عيني لما برمش بس..

وممكن تكون مراته ما بتعملش كده خالص وبتشق فيه بس هو
يقول كده عشان يحسس الناس إنه أجمل واحد في الدنيا والبنات
بتترمي تحت رجليه ومراته بتغير عليه جداً من اللي شايفاه!!

فبالتالي لما بيروح بيتدي يقارن ويحس إنه محتاج مراته تغير
عليه شوية وإن الثقة دي زيادة قوي عن اللي هو محتاجه!! وده طبعاً
قمة الغلط لأنه قبل اللحظة اللي إتقال فيها الكلام ده كان في قمة
السعادة من ثقة مراته فيه وعن العيشة المستقرة اللي هو عايشها..

أو الرد الثاني..

٢- وأنا كمان مراقي ما بتتدخلش في الكلام ده خالص ..

مع العلم إن مراته بتتخانق معاه لما الكلام ده بيحصل بس هو بيقول كده عشان بيان إنه مسيطر وكلام الرجالة ده!!

وبالتالي برضه لما يقارن في دماغه الكلام ده مع الي بيحصل معاه فيبدأ يشوف إن في حياه تانية أفضل من الي هو عايشها.. ويرجع البيت مشحون وعلى أهبة الإستعداد للحرب..

برضه الكلام ده بيبقى مبني على خليط من الغيرة والمقارنة..

طيب أمال المفروض نرد نقول إيه؟؟

مش مهم الرد يكون إيه، المهم في الموضوع إن أياً كان الرد على الكلام ده فلازم نبقي عارفين إحنا ردينا وقولنا كده ليه؟؟ لازم نبقي عارفين إننا بنعمل كده عشان إستدعينا كائن المقارنة وغذيناها غيرة كمان فبلاش نرجع البيت مشحونين وخلينا نبدل الكلام ده بالكلمات السحرية عشان نستدعي فارس «الرضا والقناعة».. والأهم إننا لو مش عاجبنا وضعنا من الي سمعناه يبقى مش عيب إننا نبتدي نفكر إزاي نعالج أمورنا واحدة واحدة.. ولو عاجبنا وضعنا وراضيين بيه يبقى نعرف إن دي ميزة عندنا ونحمد ربنا عليها..

بلاش نقول حاجة عكس الحقيقة لإثبات إننا أحسن.

بلاش قدام الناس يبقى: جوزي أحسن زوج على كوكب الأرض وإنتي بتتخانقي معاه لو ما قال كيش كل سنة وإنتي طيبة في عيد تحرير سيناء ودايماً شايفاه خطأ ومستهتر وخلافه..

وبرضه بلاش: ده أنا جوزي على طول بيتخانق معايا والراجل بيحبك وبيحاول يسعدك ويرضيكي على قد ما يقدر.. لمجرد إنك عايزة تحزي العين.

وإنت بلاش قدام الناس يبقى: ده أنا مراتي مطلعة عيني ومنكدة عليه عيشتي وهي بتموت فيك ودايماً معيشاك في نعيم.. لمجرد إنك عايز تظهري أنت الأحسن..

ولا: دي بتتمنالي الرضا أرضي وفي الحقيقة بينكم مشاكل كتير والحياة متوترة..

خلينا نعالج مشاكلنا..

خلينا نبقي أسوياء أو على الأقل نحاول على قد ما نقدر..

ولو مش عايزين نخلي بيتنا مشاع ومحور كلام يبقى على الأقل نقول الحقيقة لما حد يسألنا أو على الأقل نبقي عارفين جوانا الحقيقة فين وما نخليش كدبنا يتحكم في الوضع لحد ما يبقى هو الحقيقة!!

لوح الثلج..

بطبيعة الحال، أي حاجة في الكون ليها مرحلة بداية وتوهج وتأجج وبعدين مرحلة تخبط يليها مرحلة إستقرار ثم النهاية..

في الجواز نفس الكلام.. بداية الجواز شهر العسل ودي طبعاً مرحلة التأجج والتوهج، وبعدين شوية تخبطات (مشاكل مرحلة التطبع) وبعدين الإستقرار والتعود (وهي دي المرحلة اللي بيحصل فيها الجمود العاطفي والي هسميه لوح الثلج) ثم النهاية.. والنهاية هنا مش المقصود منها النهاية خالص يعني الموت لا قدر الله، لأ المقصود منها حاجة من إثنين:

١ - نهاية سعيدة، ده في حالة إننا إستوعبنا مشاكلنا وقدرنا نبسطها ونحلها..

٢ - نهاية غير سعيدة، ده في حالة إننا كابرنا وعاندنا وقلنا «إحنا كده ومش هنتغير»..

طيب إحنا رجعنا مش شهر العسل الحمد لله وخلاص عدينا بمشاكل التطبع وحليناها وقدرنا نفهم بعض ومانتنازلش عن مبادئنا الصح للغلط، وقربنا المسافات لبعض سوا وحلينا مشاكل زيارات الأهل، ووثقنا في بعض وكل الكلام ده.. والحمد لله الدنيا إستقرت.

مع الإستقرار ده بقى، في معظم الأحيان بيظهر نوع من
الجُمود المنطقي نتيجة سير الحياة الروتينية اليومية والتعود...

بمعنى إيه؟!

إن هو خلاص عرف مشاكله إيه وحاول يحلها ببساطة
وعالج اللي قدر يعالجه والباقي هي بقت متأقلمة معاه، وعرف
مشاكلها وقدر يتأقلم مع بعضها والباقي هي صلحته.. وطبعاً
هي نفس الكلام بالضبط.

المهم إن كل واحد خلاص بقى كتاب مفتوح للتاني.. وطبيعي
إنك تلاقي روايات كانت شيقة لما قريتها أول كام مرة، بس بعد
كده خلاص أحداثها بقت مملّة فبتزهق من الكتاب...

طيب نعمل إيه بقى في الموضوع ده؟

التغير والتجديد هما حل اللغز.. وهما اللي هيدوبوا الثلج
بكل سهولة.

يعني من وقت للتاني لازم تغيرو روتين حياتكم..

يوم تبغو متفقين على زيارة واجبة مملّة، وفجأة تغيرو رأيكم
وإنتوا في الشارع وخلاص رايحين..

- مش هينفع عشان دي زيارة مهمة وماينفعش نلغيها ولا
نأجلها..

طيب مثلاً تناموا في الصالة عالكنبة وتشغلو مسرحية قديمة
بتحبوها.. ولو إنتوا متعودين تعملو كده يبقى العكس صحيح،
ناموا في غرفة تانية أو مكان تاني، المهم تغيروا روتين حياتكم
اليومية سوا..

- لأ برضه عشان بنتعب من نومة الكنبة، وعشان العفش
مايتهدلش.. وكم إنحنا لسة في بداية حياتنا وما عندناش غير
غرفة واحدة أصلاً.

ماشي، خدوا إجازة يوم من الشغل وقضوا اليوم كامل مع
بعض، إتكلمو في أي مواضيع أو إعبوا كوتشينة مثلاً أو أي لعبة
بتحبوها سوا..

- ما بنعرفش نوفق إجازاتنا مع بعض للأسف..

طب لو إنت متعود تحلق ذقنك بإستمرار، جرب تربيهها
شوية كده على سبيل التغير..

- ماشي، دي سهلة ممكن تعمل..

وإنتي شعرك لو طويل ممكن تغيري لونه أو تقصيه مثلاً
وهكذا..

- بس أنا محجبة؟!!

إيه ده، معقول في ذكاء كده؟؟

أنا بتكلم على التغيير ده بينك وبين جوزك، ولا إنتي لسة
بتلبسي الحجاب قدامه؟!

- آه، إذا كان كده ماشي.. ممكن أغير لونه وأعمله فيروزي..

مش هتفرق فيروزي بقى ولا شيريهاني، المهم التغيير..

صدقوني أي تفصيلة صغيرة بس روتينية لو اتغيرت هتعمل
فرق كبير.

خليكو دايماً متجددين حتى لو بتصرفات جديدة، إلحقوا
نفسكم أول ما أي طرف فيكم يحس بالساعة بتاعت الجمود
اللي جاي من لوح الثلج ده..

عشان الموضوع مايوصلش لمرحلة حرجة بيبقى صعب
فيها الرضوخ لأقل تجديد ويبقى الموضوع محتاج تغيرات كتير
وجذرية عشان نعالجه..

وفي حاجة تانية سهلة وبسيطة جداً ممكن تساعدنا برضه..

لو إنت في حاجة معينة بتتعصب منها أو مابتخليهاش تعملها
وترفضها دايماً، وافق عليها المرة دي من باب التغيير وعديها
فترة كده وبعدين إرجع تاني..

وإنتي لو متعودة مثلاً ماتطبخيش أكلة معينة هو يبحبها
عشان إنتي مابتحبهاش، فاجئيه وإعمليلهال مرة دي..

أو جرب تداعبها بكلام حلو، ولو إنت متعود تعمل كده
بالفعل، يبقى وقف الكلام ده شوية.

وإنتي لو في حاجة دايماً بترفضها ومابتحبيش إنه يعملها،
خليه يعملها بحب ومن غير أي زعل..

ولو إنت متعود إن ماتشات الكورة دايماً بتنزل تتفرج
عليها مع أصحابك، معلش فوت ماتشين تلاثة وأقعد معاها
وعرفها إنك عملت كده عشان خاطرها.. ولو بتتفرج في البيت
وبتهملها شوية، برضه فوتلك كام ماتش كده وخليك معاها..

ولو متعود توديا لأهلها وتروح مع أصحابك أو تروح
البيت تنام شوية وترجعها، إطلع معاها وقضي الوقت مع
أهلها.. ولو دايماً بتطلع معاها، يبقى قلل الكلام ده لفترة
وبعدين إرجع تاني زي ماكنت.

وإنتي لو متابعة مسلسل تركي أو هندي أو أيا كان، ودايماً
مابتبقيش مركزة معاه في الفترة اللي المسلسل شغال فيها يبقى
فوتي حلقتين تلاثة وركزي معاه شوية، ولو مش متابعة يبقى
تابعي شوية مسلسلات وبعدين إرجعي تاني..

أو مثلاً لو إنتي منظمة جداً ومرتبة، خليه يعيش في شوية
فوضى مؤقتة وبراحته.. معلى إستحملي شوية..

وبالنسبالكم إنتم الإتنين بقى، أي خناقات روتينية عن
الترتيب والنظام بقى أو عن الغيرة أو الزيارات إلى آخره،
ماتخانقوش عليها، عدوها المرة دي من باب التغيير برضه..
وإلى مالانهاية ياجماعة، لازم تغيرو في روتين حياتكم اليومية
حتى لو عن طريق تغير بسيط في التصرفات والعادات اليومية..
لفترة طبعاً وإرجعوا تاني.

طيب الفترة دي قد إيه؟

لأهي ماهاش مدة معينة متعارف ومتفق عليها، الموضوع
نسبي.. لحد ماتحسوا إنكم وحشتكم حياتكم وطباعكم
وتصرفاتكم وعاداتكم القديمة.

ده بيبقى الوقت المناسب للتوقف المؤقت عن التغيير..

ليه قلنا المؤقت؟

عشان موضوع الفتور والخمول العاطفي والجمود ده بيحصل
كثير، وكل مرة لازم نستمر في التغيير..

طيب مش ممكن ياعم الكاتب التصرفات الجديدة اللي
هنغيرها نتعود عليها وتبقى عادة جديدة وما نعرفش نرجع تاني
زي ما كنا؟؟؟

ده إحنا ما صدقنا عدينا بفترة التطبع وخلص ضَبَطْنَا الدنيا
وإتعودنا على بعض كده، هنغير كل ده تاني من أول وجديد؟؟؟
بصوا يا جماعة.

إنتم مش محتاجين التغيير ده لسنين لحد ما تبقى عادة، الموضوع
زي ما قلنا «لحد ما تو حشكم عاداتكم القديمة»..

طب لو ما وحشتناش وحبينا العادات الجديدة، نعمل إيه؟!
ساعتها في حالتين..

أول حالة: إن يبقى إنتم الإثنين مرتاحين للعادات والتصرفات
والتغيرات الجديدة، ساعتها فين المشكلة بقي؟؟؟

خليكم مستمرين في الجديد طالما مريحكم، لحد ما تتعودوا
عليه ومثلاً يحصل موضوع لوح الثلج ده تاني ووقتها هتجددوا
وتغيروا تاني وهكذا..

ثاني حالة: العادات الجديدة والتغيرات، طرف مرتاحلها
والطرف التاني مش عاجباه..

ساعتها لازم نبقى عاقلين ونفهم إحنا بنعمل كده ليه،
ونرجع تاني لمرحلة التطبع، نشوف الصح فين ونقرب المسافات
شوية شوية ونعملها سوا.. ده في حد ذاته يعتبر تجديد وتغيير..
المياه الراكدة دايماً بتجيب أمراض..

إنما المياه الجارية واللي بتتجدد باستمرار، دايماً بتبقى صالحة
للشرب..

وعلى فكرة المياه الجارية بتتجدد آه، بس ما بتفقدش تكوينها
الأساسي وما هيتهما الحقيقية..
بتفضل برضه مياه..

في الحقيقة هي في الحالتين مياه، وإحنا اللي بإيدينا نخليها
راكده أو جارية ومتجددة...

توضيح بسيط:

بنعرف مين إن إحنا قربنا أو وصلنا لمرحلة الجمود العاطفي؟؟
لما تلاقو وجودكم مع بعض مابقاش كفاية، وإن سعادتكم
بقت في معظم الأحيان مش بإيديكم..
يعني مهما عملتي مش هتشوفي سعادته، وإنتم مهما عملت
مش هتشوف سعادتها.. كل حاجة بقت «عادي»..

السعادة بقت في وجود طرف تالت أو حدث خارجي، ما بقتش السعادة منبعها إنتم..

مابقاش في حاجة مشتركة بينكم (ودي أسوء الحالات)، الموضوع بقی كل واحد سعاداته في حنة بعيد عن التاني...

أصبح إمبراح زي النهاردة وهو هو بكرة، والأسبوع زي الي بعده وهكذا، مابقاش في أي جديد.. بقی البيت ممل والحياه رتيبة..

أول ما نبتدي نحس بأي إحساس من دول يبقى لازم ولا بد نتغير ونجدد وندور على حاجة ترجنا تاني وتخلق سعادتنا مع بعض.. ياريت مانستناش لحد مانحس كل الأحاسيس دي مجتمعين، واحد منهم كفاية كإنذار لضرورة التغيير..

وخليكم دايمًا فاكرين إن عشان نحافظ على أي حاجة لازم نحطها في الفريزر لحد ماتبقى «لوح ثلج»، وعشان نرجع نستمتع بيها تاني يبقى لازم «نغير» حالتها من الساقع للسُخن، لازم نرجعلها الحرارة!

وعلى فكرة يا جماعة مرحلة «لوح الثلج» دي وكل المراحل والمشاكل الي بتواجهنا، لازم تبقى موجودة وتظهر عشان الحياة تستمر.. مش هينفع يبقى الأكل كله مالح ولا ينفع يبقى كله حلوا، لازم الاتنين سوا..

المطلوب منا بقى إننا نجهز ونعرف نتعامل مع كل مشكلة
إزاي عشان الموضوع يعدي بسلا م..

المرايا..

فاكرين لما قلنا في مرحلة الخطوبة إن أي إثنين مرتبطين ببقوا
إنعكاس بعض؟؟

طبعاً إحنا إتكلنا عن الموضوع ده من ناحية معينة لتوضيح
الفكرة للأهل في الحكم على أولادهم إنما هنا هتتكلم عن نفس
الموضوع بس من ناحية تانية وفي مرحلة تانية..

لما أي حد يبص في المرايا، لو الشخص ده مهندم ومسرح
شعره ولا بس شيك وجميل يبقى بالتالي هتلاقى إنعكاسه في
المرايا زيه بالضبط..

ولو شعره منعكش ولبسه مش مهندم بالتالي هتلاقى برضه
إنعكاسه زيه بالضبط...

نفس الحكاية بين الزوجين ببقوا إنعكاس لبعض.. بالضبط
زي المرايا، فلو عايزين تشوفوا حاجة نظيفة وحلوة وشيك في
المرايا يبقى إتشيكوا كده وطلعوا أجمل ما عندكم.

إوعى تفتكروا إن عصبية واحد فيكم مش هتنعكس عالتاني
وعالييت..

إوعوا تفتكروا إن سعادة واحد فيكم مش هتنعكس عالتاني
وعالبيت ..

إوعوا تفتكروا إن صراحة واحد فيكم مش هتنعكس عالتاني
وعالبيت ..

وطيبة واحد فيكم، وعناده وحبه وكرمه وبخله وكل الصفات
اللي ممكن تتقال ..

لو عايزين شريك الحياه يكون زي ما إحنا عايزين، يبقى
لازم نبتدي بنفسنا ونبقى إحنا الأول كده.. وده أوتوماتيك
هينعكس على شريك حياتنا وعلى بيتنا عموماً.

لأن الموضوع زي ما قلنا بمنتهى البساطة.. زي المرايا.

وفي نقطة مهمة جداً في الحته دي:

خلوا بالكم من الكلام اللي بتقولوه قدام الأهل أو الأصحاب
أو أيأ كان كاتم الأسرار، لازم يبقى موزون..

بمعنى إن مش كله حلو بس، ولا وِجِش بس. لو إشتكيننا
يبقى لازم لما المشكلة تتحل نقول برضه..

وتصرفاتنا لازم ناخذ بالناس منها عشان تَعَيِّرُنَا للأسوء بعد
الجواز مايبقاش ليه غير معنى واحد بس، أنت أو إنتي إنعكاس

لبعض زي المرايا.. فبالتالي كل تغير منك للأسوء هتخلي أهلك
يكرهوا جوزك، وكل تصرف منك للأسوء هتخلي أهلك يكرهوا
مراتك..

ونرجع نقول هما بيكرهونا ليه؟؟

العطاء..

دي مش مشكلة، بس قلتها بتعمل مشكلة وكرها برضه
بيعمل مشكلة..

لازم العطاء يبقى بحساب ومدروس..

تعالوا كده نشوف الفيلم القصير ده وإيه اللي نقدر نفهمه منه:

لما البطل يبقى عطشان جداً ويلاقي شريك حياته معاه إزازة
المياه المشربة اللي نفسه فيها، حاجة من إثنين هتحصل:

إما الشريك ده هيعطي الإزازة كلها للبطل، وفي الحالة دي
البطل هيشرب لحد ما يرتوي وياخد كفايته وخلص يرجعها
تاني بغض النظر عن الكمية المتبقية وشكراً. وده معناه إن مهما
تخيلت إن شريكك عطشان، وإدبته الإزازة كلها، في الآخر هياخذ
كفايته ويشبع وساعتها هيدور على حاجة تانية محتاجها ومش
شرط الحاجة دي تبقى عند نفس الشريك!

أو الشريك ده هيبخل بإزازة المياه اللي معاه عشان يفضل
البطل دايماً محتاجله فهيديله نقط على فترات كبيرة عمرها
ماهتروي حتى عطشه فبالتالي هيزهق البطل ويروح يدور على
حد ثاني عنده إزازة المياه المشبرة اللي تروي عطشه وتشبعه..

مش واخدين بالكم إني مسميه البطل ومُصر على كده؟؟

لأن هو فعلاً كده وماعملش أي غلط..

طب «حد» هيقولي: إيه ياعم الكاتب؟؟ ده البطل بتاعك باع
في الحالتين؟؟ يبقى إزاي بطل؟؟

أحب أقولكم يا جماعة إن كلنا هذا البطل!

أمال مين اللي غلطان؟؟

كلام في سركم، شريك البطل هو اللي غلطان!! وهنفهم سوا
دلوقتي هو غلطان في إيه والحل إيه..

لما حاولنا ندور على غلط الشريك إيه؟؟ لاقينا الغلط في الحل..

طيب الحل إيه؟؟

لو شريك البطل أعطى الكمية المناسبة من المياه المشبرة
للبطل واللي هي فرضاً نص كباية، هيحصل حاجتين:

أول حاجة إنه سقى البطل..

تاني حاجة إنه ماشبَعُوش..

وده معناه إن طالما البطل ماشبعش، دايماً هيبقى محتاج
ومتعطش لإزازه المياح المشبرة اللي مع شريكه..

طيب فهمنا إيه من المثل ده؟؟

إن العطاء الكثير والزيادة عن الحد بيوصل لمرحلة معينة
بتلاقي الطرف التاني خلاص شبع ومش عايز تاني دلوقتي مهما
كانت الكمية اللي لسة موجودة.. إنما لو العطاء كان واحدة
واحدة وعلى قد الحاجة يبقى هيفضل دايماً الطرف اللي محتاج،
منتظر تاني من الطرف الآخر. بس برضه لازم مايقاش أقل
من الحاجة عشان مايزهقش ويروح لحد تاني عشان يشبع...
وعلى فكرة العطاء ده بيضم كل حاجة..

يعني العطاء في الرومانسية، الحب، الغيرة، التضحية، التسامح،
وكل المشاعر والمعاني..

ما تفرطوش في العطاء قوي ولا تبخلوا بيه، دايماً الاعتدال
حتى في العطاء هو أنسب الحلول..

وصدقني اللي أنت بتعمله النهارده من غير مقابل ومش
مستني حاجة غير إنك تشوف إبتسامتها..

بعد كده هتبقى محتاج تشوف وتسمع أكثر بكتير من مجرد
إبتسامة.

عارفين ليه؟؟

عشان إحنا بشر!!

فأرجوكم بلاش جملة «انا بعمل كل حاجة، وبضحي كثير»...
عشان اللي أنت أو إنتي بتعملوه ده، الطرف التاني مش محتاجه
دلوقتي ..

مش عشان هو وحش، لأعلى الإطلاق..

إنما عشان هو شبع، ومحتاج دلوقتي حاجة تانية خالص..

حِتة كِدَة لِلدَّرْفِيه...

آخر أسطورة هنقولها ونختم بيها الجزء ده.

أسطورة القطة السوداء..

كان ياما كان، في سالف العصر والأوان.

في يوم من أيام زمان..

كان في بلد صغيرة فيها عقد قران..

البنّت كانت على قد حالها، والولد كان ابن حد من الأعيان..
وبعد الزفاف والزغاريت والعروسين طالعين شقتهم، البنّت
شافت قطة سودة واقفة عالسلم في ركن من الأركان..
خافت وإفتكرتها من الجان..
ومع خضّتها إتكعبلت في الفستان..
وقعت على إديها إتكسرت، وصرخت من الألم..
وجوزها جنبها والدم في عروقه إتكتم..
أخذها جري عالستشفى، والمعازيم حوالِيهم في كل مكان..
البنّت إيدها إتجبست، قالت ياريت اللي جرى ماكان..
وقالها جوزها ومعاها الناس ..
كنتي إستعدتي بالله من الخناس..
والدُخلة قَلْبِت من فوق لتحت..
وهنا قال واحد من أصحاب العريس: ممكن أقول حاجة لو
سمحت ؟

وكميل كلامه: أنا لو كنت مكانك كنت دبحت القطة
وإتعشيت بيها..

أحسن ما الدُّخلة تبوظ عليا وعليها...

وَضِحْكُ ..

وَضَحْكُ كل الموجودين ..

وتوتة توتة، خلصت الحدوتة..

ومن ساعتها والحدوتة دي إنتشرت وأصبحت دعابة بتتقال
دايماً من أصحاب العريس للعريس: إدبح القطة وإتعشى بيها
بدل ما الدُّخلة تبوظ..

وفضلت الحدوتة دي لحد يومنا هذا، بس طبعاً إتحرفت
وأصبحت «إدبحلها القطة» من أول يوم جواز عشان حياتك
تبقى أحسن وتسيطر!!

طبعاً الحكاية دي من خيال المؤلف.

طيب إحنا ليه ختمنا النوع ده من الجواز بالحتة اللي مالهش
لازمة دي؟

في الحقيقة هي ليه لازمة واحدة بس، إن إحنا نعرف إن
جملة «إدبحلها القطة» دي فعلاً أسطورة ومالهش أي أساس من
الصحة...

يُجيب بقى للنوع الثاني من الجواز اللي إتكلّمنا عنه في الأول
خالص..

..جواز الصالونات..

النوع ده من الجواز مبني في أساسه على الإرتياح والقبول، وده
طبعاً نتيجة إن مايبقاش في أي صلة بين العريس وأهله والعروسة
وأهلها.. الموضوع بيبقى عبارة عن معارف عرّفت معارف على
معارف.

ومن هنا بتبتدي الحكاية..

ماحدث سألني الأول، ليه بنسمي النوع ده من الجواز
«صالونات»؟؟

عندي تفسير منطقي للموضوع ده:

دايماً في معظم البيوت المصرية بنلاقي الصالون ده عبارة
عن مكان لإستقبال «الضيوف». والأنتريه وبقية الشقة للأهل
والناس القريبة، وبالتالي الناس أطلقت على الجواز اللي من
النوع ده (الطرفين غرباء عن بعض بما فيهم العروسين أنفسهم)
جواز الصالونات عشان الطرفين بيبقوا «ضيوف» بالنسبة
لبعض..

ويا إما يحصل قبول ومنتقل لمرحلة الأنتريه أو مايحصلش نصيب.

وعلى فكرة حتى الجواز عن حب، الأهل يقابلوا العريس وأهله في الصالون برضه. بس المقصود من تسمية الجواز «صالونات» هي الفكرة نفسها، مش الطريقة..

وصلت؟؟

قبل مانكمل، في مفهوم سائد عند معظم الناس إن جواز الصالونات ده حاجة كده تفك زنقة..

أحب أقول للناس دي، مفهومكم غلط لأن من وجهة نظري أي نوع من أنواع الجواز يبقى «جواز»، يعني رابطة مقدسة وحياة ومستقبل.. الإختلاف دايماً يبقى في طريقة الجواز، لكن عُمر ماكان الإختلاف في المضمون أبداً أبداً!

رجوعاً لموضوعنا..

في النوع ده من الجواز، في فرعين أساسيين هتتكلم عليهم..

- أول فرع وهو «مرحلة ما قبل الإنسجام»..

- وتاني فرع هيبقى «مرحلة ما بعد الإنسجام»..

ياللا بينا على أول فرع..

مدرحة ما قبل الإنسجام..

وأول حاجة هتقابلنا هنا:

مقابلة التعارف..

ودي طبعاً مختلفة تمام الإختلاف عن «قاعدة التعارف» عشان هنا العروسين مايعرفوش بعض فبالتالي مايفيش حب لسة، ومايفيش «تغيرات» ولا أي حاجة من كل الكلام ده. ونتيجة لده بيحصل حاجتين:

١- مايبقاش في ترتيب بين العريس والعروسة، فبالتالي نسبة حدوث إختلاف في وجهات النظر وعدم الإتفاق بتزيد طبعاً..

عندي نصيحة في الحته دي..

ياريت الإختلاف يبقى حوالين عدم القبول والإرتياح، بلاش يبقى عن المادة زي الشبكة أو الشقة وخلافه..

يعني مثلاً العريس عايش برة مصر وهيتجوز بتكم وياخذها ويسافر على طول.. آه ساعتها ممكن يحصل خلاف، وده هيكون بسبب إن أهل العروسة والعروسة نفسها مايعرفوش أي حاجة عن العريس إذا كان كويس بقى وهيصون بتهم ولا لأ وهكذا.

فيبقى في نوع مُبرر من الخوف والقلق إن العريس يطلع حد
مش كويس ويهدل بتتهم..

ماشي ساعتها ممكن يبقى في كلام، وحقكم تخافوا على بتتكم
وكل الكلام ده..

لكن عشان تفكري يا عروسة سواء إنتي أو حد من الأهل
الكرام بطريقة «طالما ما فيش حب يبقى لازم حاجة تعوض»، ده
ماينفعش خالص لأن ما فيش حاجة على وجه الخليقة تعوض
الحب! فموضوع الشبكة بكام والشقة مكانها فين وكل الكلام
حوالين المادة ماتشيلوش همه، لأن صدقوني دي آخر حاجة
هتفكروا فيها لو حصل لا قدر الله مشاكل بين العروسين بعد
الجواز وإكتشفتم إن مش هي دي العروسة المناسبة لابنكم ولا
ده العريس المناسب.. بس للأسف الكلام ده هيبقى فعلاً بعد
فوات الأوان...

وإنت يا عريس، إوعى تفتكر إن كل ما كان معاك فلوس أكثر
يبقى كده البنات هترمي تحت رجلك وأي واحدة هتتمناك..
خليها تتمناك لأخلاقك وثقافتك وعلمك وضيف عليهم كمان
إحترامك لأهلك.

ولو جمعت كل الحاجات دي مع بعض هتلاقي نفسك بتطبق
تعاليم كل الديانات السماوية، وده طبعاً رداً على حد ممكن يقولي:
طيب بالنسبة لإنك ذكرت الأخلاق والعلم وإحترام الوالدين
والكلام ده ونسيت تذكر «الدين» والي هو الأساس.

تاني حاجة في الحنة دي:

٢- إن مافيش «تغيرات» على العريس والعروسة وده بحكم إن مافيش سابق معرفة بينهم، فبالتالي الجزء بتاع «حكم الأهل عالأولاد» مايبقاش موجود.. ونتيجة للموضوع ده هنلاقي برضه حاجتين ظهروا:

أولهم إن أهل الطرفين مايبقوش واخدين موقف دفاعي ضد الطرف التاني قبل مقابلة التعارف..

وثانيهم إن الأهل أصلاً بيقوا نفسهم الموضوع يتم عشان يفرحوا بأولادهم..

حد هيقولي: يعني هما الأهل في «الجواز عن حب» ماكانوش عايزين يفرحوا بعيالهم؟

هرد وأقوله: أكيد عايزين يفرحوا بأولادهم طبعاً، بس زي ماقلنا إنهم بيقوا واخدين موقف دفاعي فبالتالي ده ممكن يآثر على حكمهم..

بعد مقابلة التعارف بيدأ الأهل والعروسين يتقابلوا عشان يتعرفوا على بعض أكثر وندخل في مرحلة التعارف واللي سميناها قبل كده فترة «الزواق»، بتبقى موجودة هنا كمان بس بتاخذ فترة أطول حبتين وبتستمر معنا لحد بعد الجواز كمان..

وزي ماعرفنا قبل كده من مثال التيشيرت إن الموضوع
«فطرة» مش زواق..

بس قبل كده كان في حب، وبالتالي في سبب قوي جداً
للطرفين عشان يتمسكوا ببعض مش يبعدوا عن بعض..
لكن هنا بقى ومع زوال السبب ده، الموضوع بيبقى صعب
شوية..

طب نحلها إزاي دي؟!

ببساطة كده ومن غير تعقيد:

إسألته إذا كان بيتوتي ويحب يأتخ وللاّ بيحب الفسح
والخروج؟ إسألته بيحب ياكل إيه؟ إسألته بيحب يقعد عالقهوة
ولا لا؟ بيحب ينام بدري ولا بيحب السهر، عامل إيه في شغله،
عنده هواية معينة، بيحب السفر.. وهكذا..

وأنت برضه على فكرة محتاج تسأل عن كل حاجة..

الموضوع يا جماعة مافيهوش أي إحراج، حاولوا تفهموا الكلام
ده كويس عشان ده مستقبل وحياة متعيشوها مع بعض.. وعلى
عكس النوع الأولاني من الجواز اللي إتكلمنا عنه، واللي قلنا
فيه إن الأطراف المختلفة بتتجاذب (عشان في حب، فالإختلاف

يعمل نوع من الإنجذاب وبالتالي يبقى في إختلاف آه، بس
الحب محاوطه). هنا بقى الموضوع ييختلف شوية، عشان لو
إنتم مختلفين مش هيحصل إتفاق أصلاً، فلازم تلاقوا حاجات
مشتركة تجمعكم سوا، عشان يحصل الحب الأول (والي هو
المغناطيس نفسه) وبعدين تبدأ أطراف المغناطيس واحدة واحدة
تتكون لحد مانوصل لمرحلة الإختلاف اللي بيولد الإنجذاب زي
قبل كدة بالضبط والحياة تمشي بطبيعتها!

أنا عارف إن أكيد مش كل حاجة هتتعرفوا تسألوا عنها،
ومش كل حاجة هينفع تسألوا عنها، وفي حاجات ممكن تبقى
مش صحيحة وحاجات ممكن مايحيش في بالكم أصلاً تسألوا
عليها وكل الكلام من هذا النوع..

عشان كده كملت كلامي وطلبت منكم برضه تحاولوا
تدوروا على حاجة مشتركة تجمعكم عشان يبدأ يبقى في نوع من
العشرة والتعود واللي في نهاية الأمر هيكونوا رابطة قوية بينكم،
تخلي يبقى في فعلاً سبب للتغَيُّر.. وتخلي يبقى فعلاً في حب!!

خلاص إتعرفنا على بعض وكله تمام الحمد لله

هنخرج من الجزء اللي فات بحاجة من إثنين مالهومش تالت:

- القبول بيقل ومايحصلش نصيب..

وساعتها لازم نكون واضحين من الأول وننهي الموضوع قبل ما يوصل لمرحلة بيبقى فيها قرار النهاية من أصعب ما يكون. وإعرفوا إن نصيكم موجود في مكانٍ ما، بس مش هنا ومش دلوقتي. فماتقلقوش أبداً...

بنات الناس مش لعبة، ولا ولاد الناس لعبة برضه..

- أو القبول والإرتياح النفسي بيزيدوا..

وفي الحالة دي لازم تعرفوا إن الإرتياح النفسي ده نوع مصغر من أنواع الحب برضه، فحاولوا تَعَزِّزُوهُ بالصراحة والوضوح بينكم.. عشان بعد الجواز نوصل في النهاية لمرحلة الصدام اللي بعدها الحياه بتتطبع والحب بعد ما كان مُصَغَّر، لأ ده بيبداً يكبر لحد ما يوصل للحب الحقيقي!

وبالتالي بعد الإرتياح النفسي ما بيزيد..

وبعد مدور كام شهر...

دقوا المزاهر ياللاً يأهل البيت تعالوا.. جَمِّعْ ووَفَّقْ والله وصدقوا اللي قالوا.. عين الحسود فيها عود يا حلاوة.. عريس قمر وعروسته نقاوة.

الجوازة تمت على خير.. الحمد لله

وأول مشكلة هتقابلنا هنا برضه هي مرحلة التطبع، بس الموضوع بيبقى خليط بين مرحلتين.

التعارف «الزواق» واللي لسة برضه مكلمة معانا بشكل أقل آه، بس موجوده.. ومابين مرحلة «التطبع» اللي بتظهر بعد الجواز على طول مع ظهور العادات الشخصية لكل واحد.

يعني عروستنا «زواق» وعريسنا «تطبع» هيتجوزوا ويخلفولنا:

التطبع الأولي..

(اسم مركب، عشان مامته كانت عايزة تسميه على اسم أبوه «تطبع» وباباه كان عايز يسميه عزت) النوع ده من التطبع بيبقى أسهل شوية، ومايبقاش عُنق الزجاجة زي قبل كده..

إزاي بقى؟؟

هنفهم دلوقتي حالا..

فاكرين موضوع «أول مرة»؟؟

طبعاً بحكم إن فترة التعارف ماطولتش، وبعدها الخطوبة والجواز على طول.. فالعروسين لسة مايعرفوش بعض كفاية، وبيبقى في حاجات كتير بتحصل «أول مرة».. أو تقريباً معظم

الحاجات والأحاسيس والمواقف وكل حاجة بينهم بتبقى «أول مرة»..

وهنا في حالتين:

- يا إما الحاجة اللي «أول مرة» تحصل دي، كويسة (تصرف أو صفة أو كلمة أو أي ميزة بتظهر).

فبالتالي إحساسها يبقى جميل!

- يا إما الحاجة هتبقى مش كويسة (غلطة بقى أو تصرف بايخ أو عيب ظَهَرَ)، وبرضه في الحالة دي الموضوع هيعدي لأن أولاً ماحدث متوقع حاجة من التاني وثانياً دي «أول مرة» الغلطة دي تحصل!

عشان كده كل المشاكل اللي بعد الجواز واللي إتكلمنا عنها قبل كده هتظهر برضه في النوع ده، بس الموضوع هياخد وقت لحد ما «أول مرة» تتحول وتبقى «يووه تاني؟! إحنا مش قلنا الموضوع ده مايتكررش؟!».

فبالتالي الموضوع بيبقى ميزة وعيب برضه:

- الميزة إن مافيش طرف متوقع حاجة من الطرف التاني، ومافيش طرف فاكر إنه يعرف كل حاجة وكل تفصييلة عن

الطرف الثاني.. ومايقاش في كمين «إحنا عارفين كل حاجة عن بعض»، ومافيش عشم زيادة وبالتالي مايقاش في صدام زيادة.. في الحقيقة، مايقاش في صدام أصلاً.

- والعيب إن مايفش حب لسة، فبالتالي عدم الاتفاق والانفصال بيبقى سهل عالطرفين.. ومايقاش في طاقة أو سبب أو داعي لطرف إنه يتغير عشان الثاني أو يصبر عليه... بمعنى إن لو حاجة ظهرت وعملت مشكلة، الموضوع مايقاش فيه مرونة.

ولو لاحظتم هتلاقو معظم الكلام - إذ لم يكن كله - يصب في مكان واحد «إن الطرفين لسة مايعرفوش بعض كفاية» وعشان السبب ده، وعشان مايجصلش صدام مجوف يودي في داهية بعد الجواز، لازم تسألوا بعض عن كل حاجة ممكن تعمل مشكلة (زي ماطلبت منكم تعملوا قبل كده من كام سطر).

وهنعيد ونكرر ثاني، دوروا على حاجة مشتركة بينكم وحاولوا توحداوا إهتماماتكم، يعني اللي يسعدك يسعدها والعكس طبعاً صحيح .

ولما تلاقوا الحاجة دي، وتواظبوا عال موضوع ده، والإرتياح يتحول لإرتباط نفسي وبالتالي «حب». هنا بقى هنروح عالفرع الثاني.

مرحلة ما بعد الإنسجام..

هي طبّق الأصل العَلَقَة الي فاتت!

عَلَقَة إيه؟!

هقولكم حالا..

فاكرين النوع الأول من الجواز؟

مش بعد الجواز ظهرت شوية مشاكل عرضناها وإتفقنا

هنتعامل معاها إزاي ببساطة؟

نفس الكلام هيظهر هنا.

لأن كل المشاكل قدرنا نحلها عشان في الأساس كان في حب

بين الطرفين.. وزي مايقولوا: الحب يصنع المعجزات!

فأول مانلاقي الرابطة القوية دي (رابطة الحب) ظهرت هنا،

وعلى قد ماهي حاجة جميلة بس هتجيب معاها أول مرحلة

صعبة فعلاً وهي مرحلة التطبع الأب..

وهنلاقي الكلام كله بيتكرر، و طرق الحل البسيطة الي

قلناها هتتكرر برضه. و خلاص كده خلصت الحكاية!

الحد اللي مزهقنا في عيشتنا هيقولي: إنت شرحن النوع الأول في الكتاب كله، وكاتبلي كام صفحة في الآخر عن جواز الصالونات؟! وتقولي مفهومكم غلط عن جواز الصالونات وكله جواز والكلام اللي أنت ناقضت بيه نفسك لما فعلاً مالاقتش كلام تقوله!

هرد وأقوله: يبقى أنت كده مافهمتش كلامي..

بُص ياسيدي..

أنا فعلاً قلت مفهومكم غلط، وإن جواز الصالونات زيه زي أي جواز.

بس لو كملت الجملة هتلاقيني قلت برضه إن في الآخر كله جواز يعني رابطة مقدسة وحياة ومستقبل.

الإختلاف بيبقى في الطريقة بس..

فأظن إن الكام صفحة دول كفاية قوي عشان نشرح الطريقة بتاعة النوع ده من الجواز، وبعد كده كله زي بعضه..

ولا إنت عايزني أعيد تاني مشاكل (زيارات الأهل، والنكد، والمشاركة.. إلى آخره)؟! والموضوع يبقى مجرد حشو؟

ما اعتقدش..

كل اللي بقوله إن في النوع الأول من الجواز كان في حب يخلي الطرفين يتمسكوا ببعض عشانه. فخلي في النوع الثاني كمان حاجة تجمعكم وتبقى هي الرابطة، وكل ماكانت أقوى بتمسككم بيها، كل ما قربنا من الإستمرارية اللي كلنا عايزينها وبتمناهها..

ياجماعة إنتم فعلاً عندكم فرصة عظيمة، إستغلوها عشان الحياة تبقى أبسط وتعددي..

إستغلوها عشان تأسسوا حياه كريمة!

إحسنوا الإختيار وماتستعجلوش أياً كانت المبررات والضغوط اللي عليكم، عشان صدقوني الخسران الوحيد في المعركة دي هو «إنتم».

وصلت كده ولا نقول كمان؟

أظن الموضوع بدأ يبقى أوضح، مش كده ولا إيه؟

..النهاية..

مش ملاحظين إن كلامنا في الكتاب كله عن الأزواج ومن غير مانجيب سيرة الأطفال خالص؟

لأن كلامنا معظمه بصفة عامة وشاملة، يعني لو في أولاد أو مافيش الكلام برضه مش هيتغير.

وعشان معظم كلامنا في أول كام شهر من الجواز واللي بيكون فيهم لسة ولي العهد ماوصلش لأرض الوطن.. فبالتالي كلامنا كان عالأساسيات اللي لو حليناها وبدأنا فعلاً على قد ما نقدر نشوف المواضيع ببساطة، ده هيسهل علينا كتير لما ولي العهد يبقى موجود..

يعني من الآخر هنبقى فعلاً جاهزين نتحمل مسئولية التربية!

في بداية النهاية:

- أحب أقدم إعتذار للعيلة المصرية الأصيلة وخصوصاً الأب والأم، بس من وجهة نظري دي الحقيقة في معظم البيوت..

- كلامي في الكتاب ده للتوضيح وليس الحصر فطبعاً في أمثلة كتير جداً وتفصيل أكثر أنا ماذكرتهاش، وده لأني بتكلم عن الفكرة العامة وعلى المشاكل والحكايات الشائعة في الموضوع ده والباقي أنا سايبه لحضراتكم.

- وما ننساش إن لكل قاعدة استثناءات!! بمعنى إن مش شرط كلامي ينطبق عليك أو عليك في الأمثلة اللي أنا ذكرتها وممكن بمنتهى البساطة تكون إنت أو إنتي فاهمين الكلام ده بالفعل وعارفين إن كل مرحلة وليها متطلباتها وظروفها..

طيب دلوقتي بقى وبعد ما وصلنا للنهاية، في طريقتين لفهم الكتاب ومحتواه ومضمونه..

أول طريقة هتلاقي ناس بتقول:

الكاتب بيتكلم بفتح ولاغي عاداتنا وتقاليدنا وإن إحنا شريكين وما فيش حاجة عندنا بتقول إن الراجل يغسل المواعين وينشر الغسيل والكلام ده لأن طول عمرنا متريين وعارفين إن دي وظيفة الست!!

ويعني إيه أسيب مراتي تكلم راجل غريب وأثق فيها والكلام الفاضي ده.. إحنا مش في أوروبا!!

ولا مثلاً بالنسبة للزوجة.. يعني إيه أسيبه يقول إن البنت دي أحلى مني ولا أسيبه يكلم بنات عادي، وأنا فين كرامتي في الموضوع ده؟؟

وأنا أسيب جوزي يكنس للا يمسخ الأرض؟؟ إزاي يعني؟!

وطبعاً كل الاعتراضات من هذا القبيل.

ردي على الكلام ده هيبقى كالاتي:

هو أنت مش لما بيبقى نفسك تسافر أو تهاجر أوروبا بتبقى عارف إنك هتروح هناك تغسل صحون وتشتغل في بنزينة أو

النوع ده من الشغل عموماً لحد ماتقف على رجلك؟؟ لأ
والغريب بقى إنك بتبقى متصالح مع الفكرة دي تماماً وتقول
لنفسك الشغل مش عيب؟؟!!

طب يا أخي على الأقل الصحون اللي في بيتك دي بتاعتك..
يعني أنت عندك عادي تغسل صحون الناس لكن صحونك
أنت ومراتك لأ!!

وبالنسبة لموضوع «الراجل الغريب»..

قبل ماتقول دي مش عاداتنا وتقاليدنا والراجل الشرقي
والكلام ده، بص لنفسك لما تلاقي زميلتك في الشغل بتتكلم
عادي معاك ومع غيرك بدون أي مشاعر غير الزمالة وفي حدود
الأدب، وتلاقي دمها خفيف أو جدعة أو أي صفة كويسة..

كلمني عن إحترامك وإعجابك بالشخصية دي؟!

ده مش بعيد تضرب بيها المثل في خناقة بينك وبين مراتك!!

وماتقوليش الشخصيات اللي زي البنت دي نعجب بيها آه،
بس مانتجوزهاش..

ماحدش ياسيدي قالك إجتوزها، بس ليه ماناخذش الحلو
اللي يعجبنا ونطبقه بطريقتنا؟؟

هتقوللي إزاي يعني؟؟

هقولك: لو أنت إديت لمراتك الثقة والأمان والحب،
صدقني هتشوف واحدة تانية خالص غير اللي أنت بتغذيها
غيرة وتحكم وقلّة ثقة..

وإنتي ياستي بلاش تبقي متناقضة..

تجبي قوي وعنيكي تلمع وتبقى مليانة قلوب لما تشوفي
أبطال المسلسلات والأفلام بيساعدوا زوجاتهم وبيشاركوهم
في البيت ويبقى جواكي أمنية كبيرة نفسك تتحقق.. وتيجي
على أرض الواقع تقولي كلام تناقضي بيه نفسك!! وييجبك
قوي بساطة البطلة وتعاونها مع جوزها في كل حاجة، ورقة
غيرتها عليه لما إتكلم عن زميلته في الشغل ومدح فيها وقد إيه
الموضوع سهل..

ولا لما البطل القمر الكيوت يعيط، ياااه..

كلميني عن إحساسك إنك عايزة تنظي جوه التليفزيون
وتقتلي اللي زعل البطل وخلاه يعيط، وتيجي عند جوزك أو
أخوكي أو أي مذكر يعيط وتلاقي الجملة المشهورة اللي بتتقال
باشمئزاز غالباً: هو في راجل بيعيط؟؟

مش كل ده برضه إسمه تناقض؟؟ وللا في إسم جديد نزل
السوق؟

عموماً ياجماعة الكتاب مالوش أي علاقة بأي حاجة غير
البساطة..

وعلى فكرة التفتح مش عيب لو خدنا منه اللي يناسب
طباعنا وعاداتنا، مش عيب أبداً آخذ الصح من وجهة نظري
وأسيب الغلط!!

العيب إنني أطبّق وأقلّد من غير أي تفكير.

الطريقة الثانية لفهم الكتاب:

إن الموضوع ببساطة، بسيط.. بس كده!

الكتاب ده ياجماعة للفهم مش للحفظ، يعني أكيد مش
هتلاقي كل الأمثلة لايقة عليك أو عليكي بالنص..

وأي مثل ذكرناه للتوضيح يبقى برضه ينطبق على الطرفين،
يعني لما نقول:

الزوج «كذا»

والزوجة «كذا وكذا»

ونكمل المثل يبقى ده للتوضيح بس. فأكيد العكس صحيح
إن الزوجة ممكن تبقى هي اللي «كذا» واحدة بس. والزوج هو
اللي يبقى «كذا وكذا».

فحاولوا يا جماعة تاخذوا اللي يناسبكم من الكلام وتنفذوه
بطريقتكم، المهم في الأمر إننا نعرف فين المشكلة ونحاول
نعالجها.. مش مهم مين اللي يعالج، المهم إن المشكلة تتعالج.
زي القميص..

تفاصيله كتيرة، وشكله وقصته مش عاجباني بس أنا خلاص
إشتريته..

لوجبنا الموضوع من الأول وجزئناه مادة خام (قماش)
وما كينة وزراير وكمام وياقة وخلافه.. ساعتها بس هنقدر نفهم
إننا ممكن نعيد تشكيلة زي ما حنا عايزين وبالطريقة اللي تناسب
مقاساتنا بالضبط، لأ ومش بس كده ده إحنا هنبدع في تصميمه
كمان.

ابدعوا..

وحاجة كمان..

مش لازم حد يطلع غلط وحد يطلع صح، المهم إن في
مشكلة ولازم نحلها.. الموضوع فروق فردية مش أكثر.

ولازم لازم نبقى فاهمين إن أي مشكلة بين طرفين، يبقى
الغلطان فيها الطرفين..

مش طرف واحد أبداً، حتى لو الظاهر كده..

لأن لو أنت شايف نفسك مش غلطان يبقى على الأقل كان
المفروض تسامح.. مش كده ولا إيه؟!!

وفي نفس الوقت بلاش يا جماعة تكبروا أي مشكلة لأن كل ما
هتكبروها كل مابقيتوا صغيرين قوي قدامها..

آه صحيح، فاكرين الحد اللي إحنا مرمطينه معانا من أول الكتاب؟؟
الحد ده يقول حاجة دلوقتي ولازم نرد عليه..

يقول: الكلام سهل والكتاب كله كلام، بس ساعة التطبيق
الموضوع بيختلف تماماً على أرض الواقع..

زي كلام الكتب الدراسية بالضبط، مليون معلومات بس مش
دايماً بنستخدمها في الحياة العملية!!
طيب الحد ده فعلاً معاه حق المرة دي..

بمعنى إن على أرض واقع الحياة الزوجية بتفاصيلها وتفاصيل
الزوجين نفسهم، هنلاقي إن كل حاجة فعلاً صعبة ومحتاجة فهم
عميق وتفكير وتأمل ومابتقاش سهلة وبسيطة قوي كده.. لكن
ومع التأمل ده، لما ندقق ونفكر بمنطقية وبحب هنلاقي نفسنا
بنبص للمشاكل اللي بتحصل ونشوفها من منظور تاني أبسط
بكتير، وبالتالي بتلاقينا برضه روحنا للبساطة غصب عنا..

إحنا دائماً هنغلط ولازم يبقى كل بيت في مشاكل عشان هي دي سنة الحياه وبهاراتها، لأن زي ما قلنا قبل كده إن حتى السعادة زيادتها ملل.. فعازكوا تفهموا بعد ماتهدوا إن كل مشكلة وليها حل.

الملايكة بس هي اللي ربنا خالقها مابتغلطش، فلو نفذنا الكتاب بحاذافيره هنبقى ملايكة وإحنا بشر!!

فبالتالي لتوسيع المدارك ولفت الأنظار، فعلاً في حلول تانية بسيطة وضيف عليها إن لو مش هتغير %١٠٠ من نفسك أو من حياتك عشان ده مستحيل، يبقى على الأقل هتتغير ولو بنسبة بسيطة..

فلو مش هستفاد من المنهج كله يبقى عال أقل هنبقى فاهمين إن في مشكلة..

ونص حل المشكلة إن إحنا نبقى عارفين إن في مشكلة من الأساس.. (مقتبس)

وهو ده بالضبط الهدف من الكتاب..

الهدف كمان إن إحنا نلفت نظركم لحاجات بديهية جداً بس للأسف كلنا بنقع فيها ومش عارفين المشكلة فينا، وللا المشكلة في إيه؟!!

وأرجع تاني وأقول ببساطة، الموضوع أنا وإنتي مش يا أنا يا
إنتي..

وختاما، أحب أقول:

«قربوا لبعض وإستحملوا بعض لحد ما يحصل **تطبّع** وتبقوا
كيان واحد وروح واحدة في جسدين..»

«وبلاش نكد، **المشاركة** أحسن..»

«قربوا **لأهلكم وزوروهم**، بلاش مشوار تعبهم وشقايم
ينتهي كده بسهولة..»

«وبلاش **غيرة** زيادة، خلي **الثقة** موجودة بينكم وتأكدوا إن
الي ممنوع النهاردة، بكرة هيبقى **مرغوب** بشدة..»

«و**ماتقارنوش**، ولما يحصل بينكم **فتور عاطفي** ما تخافوش.
كل حاجة هترجع زي الأول ويمكن أحسن كمان..»

«كل واحد يبدأ بنفسه، ما يستناس التاني. ولما ده يحصل هنشوف
بعينا إنعكاس الكلام ده على شريك حياتنا، بالضبط زي
المرايا.»

«وخلوا بالكم إن الإفراط في أي حاجة بيعمل مشاكل كتير
حتى **العطاء** والتفاني..»



الصفحة

الفهرس

٥	إهداء:.....
٧	مقدمة:.....
١١	ببساطة.. كده؟!.....
١٢	الجواز عن حب
١٢	التعارف:.....
١٣	الارتباط:.....
٢٣	الخطوبة:.....
٣٠	قاعدة التعارف:.....
٣٦	الشبكة:.....
٤١	حجز القاعة وحفلة الخطوبة:.....
٤٥	العزومات:.....
٤٨	الخروجات:.....
٥١	التجهيز للجواز:.....
٥٢	مرحلة تنقية العفش:.....
٥٩	مرحلة فرش العفش:.....
٧١	الجواز:.....
٧١	يعني إيه جواز؟؟.....

٧٥	مرحلة التطبع:
١٠٧	اسطورة النكد:
١٢٥	المشاركة:
١٥١	مشاكل الأهل (الزيارات):
١٧٥	الغيرة:
١٩٥	الثقة:
١٩٩	الممنوع مرغوب:
٢٠١	المقارنة:
٢٢٦	لوح الثلج:
٢٣٥	المرايا:
٢٣٧	العطاء:
٢٤٠	حِثّة كدة للترفيه:
٢٤٣	جواز الصالونات:
٢٤٥	مرحلة ما قبل الإنسجام:
٢٥٤	مرحلة ما بعد الإنسجام:
٢٥٦	النهاية:

حقوق الطبع محفوظة للناشر



أطلس

للنشر والإنتاج الإعلامي

يحظر نشر أو اقتباس أى جزء
من هذا الكتاب إلا بعد الرجوع
إلى الناشر